

Siunnersuummut nassuiaatit

Nassuiaatit nalinginnaasut

Imarisaa

1. *Aallaqqaasiut*
2. *Inatsisissatut siunnersuummi pingaarnertit*
 - 2.1. *Mittarfinni attaveqaasersuutit suliffeqarfimmi ataatsimi ataatsimoortinneqarnissaat siunertaralugu aktianik piginneqatigiiffimmik nutaamik pilersitsineq*
 - 2.1.1. *Inatsit atuuttoq*
 - 2.1.2. *Mittarfinni attaveqaasersuutit ullumikkut*
 - 2.1.3. *Mittarfinnik ingerlatsinerup siunissami aaqqissuunneqarnissaa pillugu suleqatigiissitaq*
 - 2.1.4. *Siunnersuummi isumaliutiginninnerit*
 - 2.1.4.1. *Mittarfinnik ingerlatsinerup siunissami aaqqissuunneqarnissaa*
 - 2.1.4.2. *Mittarfeqarfuit A/S-imi ingerlatat killilersornerat*
 - 2.1.5. *Aaqqiissutissatut siunnersuutigineqartoq*
 - 2.2. *Mittarfinnik ingerlatsiinnarnissamut, taakkunungalu aningaasaliinissamut pisussaaffik*
 - 2.2.1. *Suliat Mittarfeqarfuit ullumikkut isumagisaat*
 - 2.2.2. *Siunnersuummi isumaliutiginninnerit*
 - 2.2.3. *Aaqqiissutissatut siunnersuutigineqartoq*
 - 2.3. *Attaveqaasersuutinik inuiaqatigiinnut pingaarutilinnik nakkutilliineq*
 - 2.3.1. *Suliffeqarfimmit nammineertitamit aktianik ingelatseqatigiiffimmut ikaarsaarneq*
 - 2.3.2. *Siunnersuummi isumaliutiginninnerit*
 - 2.3.3. *Aaqqiissutissatut siunnersuutigineqartoq*
 - 2.4. *Pigisat nalillit, ingerlatallu akileeqataassutigineqanngitsut*
 - 2.4.1. *Mittarfeqarfimmi massakkut pigisat nalillit, ingerlatallu*
 - 2.4.2. *Siunnersuummi isumaliutiginninnerit*
 - 2.4.3. *Aaqqiissutissatut siunnersuutigineqartoq*
3. *Aningaasaqarnikkut allaffissornikkullu pisortanut kingunissai*
 - 3.1 *Akigititat akiliutillu pillugit*
 - 3.2 *Aningaasanut Inatsit*
4. *Aningaasaqarnikkut allaffissornikkullu inuutissarsiutilinnut kingunissai*
5. *Avatangiisinut, pinngortitamut inuillu peqqissusaannut kingunissai*
6. *Innuttaasunut kingunissai*
7. *Allatigut kingunissat annertuut*
8. *Oqartussaasunut suliaqatigiiffinnullu il.il. tusarniaaneq*
9. *Ilanngussaqaq 1 – Tusarniaanermi allakkiaq*

1. Aallaqqaasiut

Aktianik piginneqatigiiffimmi aningaasaatinik piginneqataassutsit malitsigisaanik Kalaallit Airports Holding A/S-imut tunniunneqarnissaat siunertaralugu, suliffeqarfiup ullumikkut nammineertitap Mittarfeqarfiit ilaata aktianik piginneqatigiiffimmut nutaamut akileeqataassutigineqarnissaanut Naalakkersuisut piginnaatinneqassasut, inatsisartut inatsisissaattut siunnersuutitigut matumuuna siunnersuutigineqarpoq. Nunami mittarfinni tamani sulisut paarlaateqatigiittarnerisigut aaqqissuussaaneq tamaat akimorlugu aalaakkaasumik, qajannaatsumillu ataatsimut ingerlatsisoqarsinnaaqullugu, mittarfinni attaveqaasersuutit, taakkunanilu sulisoqarnikkut piginnaasat suliffeqarfimmi ataatsimi ataatsimoortinneqarnerisigut, nuna tamakkerlugu mittarfinnik ingerlatsinerup aaqqissuussaanerata pitsanngorsarneqarnissaanik kissaateqarnermik siunnersuut aallaaveqarpoq.

Mittarfinni attaveqaasersuutit ullumikkut atorneqartut suliffeqarfimmit nammisortitamit Mittarfeqarfinit isumagineqarput. Taamaalilluni nunatsinni qulimiguulinnut mittarfiit, mittarfiillu (matumap kinguliani: »mittarfinnik« taagorneqartut) tamakkerlugit Mittarfeqarfiit ingerlatarai. Mittarfinnut atasumik unnuisarfinnik Mittarfeqarfiit mittarfiit ilaanni aamma ingerlatsivoq, illoqarfiillu ilaanni assersuutigalugu pilersuiviit Mittarfeqarfiit massakkut isumagisaralugit.

Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalorsorneqarnissaannullu killiliussatut piumasaqaatit pillugit Inatsisartut inatsisaat nr. 4, 22. november 2018-imeersukkut, ingerlatseqatigiiffimmut Kalaallit Airports A/S-imut sinaakkutissat aamma pilersinneqarput. Kalaallit Airports A/S 2016-imi juulip aallaqqaataani pilersinneqarpoq, tassanngaanniillu Nuummi, Ilulissani Qaqortumilu mittarfittaassat sanaartorneqarnissaannut, pigineqarnissaannut, ingerlanneqarnissaannullu akisussaaffik Kalaallit Airports A/S-ip ataaniilerluni. Nuummi Ilulissanilu mittarfinnik sanaartornermik, piginnittuunermik ingerlatsinermillu isumagisaqartoq Kalaallit Airports International A/S kiisalu Qaqortumi mittarfimmik sanaartornermik, piginnittuunermik ingerlatsinermillu isumagisaqartoq Kalaallit Airports Domestic A/S immikkoortortalugit aktianik piginneqatigiiffik Kalaallit Airports Holding A/S, ingerlatseqatigiiffiup ullumikkut ingerlatarai.

Taamaalilluni suliffeqarfiit massakkut pingasuusut mittarfinnik ingerlatsissallutik suliassaraat: Kalaallit Airports International A/S, Kalaallit Airports Domestic A/S kiisalu suliffeqarfik nammineertitaq Mittarfeqarfiit.

Mittarfinnik ingerlatsinermi ingerlatseqatigiiffiit piginnaasanik pisariaqartitsisut massakkut amerlanerummata immikkut ilisimasat pillugit unammilleqatigiinneq annerulerpoq, taamaattumillu nunap immikkoortortaannut inatsisitigut akuersissutit attatiinnarneqarnissaannut pisariaqartumik ilisimasat paasisimasallu pigilernissaannut, pigiinnarnissaannullu Mittarfeqarfinnut kiisalu Kalaallit Airportsimut unammillernarluni.

Kalaallit Nunaanni timmisartoqarfiit arlalinngorsimanerisa kinguneri Mittarfeqarfiit malugilereerpaat, siulianullu tapertaliullugu Mittarfeqarfinni atorfinnut inuttassarsiuinerni qinnuteqarumaartussat eqqarsaatigalugit qularnartumik inissisimallutik, tamannalu unammillernaraluttuinnassasoq Mittarfeqarfiit ilimagilereerlugu. Tamanna pingaartumik Nuummi, Ilulissani, Kangerlussuarmi Narsarsuarmilu mittarfinni misigissavaat.

Kalaallit Airports A/S-imik pilersitsinermut atatillugu Nuummi mittarfik piousoq Mittarfeqarfinnit Kalaallit Airportsimut tunniunneqarpoq, mittarfinnillu attaveqaasersuutiniq aaqqissuusseqqinnermut atatillugu silaannakkut angallassinermi Kangerlussuaq ullumikkut qitiusumik inissisimanermini qitiusumik inissisimajunnaassalluni. Mittarfeqarfiit Nuummi Kangerlussuarmilu mittarfinnik ingerlatsinermini sinneqartoorutai, nunap sinnerani mittarfiit amigartooruteqarfiusartut ingerlanneqarnissaannut ullumikkut matussutigineqartarput. Taamaalilluni nammaqatigiittumik akigititaqarnikkut mittarfinnit sinneqartooruteqartartunit, mittarfinnut amigartooruteqartartunut ullumikkut ersinngitsumik attaveqaasersuutinit tapiissuteqartarpoq. Mittarfeqarfiit tassunga ullumikkut ukiumut 4,9 mio. koruuninik Nunatta Karsianut akiliisarpoq, tamannalu ersinngitsumik akitsuutit aamma nallersuunneqarsinnaalluni. Taamaattumik ingerlatsinermi aningaasaqarneq isigalugu, mittarfinnik ingerlatsinerup aaqqissuusinermi ataatsimi pitsanngorsarneqarnissaa siunertaralugu, Mittarfeqarfiit mittarfiit massakkut ingerlatai Kalaallit Airportsip ingerlataanut ilanngunneqarpata naleqqutissaq.

Taamaalilluni Naalakkersuisut aktianik piginneqatigiiffimmik nutaamik Mittarfeqarfiit A/S-imik taaguusikkamik pilersitsisinnaanissaannut tunngavissiiinnaq, suliffeqarfiullu nammineertitaq Mittarfeqarfiit, taassumaluunniit ilaata aningaasaliissutigineratigut aktiatigut aningaasaatinik Naalakkersuisut aningaasaliisinnaanissaat siunnersuutitigut siunertaavoq. Tulliuttutut Mittarfeqarfinni aningaasaatinik piginneqataassutsit Kalaallit Airports Holding A/S-imut tunniunneqarnissaannut Naalakkersuisut siunnersuutitigut piginnaatinneqarput. Taamaalilluni sunniivigeqatigiiffigisinnaasaasigut sunniivigeqatigiissillugit nuna tamakkerlugu mittarfinnik ingerlatsineq, suliffeqarfimmi ataatsimi ataatsimoortinneqassapput.

Tamatuma saniatigut Mittarfeqarfiit A/S-ip aalajangiiffigisassaasa ilaannik, soorlu assersuutigalugu mittarfinnut qularnaveeqqusiusinernik akigititanillu aalajangersaanernik, Naalackersuisut akuersissuteqartassasut siunnersuutip ilaatigut kingunerissavaa, ingerlatseqatigiiffiullu mittarfiinik ingerlatsineq aserfallatsaaliinerlu pillugit kiffartuussinissamik isumaqatigiissusiornissaanik, mittarfinnullu aningaasaliinissaanik Naalackersuisut ingerlatseqatigiiffimmut pisussaaffiliisinnaanissaa siunnersuutitigut anguniarneqarluni.

Tamatuma saniatigut pigisat nalillit ingerlatallu tamakkernagit aktianik piginneqatigiiffimmut nutaamut Mittarfeqarfiit A/S-imut aningaasaliissutigineqassanngitsut siunnersuutitigut anguniarneqarpoq. Uani assersuutigalugu pilersuviit, Namminersorlutik Oqartussat kommunillu akornanni nammagassat suliasallu agguataarneqarnerat pillugu isumaqatigiissummi atuuttumi sinaakkutit iluiniitillugit, siunnersuutitigut kommuninut tunniunneqaqquneqarsinnaassasut pineqarput. Taamaalilluni mittarfinnik ingerlatsinermut tunngatillugu suliasat kisiisa Mittarfeqarfiit A/S-ip isumagisarissavai.

2. Siunnersuummi pingaarnert

2.1. Mittarfinni attaveqaasersuutit suliffeqarfimmi ataatsimi ataatsimoortinneqarnissaat siunertaralugu aktianik piginneqatigiiffimmik nutaamik pilersitsineq

2.1.1. Inatsit atuuttoq

Silaannakkut angallassinermut akisussaaffik tiguneqarnikuunngilaq. Tamatuma kingunerisaanik silaannakkut angallassinermut inatsit Danmarkimi aalajangersarneqartarpoq, naleqquffiinilu Kalaallit Nunaannut atuutsinneqartarluni. Silaannakkut angallassineq pillugu inatsimmut nalunaarut nr. 1149, 13. oktober 2017-imeerluni kingusinnerusukkut allanngortinneqartukku («silaannakkut angallassineq pillugu inatsit»), silaannakkut angallassineq malittarisassaliuunneqarpoq.

Silaannakkut angallassineq pillugu inatsisip § 55-iani imm. 1-imi allassimavoq, mittarfik tamanit atorneqassappat, mittarfimmik ilusilersuinissamut ingerlatsinissamullu transportministeri immikkut ittumik akuersissuteqassasoq. Taamaakkaluartoq Kalaallit Nunaannut tunngatillugu silaannakkut angallassineq pillugu inatsisip § 55-iani imm. 2-mi allassimavoq, Kalaallit Nunaanni mittarfik tamanit atorneqassappat, mittarfimmik ilusilersuinissaq ingerlatsinissarlu Kalaallit Nunaanni Naalackersuisunit akuerineqassasoq. Tamatuma saniatigut mittarfimmik allannguisoqassappat akuersissutigineqartariaqarpoq. Taamaalilluni Kalaallit Nunaanni mittarfimmik ilusilersuinissamut, ingerlatsinissamullu Naalackersuisut akuersissuteqassappat.

Silaannakkut angallassineq pillugu inatsisip § 60-ia naapertorlugu, Naalackersuisunit akuersissutip saniatigut mittarfik teknikkimut tunngatillugu akuersissummik tunineqassaaq, soorlutaaq mittarfik

allanngortinneqassappat tamanna akuerineqassasoq. Trafikstyrelsi teknikkimut tunngatillugu akuersissuteqartarpoq.

2.1.2. Mittarfinni attaveqaasersuutit ullumikkut

Ullumikkut mittarfinni attaveqaasersuutit suliffeqarfimmit nammineertitamik Mittarfeqarfinnit isumagineqarput. Niuernermut Angallanermullu Pisortaqarfimmi mittarfinnut allaffimmik immikkoortumik pilersitsinissamik Kalaallit Nunaanni Inatsisartut aalajangiinerat tunngavigalugu, Mittarfeqarfiit 1988-imi januaarip aallaqqaataani pilersinneqarput. Kalaallit Nunaanni Naalackersuisut 1990-imi juulip aallaqqaataani aalajangerput, 1991-imi januaarip aallaqqaataa aallarnerfigalugu, Mittarfeqarfiit suliffeqarfittut nammineertitatut avissaartinniarlugu.

Tulliuttut ilanngullugit aalajangiinerit taakkua, Mittarfeqarfiit ingerlanneqarneranut inatsisitigut niuernikkullu tunngavissanik imaattunik pilersitsippot:

- Silaannakkut angallassinermut inatsisip § 55-iani imm. 2 naapertorlugu ingerlatsinissamut Naalackersuisunit akuersissut,
- Silaannakkut angallassinermut inatsisip § 60-ia naapertorlugu Trafikstyrelsimit ingerlatsinissamut immikkut akuersissutit,
- Namminersorlutik Oqartussat Missingersuusiornermut malittarisassaanni 2008-mi juunip 17-ianeersumi kapitali 11,
- Namminersorlutik Oqartussat suliffeqarfiutaasa nammineertitat naatsorsuusiortarnerat pillugu Namminersorlutik Oqartussat nalunaarutaat nr. 24, 22. december 2017-imeersoq, kiisalu
- Aningaasanut Inatsit.

Mittarfinnik piusunik tamanik ingerlatsineq Mittarfeqarfinnit isumagineqarpoq. Tamatuma saniatigut mittarfinnut atasumik unnuisarfinnik Mittarfeqarfiit mittarfiit ilaanni aamma ingerlatsivoq, illoqarfiillu ilaanni pilersuiviit, attartortittakkat, eqqagassalerineq il.il. Mittarfeqarfiit isumagisaralugit.

Ilaatigut Nuummi, Ilulissani Qaqortumilu mittarfinnik sanaartortoqarnissaa pillugu aalajangiiffigisassatut siunnersuut, Inatsisartut 2015-imi ukiakkut ataatsimiinnerminni oqaluuseralugulu akueraat. Tamatuma malitsigisaanik Kalaallit Airports A/S 2016-imi juulip aallaqqaataani pilersinneqarpoq. Nuummi, Ilulissani Qaqortumilu mittarfinnik sanaartornissaq, piginnittuunissaq ingerlatsinissarlu ingerlatseqatigiiffiup siunertaraa.

Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu

killiliussatut piumasaqaatit pillugit Inatsisartut inatsisaat nr. 4, 22. november 2018-imeersoq, UKA2018-imi Inatsisartut akuersissutigaat. Kalaallit Airports A/S-ip Nuummi Ilulissanilu nunanit tamalaanit mittarfiliornissaanut kiisalu Qaqortumi nunap immikkoortuani mittarfiliornissaanut atatillugu ingerlatseqatigiiffiup aningaasalersorneqarnissaanut (nammineerluni aningaasaatissaanut) siunnersuut tunngaviliivoq.

Mittarfiliortiternernut naalagaaffiup akuunissaat kiisalu Danmarkip Kalaallit Nunaatalu akornanni inuussutissarsiornikkut suleqatigiinnerup nukittorsarneqarnissaa pillugu Naalakkersuisut danskillu naalakkersuisuisa akornanni 2018-imi septembarip qulingani isumaqatigiinnerup kingunerisaanik, inatsisissatut siunnersuut aappassaaneerneqartussaasoq allannguutissatut siunnersuut Naalakkersuisut saqqummiuppaaat.

Allannguutissatut siunnersuuteqarnerup kingunerisaanik Nuummi Ilulissanilu mittarfissanik piginnittuunissaq naalagaaffiup aamma Kalaallit Nunaanni Namminersorlutik Oqartussat akornanni avinneqarpoq, soorluttaaq Qaqortumi mittarfissaq Kalaallit Nunaanni Namminersorlutik Oqartussanit tamakkiisumik pigineqarnera ingerlaannartussangortoq. Tamanna tunngavigalugu Kalaallit Airports A/S-ip aaqqissuussaanera 2019-imi allanngortinneqarpoq, Kalaallit Airports Holding A/S-illu ataani immikkoortortat marluusut pilersinneqarlutik; Nuummi Ilulissanilu mittarfinnut Kalaallit Airports International A/S kiisalu Qaqortup Mittarfianut Kalaallit Airports Domestic A/S.

Nuummi Ilulissanilu mittarfiit pioreersut 2019-imi Kalaallit Airports International A/S-imut akileeqataassutitut tunniunneqarput, ingerlatsiinnarnissarlu pillugu Mittarfeqarfiit ingerlatsineq pillugu isumaqatigiissusiorfigineqarluni.

Taamaalilluni siunnersuutip saqqummiunneqarnerani, mittarfinnik ingerlatsinissaq suliassaralugu suliffeqarfiit pingasuupput: Kalaallit Airports International A/S, Kalaallit Airports Domestic A/S, suliffeqarfillu nammineertitaq Mittarfeqarfiit.

Taamaalilluni mittarfinnik ingerlatsinermi Mittarfeqarfiit suliaasa ingerlaannarnissaanni kingunissat, Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piumasaqaatit pillugit Inatsisartut inatsisaat nr. 4, 22. november 2018-imeersumut nassuiaatini nalinginnaasuni nassuiaatigineqarput:

”Mittarfeqarfiit Kalaallit Nunaanni qulimiguulinnut mittarfinnik suluusalinnullu mittarfinnik ingerlatsisuupput, ilanngullugu Nuummi mittarfik. Mittarfeqarfiit qulimiguulinnut mittarfiit suluusalinnullu mittarfiit atorneqarnerinit isertitaqartarput, tak. ”Kalaallit Nunaanni qulimiguulinnut mittarfiit suluusalinnullu mittarfiit

atorneqarnerinut akit akiliisarnerlu” sukulluunniit atuuttoq. Mittarfeqarfiit maanna Nuummi Kangerlussuarmilu mittarfiit ingerlanneqarnerinut sinneqartoorutigisartagaat ikilisussaapput peertussaallutilluunniit. Mittarfeqarfiit Nuummi Kangerlussuarmilu mittarfiit ingerlanneqarnerinut sinneqartoorutaat ilaatigut qulimiguulinnut mittarfiit suluusalinnullu mittarfiit amigartooruteqarfiusut ingerlanneqarnerinut matussutissatut atorneqartarput.

Kalaallit Airports A/S Nuummi nunani tamalaani mittarfimmik sanassaaq, Nuummilu mittarfik pioreersoq Kalaallit Airports A/S-imut tunniunneqassaaq. Nuummi aamma Ilulissani mittarfeqarfiit Kalaallit Airports A/S-imut aallarniutitut akiliutigineqarnerannut tunniunneqarnerannullu atatillugu suluusalinnut mittarfiit qulimiguulinnullu mittarfiit amigartooruteqarfiusut aningaasalersorneqarnissaannut siunnersuusiortoqassaaq.

Namminersorlutik Oqartussat, Mittarfeqarfiit suliap pissusissamisoornerani angallannerup ilusaata allanngortinneqarneranit aamma nutaanik mittarfiliornermit kalluarneqartussaapput. Mittarfeqarfinnut suliffeqarfimmut pilersaarummik nutaamik inaarutaasumillu innersuussinissaq, Inatsisartut inatsisissaannut siunnersuutip matuma avataaniippoq. Mittarfeqarfinnut suliffeqarfimmut pilersaarummut nutaamut inaarutaasumullu, taassumalu aningaasalersorneqarnissaanut, allaffissornikkut politikikkullu oqaloqatigiinnerit aalajangiinerillu arlallit apequtaassapput.

Nuummi Ilulissanilu nunani tamalaani mittarfinni suliat annertusiartornerat ilutigalugu, piffissap ingerlanerani Kalaallit Airports A/S-ip ingerlatseqatigiiffiup nunani tamalaani mittarfīinik atuinermut akinik appartitsinissaa naatsorsuutigineqarpoq. Akit siunnersuummi §§ 15-16 naapertorlugit aalajangersarneqartassapput. Tamanna ingerlatseqatigiiffiup taarsigassarsititsisunut akiligassaqarfigineqartunullu aningaasaqarnikkut pisussaaffii isiginiarlugit pisussaassaaq. Akigitat aamma akigititanut tunngaviusut Naalakkersuisunit akuerineqassapput.

Mittarfiit ilusissaanni nutaami suliat amerlinissaat ataatsimut isigalugit nunap immikkoortuini kiisalu qulimiguulinnut mittarfinni aammalu Nuummi Ilulissanilu nunani tamalaani mittarfinni ingerlatsinermut iluaqutaassapput.”

Tamatuma saniatigut Mittarfeqarfiit inatsimmut tusarniummut akissuteqaatiminni erseqqissaatigaat:

” Mittarfeqarfiit naliliipput Kalaallit Airports A/S immikkut aaqqissuussaannermik, Mittarfeqarfiit saniatigut suliaqartussamik, inerisaassappat, tamanna

akitsorsaataasussaasoq. Mittarfeqarfiit inassutigaa Kalaallit Nunaanni mittarfiit aaqqissuussaanermi ataasiinnarmi ingerlanneqarnerat ingerlaannassasoq.”

kiisalu

” Kiisalu Mittarfeqarfiit oqaatigaat, Kangerlussuarmi mittarfiup ingerlanneqarneranit sinneqartoorutit, mittarfinnik allanik Mittarfeqarfinnit ingerlanneqartunik, ingerlatsinerup aningaasalersorneqarneranut atorneqartartut. Ilulissani, Nuummi aamma Qaqortumi mittarfiit sanaartorneqarneranni Kangerlussuarmi taamatut isertitaqarnissaq attatiinnarneqarsinnaassanngilaq. Mittarfinnik allanik tamaginnik ingerlatsinerup aningaasalersorneqarnera Mittarfeqarfinnit ingerlanneqartoq, taamaattumik allami nassaariniarneqartariaqarpoq.”

2.1.3. *Mittarfinnik ingerlatsinerup siunissami aaqqissuunneqarnissaa pillugu suleqatigiissitaq* Inatsisissatut siunnersuutip matumap suliarineqarnera suleqatigiissitamit Naalakkersuisut Siulittaasuata Naalakkersuisoqarfianit, Ineqarnermut, Attaveqaasersuutinullu Naalakkersuisoqarfimmit, Aningaasaqarnermut Naligiissitaanermullu Naalakkersuisoqarfimmit, Mittarfeqarfinnit, Kalaallit Airports Holding A/S-imiillu peqataaffigineqartumit ingerlanneqarpoq. Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piumasaqaatit pillugit Inatsisartut inatsisaata nr. 4-p, 22. november 2018-imeersup akuerineqarnera tunngavigalugu, nuna tamakkerlugu mittarfinnik ingerlatsinerup aaqqissuussaanerata pitsanngorsarneqarnissaanik politikikkut kissaateqarneq aallaavigineqarpoq.

Suliakkiissutinut suleqatigiissitap najoqqutassaani allassimavoq, mittarfinnik ingerlatsinissaq suliasaralugu suliffeqarfiit massakut pingasuusut: Kalaallit Airports International A/S (KAIR International) aamma Kalaallit Airports Domestic A/S (KAIR Domestic) aamma Mittarfeqarfiit, ilaatigullu Kalaallit Nunaanni tunngavissat assinginik atugaqarlutik Islandimi Norgemilu mittarfinnik ingerlatsinerit ingerlatseqatigiiffimmi ataatsimi kattutaasut. Inuiaqatigiinnut aaqqissuussaanernullu ingerlatsisuusunut ersarissunik iluaqutissartalimmik angisuunik ingerlataqarnermi iluaqutissartaqartoq paasineqarpoq.

Tamatuma saniatigut nassuiaatigineqarpoq, Kalaallit Airports A/S-ip Mittarfeqarfiillu suleqatigiinnerat annertusineqaruni Nuummi, Ilulissani Qaqortumilu mittarfissat pilersaarusiorneqarnerinut sunniivigeqatigiinnermik pilersitsissasoq naatsorsuutigineqartoq.

Suliakkiissutitut najoqqutassami allassimavoq, mittarfinnik sanaartornermut atatillugu ilisimasariaqakkanik Kalaallit Airports A/S ilisimasaqartoq, mittarfinnillu ingerlatsinermi ilisimasariaqakkanik Mittarfeqarfiit ilisimasaqartoq. Tamaattumik Ineqarnermut, Attaveqaasersuutinullu Naalackersuisoqarfiup, Mittarfeqarfiit Kalaallit Airports A/S-illu akornanni oqaloqatigiinnerup kingunerisaanik, ullumikkumit allaanerusumik mittarfinnik ingerlatsinerup suliffeqarfinnut ikinnerusunut kattunneqarnerisigut iluaqutissat, ajoqutaasinnaasut, aaqqissuussinerusinnaasullu ersarissarneqarnissaannik kissaateqarnermik kinguneqarpoq.

Assartuussineq pillugu Isumalioqatigiissitap 2011-mi januaarimi isumaliutissiissutaani allassimasutut, timmisartukkut assartuussinerup nunatsinni innuttaasunut aningaasaqarnermullu annertuumik isumaqarnerata kingunerisaanik, mittarfinnik ingerlatsineq sapinngisamik pitsaasumik ingerlanneqarnissaa aalajangiisuusoq.

Tamanna tunuliaqutaralugu suleriaqqinnissami aalajangiinissami tunngavissiornissaminni aaqqissuussaanaissaq misissoqqissaassallugu, nassuiassallugulu suleqatigiissitap ilaatigut suliassarilerpaa. Suleqatigiissitap isumaliutigisai inatsisissatut siunnersuummi matumani ersersinneqarput.

2.1.4. Siunnersuummi isumaliutiginninnerit

2.1.4.1. Mittarfinnik ingerlatsinerup siunissami aaqqissuunneqarnissaa

Mittarfinnik ingerlatsinerup siunissami aaqqissuunneqarnissaata isumaliutiginerani pingaarnertut sammisat pingasut pineqarput: Sulisutigut piginnaasat naammattut piukkunnaatillillu, ingerlatsinermi aningaasaqarneq, sunnii vigeqatigiinnerlu.

Sulisutigut piginnaasat naammattut piukkunnaatillillu eqqarsaatigalugit mittarfinnik ingerlatsinermi immikkut ittumik piginnaasaqarfiit ullumikkut Mittarfeqarfinnut katersugaapput. Piginnaasat taakkua Kalaallit Airportsimi pisariaqartinneqaleraluttuinnartut takuneqarsinnaalereerpoq, suliassaqarfimmilu sulisunik immikkut piginnaanilinnik pissarsiniarluni 2022-mi naapertuutinnngitsumik unammilleqatigiinnermik kinguneqalereerluni.

Assersuutigalugu Danmarkimi mittarfinnik ingerlatsinerit nalinginnaasumik aaqqissuussaaneritut paarlattuanik, Mittarfeqarfiit ullumikkut qullersaqarfimmiit aaqqissuussaapput, tamatumalu saniatigut mittarfiit tamarmik sumiiffinni najugaqartunit aquunneqarlutik. Danmarkimi mittarfinni ataasiakkaani piginnaanillit pisariaqartinneqartut tamarmik nalinginnaasumik pigineqartartut, Nunatta sineriaani mittarfinni ataasiakkaani assersuutigalugu safety managementimut, CNS-imut imaluunniit HR-imut immikkut ilisimasaqartunik atorfeqartitsinissamut ingerlatsinermi suliat amerlassutsimikkut naammangillat. Tamatuma saniatigut aningaasartuuterpaaluit pingaarutillit, ingerlatsinerimullu tamarmiusumut ilaallutik arlaliusut qullersaqarfiup isumagisarai, matumani

sulisunik aqutsineq, aningaasaqarnermik aqutsineq, sillimmasiissutit, aningaasaliissutit, erniat, IT il.il. Mittarfinni tamani sulisut ilinniarsinnaaneri, ilinniarnerminnilu ingerlariaqqissinnaaneri qullersaqarfiup aamma qulakkeertarpai. Tamatuma saniatigut mittarfinni ataasiakkaani Trafikstyrelsimit akuersissutit pisariaqartut pigiinnarneqarnissaannut mittarfiit ataasiakkaat sunnertiasorujussuannngortussaammata, aaqqissuussaarnermik siammasissumik pilersitsinissaq aaqqissuussaankkut naapertuutinngilaq. Naatsumik oqaatigalugu piginnaaneqartut naammattut pigiinnarneqassappata, ingerlatsinermilu isumannaassuseq pisariaqartoq attatiinnarneqassappat immikkut ilisimasat attuumassutillit patajaallisarneqarnissaat pisariaqarpoq. Mittarfinni ataasiakkaanni sulisoqarnikkut, atortutigulluunniit tassanngaannartumik pisariaqartitsisoqalissagaluarpat mittarfinnit allanit suliarortitsisoqarsinnaallunilu atortunik atugassiisoqarsinnaaneratigut, ataatsimoorussamik qitiusumik ingerlatseriaaseqarnikkut mittarfinni ataasiakkaani naammattunik sulisoqarnissaq ilaatigut qulakkeerneqassaaq.

Piginnaasanik taakkunanga pisariaqartitsisumik ingerlatseqatigiiffimmik allamik (Kalallit Airports) ilanngussisoqarpat immikkut ilisimasat pillugit unammilleqatigiinneq annertusissaaq, taamaattumillu nunat immikkoortuini mittarfinnut Trafikstyrelsimit akuersissutit pigiinnarneqarnissaanni pisariaqartumik ilisimasat paasisimasallu pigiinnarneqarnissaat, pisariaqartumillu ilisimasallit paasisimasallillu soqutiginnilersinneqarnissaannut Mittarfeqarfinnut Kalaallit Airportsimullu unammillernassalluni.

Kalaallit Nunaanni mittarfinnik ingerlatseqatigiiffiit arlaliunerisa kingunerisaat Mittarfeqarfinnut malunnarsereerput, siulianullu tapertaliullugu Mittarfeqarfinni atorfinnut inuttassarsiuinerni qinnuteqarumaartussat eqqarsaatigalugit qularnartumik inissisimallutik, tamannalu unammillernaraluttuinnassasoq Mittarfeqarfiit ilimagilereerlugu. Tamanna pingaartumik Nuummi, Ilulissani, Kangerlussuarmi Narsarsuarmilu mittarfinni misigissavaat.

Piginnaasat pillugit unammillernartitat allaatigineqartut kingunerisaannik Kalaallit Airports Mittarfeqarfiillu suleqatigiinnertik annertusereerpaat. Mittarfimmik pioreersumik ulluinnarni ingerlatsineq, mittarfissamullu piareersaatit aaqqissuussaarni taakkunani marluusuni ilisimaarilluarneqassammat, piginnaaneqarfigisassaammallu, atorfik ataatsimut inissillugu Nuummi mittarfiup pisortaa suliffeqarfinni marluusuni taakkunani piffissap ilaani massakkut atorfeqarpoq.

Ingerlatsinermi aningaasaqarneq eqqarsaatigalugu Mittarfeqarfiit ingerlanneqarnerini mikisunik ingerlataqarnermi ajoqutissat annertuut ersaripput. Ilaasunik, nassiussanik allakkanillu assartuussinermi isertitanut naleqqiullugu, nunatsinni mittarfinnik ingerlatsinermut aningaasartuutit annertoorujussuupput. Tamatumunnga aningaasartuutit annertungaatsiartut ilaatigut innuttaasut tunngaviusut ikinnerisa siammasingaatsiarnerisalu kingunerisaannik, ilaatigullu ingerlatsinermi

suliassat aaqqissuunneqarnissaasa pisariaqartinneqartup kingunerisaanik mikisunik ingerlataqarnermut ajoqutissanut atassuteqartutut isigineqassapput.

Assartuussineq pillugu Isumalioqatigiissitap 2011-mi isumaliutissiissutaa naapertorlugu, mikisunik ingerlataqarnermi ajoqutissat Kalaallit Nunaanni timmisartunut mittarfinnuinnaq atuutinngillat, nunanili avannarlerni timmisartunut mittarfinnut minnernut assersuunneqarsinnaasunut atugassarititaallutik.

Kalaallit Nunaanni tunngavissat assinginik atugaqarlutik Islandimi, Finlandimi, Sverigemi, Norgemilu mittarfinnik ingerlatsinerit ingerlatseqatigiiffimmi ataatsimi kattutaapput. Inuiaqatigiinnut aaqqissuusaanernullu ingerlatsisuusunut ersarissunik iluaqutissartalimmik angisuunik ingerlataqarnermi tamanna iluaqutissartaqarpoq.

Taamaattumik ingerlatsinermi aningaasaqarneq eqqarsaatigalugu, aalaakkaanerusumik qajannaannerusumillu ingerlatsinissamik qulakkeerisinnaasumik mittarfinnik ingerlatsineq aaqqissuusaanermi ataatsimi ataatsimoortillugit pitsanngorsarneqarnissaa siunertaralugu, Mittarfeqarfiit massakkut mittarfinni ingerlatai Kalaallit Airportsimut ilanngunneqarunik naleqqunnerussaaq. Taamaalilluni allaffissornermi suliassat aaqqissuusaanermi ataatsimi suliarineqarsinnaasut sammiveqatigiillutik aaqqissuusaanernik marluusunik pilersitsisoqassanngikkaluarpoq.

Tamatuma saniatigut Kalaallit Airportsip Mittarfeqarfiillu suleqatigiinnerisa annertusineqarneratigut pilersaarusiordermi, minnerunngitsumillu Nuummi, Ilulissani Qaqortumilu mittarfissanik ingerlatsinermi sunniivigeqatigiinnermik kinguneqassasoq naatsorsuutigineqarpoq.

Sumiiffinni mittarfinnik ingerlatsinermi ingerlatseqatigiiffiit akorniminni sunniivigeqatigiinninneri assigalugit, Nuummi Ilulissanilu nunanit tamalaanit mittarfiit atulernerini mittarfinnik ulluinnarni ingerlatsineq najukkani isumagineqarsinnaassaaq. Akerlianik ingerlatsinermi ineriartortitsinermilu ataatsimoorussat arlaqartut ersarissumik sunniivigeqatigiissinnaassapput, taakkulu Kalaallit Airports Holding A/S-ip ataani ingerlatseqatigiiffimmut ataatsimut katersuutsinneqassasut naatsorsuutigineqarluni.

Mittarfeqarfiit Kalaallit Airports Holding A/S-imut atalernissaanik kissaateqarneq isigalugu, ingerlatanik ullumikkut Mittarfeqarfinnit isumagineqartunik eqaannerusumik ingerlatsissagaanni, suliffeqarfimmi nammineertitami Mittarfeqarfinni ingerlatat aktianik piginneqatigiiffimmut nuunneqarnerisigut tamanna anguneqarsinnaavoq.

Niuernermik ingerlatsinermi sinaakkutit sinaakkutigalugit, Mittarfeqarfiit ullumikkut suliffeqarfiuvoq nammineertitaq. Mittarfeqarfiit A/S-imi ingerlanneqaruni pitsaannerusumik ingerlatsinissamut tunngavissaqarluarnerussaaq, uani minnerunngitsumik piginnaasat siulersuisuni pikkorissuni katitigaasinnaanerat patsisigalugu.

Tamatuma saniatigut Mittarfeqarfiit ingerlatami attatiinnarneqarnissaanut pitsaannerusumik periarfissaqalissaaq. Tamanna ilaatigut pikkorissunik siulersuisoqarluni aaqqissuussaanissaaq, nunattalu karsianiit ataavartumik aningasalersorneqarnissamik isumalluuteqarunnaarluni siunissamut ungasinnerusumut missingersuusiornissamut pilersaarusiorsinnaalernissaaq patsisaapput. Tamatuma kingunerisaanik aningaasanut inatsimmi tullerriaarinernik ataavartumik allanguisarnernik Mittarfeqarfiit eqqugaannginnerusassaaq, illuatungaani kingumut qiviaraanni nunatta karsiani sillimatinut sunniuteqarnerluttartumik tassangaannartumik ilassutitut aningaasaliissutitigut aningaasanut inatsit eqqugaannginnerusalissalluni. Mittarfinnik ingerlatsinerup aaqqissuunneqarnissaanut suleqatigiissitaaq siusissukkut inerniliivoq, mittarfinni ataasiakkaani ingerlatsinerup aaqqissuussaanera ingerlatseqatigiiffinnit nammineq iluarsineqarpata pitsaannerussaaq. Ingerlatsinerup niuernermik tunngaveqarluni ingerlanneqarnissaanik siunertaqarneq aallaavigalugu, suliassanik pitsaanerpaamik aaqqiissutaasinnaasutut pitsanngorsaaneq, suliallu ingerlasarnerinik pitsanngorsaaneq il.il. tunngavissatut aalajangiunneqarput.

Naalagaaffik Kalaallit Airports Internationalimut 33%-inik piginnittuulluni Kalaallit Airportsimi piginnittuunerup ilusiligaanera, Mittarfeqarfiillu mittarfinnik qulimiguulinnullu mittarfinnik tamanik ingerlatsinera eqqarsaatigalugit, Mittarfeqarfiit pigisaasa nalillit suliaasalu Kalaallit Airports Holding A/S-ip piginneqatigiiffiutaanut, Mittarfeqarfiit A/S-imik taaguusikkamut akileeqataassutigineqarunik naapertuuttutut isigineqarpoq. Najooqutassaaq pisariunani pisariitsumik atuutsilersinneqarsinnaanera, pigisanillu nalilinnik akileeqataassuteqareernerup kingorna sunniutitut pigisanik allanguinissamut pisariaqartitsisoqannginnera tamatumani iluaqutissartaavoq. Kalaallit Airportsimi sammiveqatigiinnik aaqqissuussaanernik marluusunik pilersitsisoqartussaangimmat mittarfinnik ataatsimoorussamik ingerlatsinermi sunniivigeqatigiinnermik pilersitsisoqassaaq, suliffeqarfiillu taakkua marluusut akornanni kingusinnerusukkut annertunerusumik, ataavartumillu akuulersitsisoqarnissaanut najooqutassaaq tunngavissiisinaalluni.

Kingusinnerusukkut mittarfiliortoqassappat, taakkua Mittarfeqarfiit A/S-imit pigineqarlutillu ingerlanneqarnissaat siunertaralugu Mittarfeqarfiit A/S-imut akileeqataassutigineqarsinnaasasut aamma siunertaavoq. Tamanna siunnersuuteqarnermi pingaarnertut siunertamut atavoq, taamaalillunilu mittarfinnik ingerlatsineq arlalinnut siammarsimanani suliffeqarfimmi ataatsimi ataatsimoortinneqassalluni.

Tamatuma saniatigut piffissaq Mittarfeqarfiit A/S-inngortitsivissaq eqqarsaatigalugu, suliffeqarfimmit nammineertitamit aktianik piginneqatigiiffimmut ikaarsaarnissaq Mittarfeqarfinni sulisut ulluinnaannut sunniuteqassanngitsoq siunertarineqarpoq.

2.1.4.2. Mittarfeqarfiit A/S-imi ingerlatat killilersornerat

Suliffeqarfimmi nammineertitami Mittarfeqarfinni pigisat nalillit, ingerlatallu Kalaallit Airports Holding A/S-imut akileeqataassutigalugit aktianik piginneqatigiiffimmik nutaamik pilersitsinissaq pillugu siuliani isumaliutigisat malitsigisaannik, pigisat nalillit ingerlatallu ullumikkut Mittarfeqarfinnit isumagineqartut ersarinnerusumik misissorneqarunik naleqqutissaq.

Mittarfinnut toqqaannartumik tunngassuteqanngitsunik Mittarfeqarfiit ullumikkut pigisanik nalilinnik, ingerlatanillu isumagisaqaaluppoq. Qangatut ingerlatsisimanertut ingerlaannarsimaneq patsisaalluni, suliassarlu suliffeqarfimmut nammineertitamut inissinneqarmat taamanikkut naleqqunnerusimavoq pigisat nalillit, ingerlatallu taakkua Mittarfeqarfinnit isumagiinnarneqarnissaat.

Taamaalilluni Qaarsunni innaallagissiorfik imeqarfillu, Kangerlussuarmi innaallagissamik imermillu pilersuineq, eqqagassalerineq, imiup mingunnikup suliassartaa, Narsarsuarmilu eqqagassalerineq Mittarfeqarfiit ilaatigut isumagisarai. Sumiiffiit ilaanni umiarsualivimmik nakkutilliineq Mittarfeqarfiit aamma isumagisaraa, tamatumalu saniatigut mittarfippaalunni unnisarfinnik ingerlatsilluni. Unnuisarfinnik ingerlatsinerup saniatigut Mittarfeqarfiit arlalinnik attartortitagaateqarpoq, inissianillu arlallinnik ingerlatsineq isumagisaralugu. Kangerlussuarmi Narsarsuarmilu eqqaavissuit Mittarfeqarfiit aamma isumagisarai.

Mittarfinnik, ingerlatanillu tassunga assingusunik, attuumassuteqarsinnaasunilluunniit piginnittuunissamut ingerlatsinissamullu tunngassuteqanngitsunik Mittarfeqarfiit A/S suliassaqaassanngikkaluarpoq. Assersuutigalugu qanga pisimasunik patsiseqartumik suliat ullumikkut Mittarfeqarfinnit isumagineqartut, suliassanik taakkuninnga nalinginnaasumik suliaqartartunut oqartussanut, suliffeqarfinnullu nuunneqartariaqarput.

Taamaalilluni eqqagassalerineq, imiullu mingunnikup suliassartaa kommuninut tunniunneqartariaqarput, umiarsualivinnillu nakkutilliineq assersuutigalugu KNI-mut tunniunneqarsinnaalluni. Innaallagissamik kiammillu pilersuineq Nukissiorfimmut tunniunneqassaaq. Kangerlussuarmi eqqaavissuaq eqqarsaatigalugu, taanna Namminersorlutik Oqartussaniiginnassaaq.

Unnuisarfinnik ingerlatsineq, cafeteriaqarneq neriniartarfeqarnerlu Mittarfeqarfiit A/S-imut aallaavittut akileeqataassutigineqartariaqanngillat aamma, soorluttaaq attartortitsisarneq illuutillu

Mittarfeqarfiit A/S-imut akileeqataassutigineqartariaqaratik Namminersorlutik Oqartussaniiginnartariaqarpoq, taamaattoq tulliuuttoq takuuk.

Pigisat nalillit, ingerlatallu mittarfinnik ingerlatsinermut kattunneqartussaanerat, attaveqaasersuutit immikkuullarissunut atasutut isiginiarneqartariaqarpoq. Taamaalilluni pigisat nalillit, ingerlatallu mittarfinnik ingerlatsinermut toqqaannartumik attuumassuteqanngikkaluarlutik mittarfinni ataasiakkaani ingerlatsinermut tunngassuteqarsinnaasut ilaat, Mittarfeqarfiit A/S-imut akileeqataassutigisinnaassapput. Assersuutigalugu silarlunneratigut angalasut ingerlaqqissinnaatinnagit, sumiiffimmilu allami unnuiffissaqartinnagu unnuisarfik pinngitsoorneqarsinnaatinnagu unnuisarfimmik minnerusumik ingerlatsinerusinnaavoq. Tamatuma saniatigut mittarfinni pisortanut sulisunulluunniit allanut atugassaatillugit, taamaalillunilu mittarfimmi sulisussatut pisariaqartinneqartut ineqartinneqarnissaannut inissiat pinngitsoorneqarsinnaatinnagit, inissianik attartortitsinerusinnaavoq, piginnittuunerusinnaalluniluunniit.

2.1.5. Aaqqiissutissatut siunnersuutigineqartoq

Siunnersuutip § 1-iatigut siunnersuutigineqarpoq, Mittarfeqarfiit A/S-imik taaguusikkamik pilersitsinissaannut Naalakkersuisut piginnaatinneqassasut. Inatsisissatut siunnersuut akuerineqariapat, pilersitsinissamilu sinaakkutissat ersarinnerusut inisseriarpata, aktianik piginneqatigiiffik pilersinneqassasoq naatsorsuutigineqarpoq, takuuk siunnersuutip § 2-a.

Suliffeqarfiup nammineertitap Mittarfeqarfiit tamakkiisumik, ilaannakortumilluunniit akileeqataassutigineratigut, Mittarfeqarfiit A/S-imi aktiatigut aningaasaatinut Naalakkersuisut aningaasaliinissaannut Inatsisissatut siunnersuutip § 2-ata Naalakkersuisut piginnaatippai. Tassunga tunngatillugu Mittarfeqarfimmi pigisat nalillit, ingerlatallu suut Mittarfeqarfiit A/S-imut akileeqataassutigineqarnissaat pillugu ersarinnerusumik aalajangersagaliornissamut Naalakkersuisut piginnaatitsipput. Pigisat nalillit, ingerlatallu suut akileeqataassutigineqassanersut pillugit Naalakkersuisut aalajangersagaat, inatsisissatut siunnersuummi matumani sinaakkutit iluiniissaaq. Kalaallit Nunaanni mittarfinnik, taamaalillunilu ingerlatanik mittarfinnut attuumassuteqartunik piginnittuunissaq, ingerlatsinissarlutik Mittarfeqarfiit A/S-ip siunertarissagaa inatsisissatut siunnersuummi § 3-ssatut siunnersuutigineqarmat, pigisat nalillit ingerlatallu mittarfinnut Mittarfeqarfiit A/S-imut akileeqataassutigineqartunut mittarfinnik piginnittuunerat, ingerlatsinermullu atassapput. Taamaalilluni pigisat nalillit, ingerlatallu mittarfinnik piginnittuunerat ingerlatsinermullu attuumassuteqanngitsut, assersuutigalugu soorlu pilersuinerat tunngasut akileeqataassutigineqarsinnaanngillat. Pigisat nalillit, ingerlatallu Mittarfeqarfiit A/S-imut akileeqataassutigineqarsinnaasut pillugit ersarinnerusumik nassuiaatit

takuniaraanni, inatsisissatut siunnersuummi §§ 2-3-mut nassuiaatit immikkut ittut innersuussutigineqarput.


Mittarfeqarfiit pigisaasa nalillit, ingerlataasalu akileeqataassutigineqarneratigut, suliffeqarfimmi akileeqataassutigineqartumi piginnaatitaaffinnut, pisussaaffinnullu tamanut Mittarfeqarfiit A/S ilanngutissaaq, takuuk inatsisissatut siunnersuutip § 2-ani imm. 2.

Mittarfeqarfiit A/S-ip qaqugukkut pilersinneqarnissaa pillugu Naalakkersuisut Siulittaasuata Naalakkersuisoqarfiata, Aningaasaqarnermut Naligiissitaanermullu Naalakkersuisoqarfiup, Ineqarnermut Attaveqaasersuutinullu Naalakkersuisoqarfiup, Mittarfeqarfiit, Kalaallit Airports Holding A/S-illu akornanni isumaqatigiissuteqarnikkut ersarinnerusumik aalajangerneqassaaq.

Mittarfeqarfiit A/S-imi aningaasaatinik piginneqataassutsit Kalaallit Airports Holding A/S-imut tunniunneqarnissaannut, inatsisissatut siunnersuutip § 6-iatigut Naalakkersuisut piginnaatinneqarput.

Kalaallit Airports Holding A/S-ip ingerlatsinerani sinaakkutissat eqqarsaatigalugit, siunnersuummi § 6-issatut siunnersuuteqarnikkut Kalaallit Airports Holding A/S Mittarfeqarfiit A/S-imik piginnittuunissaanik, ingerlatsinissaanillu peqquneqarpoq. Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piumasaqaatit pillugit Inatsisartut inatsisaat nr. 4, 22. november 2018-imeersumi § 15 naapertorlugu, ingerlatsivimmi malittarisassat naapertorlugit Kalaallit Airports Holding A/S suliffeqarfimmik ingerlatsissaaq. Mittarfeqarfiit A/S-imi aningaasaatinik piginneqataassutsinik Naalakkersuisut Kalaallit Airports Holding A/S-imut tunniussinerini, Kalaallit Airports Holding A/S-ip malittarisassani allanngortissavai. Ingerlatseqatigiiffiup malittarisassaanik allanngortitsinissaaq, ataatsimeersuarnermi aalajangerneqassaaq.

Kalaallit Airports Gruppen-imi ingerlatseqatigiiffiup ilusiligaanissaatut siunnersuutigineqartoq, piginnittuussutit procentinngorlugit takutinneqarlutik matumap kinguliani takussusiorneqarpoq.



Mittarfiit teknikkikkut akuerisaaneri eqqarsaatigalugit, Mittarfeqarfiit pigisaasa nalillit, ingerlataasalu Mittarfeqarfiit A/S-imut akileeqaataassutigineqarnerisigut akuersissutaaqqaartut allangortinneqassapput. Matumani qinnuteqarnermi akuersissuteqarnermilu suliffeqarfik nammineertitaq Mittarfeqarfiit akuersissummik piginnittutut allassimanagera, Mittarfeqarfiit A/S-ilu akuersissummik pigisaqartussangornera patsisaavoq. Taamaalilluni akuersissummik pigisaqartoq allangortussaavoq.

Taamatut allanguineq Trafikstyrelsimut nalunaarutigineqarlunilu tassanga akuerineqartussaavoq, takuuk silaannakkut angallassineq pillugu § 60-imi imm. 1-imi nr. 2. Teknikkikkut akuersissutip nutarterneqarnissaannik qinnuteqarnissaq, Mittarfeqarfiit A/S-ip isumagisarissavaa. Tassunga tunngatillugu mittarfiit Mittarfeqarfiit A/S-imut akileeqaataassutigitinnagit, Trafikstyrelsip teknikkikkut akuersissutai Mittarfeqarfiit A/S-ip tigusimasussaassavai. Mittarfiit ilusilersugaanerat il.il. Mittarfeqarfinnit Mittarfeqarfiit A/S-imut akileeqaataassutigineqarnerinut atatillugu allangortinneqartussaanginneri eqqarsaatigalugit, akuersissutit taakkua naammasiinnagassaassasut naatsorsuutigineqarpoq.

2.2. Mittarfinnik ingerlatsiinnarnissamut, taakkunungalu aningaasaliinissamut pisussaaffik

2.2.1. Suliat Mittarfeqarfiit ullumikkut isumagisaat

Suliffeqarfiup nammineertitap Mittarfeqarfiit mittarfinni attaveqaasersuutit atortut tamakkerlugit ullumikkut isumagisarai. Mittarfinni 13-iusuni, qulimiguulinnullu mittarfinni 46-suni ilaasunik angallassineq, nassiussanillu assartuineq pineqarpoq.

Mittarfiit il.il. ullumikkut Namminersorlutik Oqartussanit pigineqartut, suliffeqarfillu nammineertitaq Mittarfeqarfiit aqqutigalugu ingerlanneqartut, inunnik angallassinermi nassiussanillu assartuussinermi angallannermik ataqatigiisumik pilersitsiniarnermut tapertaapput.

Mittarfinni tamalaanik akitsuusersuisarnikkut mittarfinnik atuinermi Mittarfeqarfiit isertitaqartarpoq. Taamaakkaluortoq mittarfiit arlaqanngitsut, matumani pingaartumik Nuummi Kangerlussuarmilu mittarfiit sinneqartooruteqarfiusarput. Mittarfinnik amigaartooruteqarfiulluni ingerlanneqartunut, sinneqartoorutit taakkua matussutigineqartarput.

2.2.2. Siunnersuummi isumaliutiginninnerit

Nuummi nutaamik mittarfiliornermut atatillugu Nuummi mittarfiup Kalaallit Airports International A/S-imut tunniunneqarneratigut, Nuummi Mittarfimmit Mittarfeqarfiit sinneqartoorutigisartagai annaaneqartussaapput. Tamatuma saniatigut Nuummi mittarfiup atulerneratigut Kangerlussuarmi Mittarfik ullumikkutut taamarsuaq aqqusaarneqartarunnaartussaammat, Kangerlussuarmi Mittarfimmit Mittarfeqarfiit sinneqartoorutigisartagai annaaneqanngikkunik annikillisussaapput. Mittarfiit sinneri Mittarfeqarfiit A/S-imut akileeqaataassutigineqartussat, amigartoorutit matussusersinnaanngilaat.

Ingerlatsinermi aningaasaqarnikkut sinaakkutinik pitsaanerpaanik Kalaallit Airports Holding A/S-imut pilersitsiumalluni, immikkoortortaqarfik Mittarfeqarfiit A/S niuernerq tunngavigalugu ingerlanneqartariaqarpoq.

Ingerlatsivimmi ataatsimoortumik ingerlatsinermi, mittarfinnillu il.il. ingerlatsinermi kiisalu niuernermi killilimmik Mittarfeqarfiit A/S nammineq iliuuseqarsinnaasariaqarpoq. Ataatsimoortumik ingerlatsinerup iluani suliassanik niuerneramik tunngaveqanngitsunik Mittarfeqarfiit A/S suliaqarsinnaasariaqarpoq, ataatsimoortumilli ingerlatsineq niuerneramik, sinneqartooruteqarnissamillu tunngaveqartariaqarluni.

Ataatsimoortumik ingerlatsinermut, taamaalillunilu ingerlatseqatigiiffiup akigititanik appaasinnaaneranut, akigititanut tunngaviusut, akigititat tunngaviusut aqqiisussaanerinut kajujuummisitsisussamut, ingerlateqatigiiffiullu ingerlataanut atatillugu ingerlatat niuernermik tunngavilimmik ingerlanneqarsinnaanissaanut aalajangiisuussaaq.

Taamaalilluni niuerneramik eqqarsaraanni, mittarfiit aallaavittut amigartoorutaasartut suliffeqarfimmit nammineertitamit Mittarfeqarfimmit Mittarfeqarfiit A/S-imut akileeqaataassutigineqartunik ingerlatsineq, Mittarfeqarfiit A/S-imi ingerlateqqinneqarsinnaanngillat.

Tamanna tunualiaqutaralugu mittarfinnik taakkunanga ingerlatsineq pillugu kiffartuussinissamik isumaqatigiissusiornikkut, mittarfinnik taakkunanga ingerlatsinerup attatiinneqarnissaanik Naalakkersuisut Mittarfeqarfiit A/S-imut pisussaaffiliisinnaasariaqarput. Taamaalilluni mittarfiit ullumikkut Mittarfeqarfinnit ingerlanneqartut tamarmik, Mittarfeqarfiit A/S-imi ingerlaannarsinnaanissaat qulakkeerneqarsinnaassaaq. Taamaalilluni mittarfinni ataasiakkaani atuisut akiliutaannaasigut oqimaaqatigiissitsisinnaanngitsuni, sinneqartooruteqarsinnaanngitsuniluunniit mittarfinni attaveqaasersuutit eqqarsaatigigaanni suli pilersuisoqaannarnissaa Naalakkersuisut qulakkeersinnaavaat. Mittarfimmut isertitassanik tapiissutit qulakkeerinnissutaassapput, taamaalillunilu mittarfinnik amigartoorutaasussaagaluartunik niuernermik tunngaveqarluni Mittarfeqarfiit A/S ingerlatsisinnaassalluni.

Mittarfiit Mittarfeqarfiit A/S-imut akileeqaataassutigineqartut ingerlaannarnissaanni, mittarfinni isumannaallisaanerup attatiinneqarnissaa siunertaralugu annertuumik ilaatigut aningaasaliisoqartariaqassammat, mittarfiit qanoq issusaasa qulakkeerneqarnissaat siunertaralugu ingerlatseqatigiiffiup mittarfiutaannut aningaasaliinissamik immikkut pisariaqartitsineq pillugu Mittarfeqarfiit A/S isumaqatigiissusiornissaanik, Naalakkersuisut aamma pisussaaffilersinnaasariaqarpaa. Tassunga atatillugu nunatta karsiatigut, pisariaqarfiinilu avataanit aningaasaliissutitigut taakkua aningaasalersorneqarnissaat Mittarfeqarfiit qulakkeersinnaasariaqassavaat. Mittarfinnut aningaasaliinissamik immikkut pisariaqartitsinermut atatillugu avataanit aningaasalersuisoqarneratigut aningaasartuutissat Mittarfeqarfiit A/S-ip nammassinnaassanngikkai eqqarsaatigigaanni, taakkua aningaasaliiffigineqarnissaat pillugu Mittarfeqarfiit A/S-imut isumaqatigiissusiornermut atatillugu aningaasalersuinissami aningaasartuutissat ilaat, tamakkerlugilluunniit matussuserneqarnissaannik Naalakkersuisut isumaqatigiissusiorsinnaasariaqarput.

2.2.3. Aaqqiissutissatut siunnersuutigineqartoq

Inatsisissatut siunnersuutip § 3-ani, imm. 2-atigut siunnersuutigineqarpoq, niuernermik tunngavilimmik Mittarfeqarfiit A/S ingerlanneqassasoq. Tamanna inatsisissatut siunnersuutip § 10-anut atasutut isigineqassaaq, taanna tunngavigalugu mittarfinni pineqartuni ingerlatsineq, aserfallatsaaliineq, aningaasaliinissarlu pillugit kiffartuussinissamik isumaqatigiissusiornikkut ingerlatseqatigiiffiup mittarfiisa ingerlanneqaannarnissaannik Naalakkersuisut Mittarfeqarfiit A/S pisussaaffilersinnaammassuk. Kiffartuussinermi isumaqatigiissutit § 10-mut ilaatinneqartut, § 3-mi imm. 2-ssatut siunnersuutigineqartumut naapertuuttumik niuernermik tunngavilimmik isumaqatigiissutigineqassatut siunnersuutigineqarpoq. Aalajangersagassatut siunnersuutigineqartoq malillugu kiffartuussinissamik isumaqatigiissutit ukiuni arlalinni atuuttussanngorlugit isumaqatigiissutigineqarsinnaalissapput, mittarfiillu angallassinermi attaveqaasersuutinut ilaatinneqarnissaat, tunngavileeqataanissaallu qulakkeerneqarsinnaassalluni. Tamatuma saniatigut mittarfinnut ataasiakkaanut missingersuutit ukiunut arlallit atuuttussat tunngavigalugit

kiffartuussinermi isumaqatigiissutit isumaqatigiissutigineqassapput, missingersuutinilu ingerlatsineq, aserfallatsaaliineq aningaasalersuinerlu ilaatinneqassallutik.

Mittarfeqarfiit A/S-ip mittarfiinut atatillugu aningaasaliinissamut immikkut pisariaqartitsineq, taakkualu aningaasalersorneqarnissaat pillugu niuernermik tunngavilimmik Naalackersuisut isumaqatigiissusiornissaannut piginnaatinneqassasut, inatsisissatut siunnersuutip § 11-atigut siunnersuutigineqarpoq. Kiffartuussinermi isumaqatigiissutit assigalugit isumaqatigiissutit § 11-mut ilaatinneqartut ukiuni arlalinni atuuttussanngorlugit isumaqatigiissutigineqarsinnaassasut siunnersuutigineqarpoq, tamatumalu saniatigut mittarfiit angallassinermi attaveqaasersuutinut ilaatinneqarnissaat, tunngavileeqataanissaallu qulakkeerneqassalluni.

2.3. Attaveqaasersuutini inuiaqatigiinnut pingaarutilinnik nakkutilliineq

2.3.1. Suliffeqarfimmit nammineertitamit aktianik ingelatseqatigiiffimmut ikaarsarneq

Mittarfeqarfiit Namminersorlutik Oqartussanit pigineqarluni ullumikkut suliffeqarfiuvoq nammineertitaq. Mittarfeqarfiit Ineqarnermut Attaveqaasersuutinullu Naalackersuisoqarfiup ataaniippoq.

Ingerlatsinermi taamatut ilusilersugaanera patsisaalluni, Naalackersuisut suliffeqarfimmut ilitsersuisinnaatitaammat Mittarfeqarfiit politikikkut annertuumik aqutaavoq.

Nuna tamakkerlugu mittarfinnik ingerlatsineq Mittarfeqarfiit ullumikkut isumagisaraa. Mittarfinni attaveqaasersuut taanna Kalaallit Nunaanni innuttaasunut pingaaruteqarpoq, taamaalillunilu mittarfiit inuiaqatigiinni attaveqaasersuutini pingaarutilittut inissisimallutik. Taamaattumik mittarfiit inuiaqatigiinni attaveqaasersuutini pingaarutilittut inissisimanerat eqqarsaatigalugu mittarfinnik taakkunanga ingerlatsinissaq pingaaruteqarpoq. Mittarfeqarfiit suliffeqarfik nammineertitaanermigut tamanna naapertorlugu mittarfiit ingerlassinnaasimavai, aktianik piginneqatigiiffimmili imminermi taamatut ingerlatsisoqarsinnaanani.

2.3.2. Siunnersuummi isumaliutiginninnerit

Mittarfeqarfiit pigisaat nalillit, ingerlataallu annersaat aktianik piginneqatigiiffimmut Mittarfeqarfiit A/S-imut akileeqataassutigineqassasut siunnersuutitigut siunnersuutigineqarpoq. Taamaalilluni nunami mittarfiit Naalackersuisut naalackersuisoqarfianiikkunnaarlutik, aktianik piginneqatigiiffimmik ingerlatsinermi inatsisitigut pisussaaffeqarluni siulersuisut ataaniilissapput.

Namminersorlutik Oqartussat aktianik piginneqatigiiffii politikikkut akuleruffigineqarneq ajorput, ingerlatseqatigiiffiillu niuernermut tunngatillugu pisariaqartumik iliuseqarsinnaanissaasa qulakkeerneqarnissaa tamatumani siunertaalluni.

Taamaakkaluartoq mittarfiit inuiaqatigiinni attaveqaasersuutitigut pingaarutilittut inissisimanerat eqqarsaatigalugu, mittarfiit takkua isumagineqarnerini Namminersorlutik Oqartussat politikkikkut tamakkiisuungikkaluartumik sulii nakkutiginnittariaqarput.

Taamaattumik ingerlatseqatigiiffiup mittarfiutai inuiaqatigiinni attaveqaasersuutitigut pingaarutilittut inissisimanerinit atallugu ingerlatseqatigiiffimmi pingaarutilinnik aalajangiisoqartussaallugu, politikkikkut nakkutilliinissamik qulakkeerinnittussamik Mittarfeqarfiit A/S pillugu inatsimmi ilanngussisoqartariaqarpoq.

Ingerlatseqatigiiffiup ingerlanneqarnissaani, taamaalillunilu mittarfiit ingerlanneqarnissaanni malittarisassat tunngaviussapput, tamannalu patsisaalluni malittarisassat Naalakkersuisunit akuerineqartariaqarlutik. Tamatuma saniatigut pigisat nalillit, ingerlatallu Mittarfeqarfiit A/S-imut akileeqaataassutigineqartut Mittarfeqarfiit A/S-imii ginnarsinneqarnissaat pillugu Naalakkersuisut nakkutilliisariaqarput. Tamatuma saniatigut ingerlatseqatigiiffiup mittarfiutaanni pigisat nalillit soorlu assersuutigalugu napasuliat, terminalit, hangarit il.il. Naalakkersuisut akuersisimatinnagit tunniunneqannginnissaat, qularnaveeqqusiunneqannginnissaat, sivisuumilluunniit attartortinneqannginnissaat qulakkeerneqartariaqarpoq. Uani mittarfinnik ingerlatsinermut kinguneqarsinnaasumik mittarfinnik, mittarfiillu pigisaannut il.il. piginnittuunerup allanngunnginnissaa qulakkeerniarneqarpoq.

Mittarfeqarfiit A/S niuernermit tunngaveqarluni ingerlatseqatigiiffimmik ingerlatsinerminut atallugu ingerlatseqatigiiffiup mittarfiutaannik atuinermi akigititanik, akigititanullu tunngavissanik nammineq aalajangersaasinnaasariaqarpoq. Taamaakkaluartoq Mittarfeqarfiit A/S-ip akuersissuteqarluni ingerlatsineranut toqqaannartumik tunngassuteqartunik akigititanik aalajangersaaneq, mittarfiit inuiaqatigiinni attaveqaasersuutitigut pingaarutilittut inissisimanerisa atornerarnerinit pingaaruteqartorujussuuvoq. Taamaattumik akinut iluarsisutit imaluunniit assersuutigalugu pisortani akitsuutit akileraarutilluunniit allanngornerisa kingunerisaanik akigititanik allannguneq pineqartinnagu, taakkunanga aalajangersaanermi Naalakkersuisut aamma nakkutilliisariaqarlutik.

2.3.3. Aaqiissutissatut siunnersuutigineqartoq

Inatsisissatut siunnersuummi § 4-ssatut siunnersuuteqarnikkut siunnersuutigineqarpoq, Mittarfeqarfiit A/S-ip malittarisassai, malittarisassaanilu allannguutit Naalakkersuisunit akuerineqartassat, Naalakkersuisullu akuersisimatinnagit Mittarfeqarfiit A/S arlalinnigortitsisinaanani kattussinnaassanngitsaq.

Inatsisissatut siunnersuummi § 5-issatut siunnersuuteqarnikkut siunnersuutigineqarpoq, napasuliat, terminalit, illuutit, hangarit, nunaminertanut piginnaatitaaffiit il.il. ilanngullugit mittarfiit

akileeqataassutigineqartut Naalakkersuisut akuersisimatinnagit tunniunneqarsinnaassanngitsut, sivisunerusumik attartortinneqarsinnaassanngitsut, qularnaveeqqusiunneqarsinnaassanngitsullu. Tamatuma saniatigut qularnaveeqqusiinissaq Naalakkersuisunit akuerineqarsimangippat, pigisat nalillit taakkua aamma akiitsoqarfinit malersorneqarsinnaassanngillat.

Inatsisissatut siunnersuummi § 9 naapertorlugu, ingerlatseqatigiiffiup mittarfiutaanni akigititanik Mittarfeqarfiit A/S aalajangersaasassaaq, akigititalli akigititanullu tunngaviit akuersissuteqarluni ingerlatsinermut toqqaannartumik tunngassutillit, taakkulu allanngortinneqassappata Naalakkersuisunit akuersissutigineqaaqassapput. Tamatuma saniatigut akuersissuteqarluni ingerlatsinermut toqqaannartumik tunngassuteqarlutik akigititat, akigititanulluunniit tunngaviit allanngortinneqarnissaannik Naalakkersuisut piumasaqaasiorsinnaassapput. Taamaakkaluartoq siunnersuutip kingunerisaanik, akinut iluarsiiissutit imaluunniit assersuutigalugu pisortani akitsuutit akileraarutilluunniit allanngornerisa kingunerisaanik akigititanik allannguinernik Naalakkersuisut akuersissuteqartassanngillat.

2.4. Pigisat nalillit, ingerlatallu akileeqataassutigineqanngitsut

2.4.1. Mittarfeqarfinni massakut pigisat nalillit, ingerlatallu

Immikkoortoq 2.1.4.2-mi eqqaaneqartut pigisanik nalilinnik, ingerlatanillu mittarfinnik ingerlatsinermut toqqaannartumik tunngassuteqanngitsunik Mittarfeqarfiit ullumikkut isumagisaqaalupput. Qanga pisimasunik patsiseqartumik, taamanilu suliasat suliffeqarfimmut nammineertitamut Mittarfeqarfinnut inissinneqarnissaat naapertuummat pigisat nalillit, ingerlatallu taakkua Mittarfeqarfinit isumagineqarput.

Tamanna pillugu ersarinnerusumik nassuiaat takuniarukku, immikkoortoq 2.1.4.2 innersuussutigineqarpoq.

2.4.2. Siunnersuummi isumaliutiginninnerit

§ 2-mi imm. 1-issatut siunnersuutigineqartoq aallaavigalugu, suliffeqarfimmi nammineertitamit Mittarfeqarfinni pigisat nalillit, ingerlatallu mittarfinnik piginnittuunermut, ingerlatsinermullu tunngassuteqartut Mittarfeqarfiit A/S-imut akileeqataassutigineqarnissaannut Naalakkersuisut piginnaatinneqarput, taamaattorli § 3-mi imm. 1-issatut siunnersuutigineqartoq takuuk. Taamaalilluni pigisat nalillit, ingerlatallu ilaat Mittarfeqarfiit A/S-imut akileeqataassutigineqassanngillat.

Pigisat nalillit, ingerlatallu Mittarfeqarfiit A/S-imut akileeqataassutigineqanngitsut allanngortinnagit aallaavittut Naalakkersuisunit isumagineqassapput. Pigisat nalillit, ingerlatallu ingerlatiinnarneqartariaqarput, soorlutaaq ingerlatat, pigisallu nalillit Mittarfeqarfinit

isumagineqarsimanerinit naapertuuttumik pigisat nalillit aserfallatsaalineqartarnerat ingerlaannartariaqartoq.

Tamatuma saniatigut pilersuiviit ullumikkut Mittarfeqarfiit isumagisaat Nukissiorfinnut Naalakkersuisut tunniussinnaasariaqarpaat. Taamaalilluni Kangerlussuarmi, Narsarsuarmi Qaarsunilu nukimmik imermillu pilersuinerit Nukissiorfinnut tunniunneqassapput.

Tamatuma saniatigut illuutit imaluunniit unnuisarfiit Mittarfeqarfiit A/S-imut akileeqaataassutigineqanngippata, Naalakkersuisut taakkua tunislinnaasariaqarpaat. Taamaakkaluartoq pigisat nalillit, ingerlatalluunniit illuatungerisamut tunniunneqartut inuiaqatigiit, angallannerluunniit eqqarsaatigalugit isumagineqarnissaannik, tunniussinermi pisut ilaanni Naalakkersuisut piumasaqaasiorsinnaagunik naleqqutissaaq. Tassunga assersuutigalugu mittarfimmi unnuisarfimmik tunniussinermi, unnuisarfimmi inissat pisariaqartinneqartut attatiinnarneqarnissaannik piumasaqaateqarnissaaq assersuunneqarsinnaavoq.

Ingerlatat ullumikkut Mittarfeqarfinit isumagineqartut kommuninit tiguneqarnissaannik Naalakkersuisut aamma peqqusislinnaasariaqarput. Sulialli kommunip akisussaaffiisa iluineereerpata aatsaat tigusinissamik peqqusisoqarsinnaassaaq.

2.4.3. Aaqiissutissatut siunnersuutigineqartoq

Inatsisissatut siunnersuutip § 2-ata kingunerisaanik, Mittarfeqarfiit pigisaat nalillit, ingerlataallu tamakkernagit Mittarfeqarfiit A/S-imut akileeqaataassutigineqassasut Naalakkersuisut aalajangiislinnaassapput. Tamanna pillugu immikkoortuni 2.1.4-mi kiisalu 2.1.5-imi ersarinnerusumik paasisaqarit.

Inatsisissatut siunnersuutip § 7-iatigut siunnersuutigineqarpoq, § 2 naapertorlugu pigisat nalillit, ingerlataallu Mittarfeqarfiit A/S-imut akileeqaataassutigineqanngitsut pillugit siunissami ingerlatsinissaaq, aserfallatsaaliinissarlu pillugit aalajangiinissamut Naalakkersuisut piginnaatinneqassasut. Tamatuma saniatigut pigisat nalillit, ingerlatalluunniit Mittarfeqarfiit manna tikillugu ingerlatsinerani ilaasut namminersortunut, pisortalluunniit immikkoortortaannut tunniunneqarnissaannik Naalakkersuisut aalajangersakkatigut piginnaatinneqarput. Tamatuma saniatigut ingerlatat manna tikillugu Mittarfeqarfinit isumagineqartut kommuninit tiguneqarnissaannik Naalakkersuisut peqqusislinnaanerini aalajangersakkap aamma piginnaatippai.

3. Aningaasaqarnikkut allaffissornikkullu pisortanut kingunissai

3.1 Akigititat akiliutillu pillugit

Isertitat sullissivimmi ataatsimoortumi ingerlatsinermi aningaasartuutitut matussutigineqartarlutik, mittarfiit oqimaaqatigiissitsiviullutik ingerlanneqaannassapput. Mittarfeqarfiit suliffeqarfittut nammineertitatut imaluunniit aktianik piginneqatigiiffittut ingerlanneqaraluarpat apeqqutaatinnagu.

2023-p aallartinnerani akileeqataassuteqarnermi, Mittarfeqarfiit Nunatta Karsianit atuisinnaanera 0 koruuninngortinneqassasoq naatsorsuutigineqarpoq. 80-100 mio. koruuninik atuisinnaatitaavoq. Malitsigisaanik periarfissatut Mittarfeqarfiit akiitsut akilissavai, taamaalillunilu assinganik kiffartuussinissamik isumaqatigiissut qaffasinnerusoq pisariaqartilissallugu. Akiitsut ingerlaannaq nalikillilerneqarunik naleqqunnerussasoq nalilerneqarpoq.

Nuummi Ilulissanilu mittarfiit naatsorsuutigisamik 2024-mi atulernerisigut Mittarfeqarfiit isertittagai annertuumik appariassapput. Mittarfeqarfiit suliffeqarfittut nammineertitatut imaluunniit aktianik piginneqatigiiffittut ingerlanneqaraluarpat apeqqutaatinnagu.

Kalaallit Airportsimi Mittarfeqarfinnilu sammiveqatigiillutik aaqqissuusaanernik marluusunik pilersitsisoqarnissaanik siunnersuut pinngitsoortitsissaaq, taamaalillunilu maanna ilusiusumut naleqqiullugu tamanna annertuumik pitsanngorsaaviusussaalluni.

Mittarfeqarfiit A/S pillugu siunnersuummi § 9 naapertorlugu, mittarfinni akigititat aalajangersarneqassapput. Mittarfeqarfiit ataatsimut ingerlatani tunngavigalugit, ingerlatsinermilu tunngaviusumik tunngaviit naapertorlugit Mittarfeqarfiit A/S-ip taakkua aalajangersassavai. Akigititat akinullu tunngaviusut Naalakkersuisunit akuerineqassapput. Mittarfiit nutaamik aaqqissuusaanerat ataatsimut isigalugu suliat amerlanerulernerisa kingunerisaanik, nunap immikkoortuini mittarfiit kiisalu qulimiguulinnut mittarfiit kiisalu Nuummi Ilulissanilu nunanit tamalaanit mittarfiit ingerlanneqarnerinut tapersiissapput.

3.2 Aningaasanut Inatsit

Mittarfeqarfiit pigisaasa nalillit ingerlataasalu annersaat aktianik piginneqatigiiffimmut akileeqataassutigineqarnerisigut, aningaasanut inatsimmi postit tulluuttut atorunnaarsinneqassasut siunertarineqarpoq. Tamatumunnga taarsiullugu mittarfiit niuerneramik tunngavilimmik ingerlanneqarnissaannut tunngavissaqanngitsut pillugit, Mittarfeqarfiit A/S-imut kiffartuussinissamik isumaqatigiissusiortoqassaaq.

Suliat amigartooruteqarfiusut tapiiffigineqarluni ingerlannissaannik ingerlatseqatigiiffiup peqquneqarsinnaanissaa, inatsisissatut siunnersuutitigut ersarissarneqarpoq. Tamakkiisumik amigartoorutitut naapertuuttumik Namminersorlutik Oqartussat Mittarfeqarfiit A/S-illu akornanni kiffartuussinissamik isumaqatigiissusiornerisigut tamanna atuuttussanngortinneqassasoq naatsorsuutigineqarpoq. Ingerlatseqatigiiffiup sulianik amigartooruteqarfiusunik ingerlatsinermi,

Mittarfeqarfiit A/S-ip ataani mittarfinni sinneqartoorfiusuni, taamatullu amigartooruteqarfiusuni isertitat naatsorsuusiorfiginikuuai. Ineqarnermut Attaveqaasersuutinullu Naalakkersuisoqarfiup, Aningaasaqarnermut Naligiissitaanermullu Naalakkersuisoqarfiup Mittarfeqarfiit A/S-illu suleqatigiinnerisigut Mittarfeqarfiit A/S-imut kiffartuussinissamik isumaqatigiissutissai ersarinnerusumik ilusilersorneqassapput.

Mittarfinnik ingerlatsineq atuisut akiliutaannit ingerlanneqassasoq aallaavigineqarpoq. Imaappoq, ingerlatsinerup attatiinnarneqarnissaanut timmisartortitseqatigiit aqqutigalugit ilaasut tunngaviusumik akiliisassapput. Matuma siuliani allaaserineqartutut, Nuummi Ilulissanilu mittarfiit atulerpata Mittarfeqarfiit isaatitsiviat annertoq atorunnaartussaavoq.

2022-mut Aningaasanut Inatsimmi Mittarfeqarfiit kontoni ukunani takuneqarsinnaapput:

Konto pingaarneq	Oqaasertaliussaq	Aningaasaqarneq (mio. kr.)
20.10.11 - Ilanngaasereerluni erniat	Mittarfeqarfiit Nunap Karsiani 200 mio. koruunit tikillugit qaangiisinnaatitaanerat	-87,0 (atukkat agguaqatigiissullugit)
72.24.02 - Mittarfeqarfiit, Naalagaaffimmut kiffartuussinerit	Kangerlussuarmi timmisartunik nakkutilliiviup atuutsiinnarneqarnera, kiisalu B-660-ip illersornissaqarfimmut ineqarnermut akimik appaalluni attartortitsinissamut isumaqatigiissut	6,4
72.26.02 – Mittarfeqarfiit	Tapiissutitut aningaasaliissutit – Mittarfeqarfiit amigartooruteqarfiusumik ingerlatsinerimut tapiiffigineqarnissaasa qulakkeerneqarnissaanut atorneqarput (nunap karsianut akiliineq)	-4,9
72.26.03 - Mittarfeqarfiit, nukimmik imermillu pilersuineq	Nukissiorfiit Kangerlussuarmi, Narsarsuarmi aamma Qaarsuni assigiimmik akeqarunnaarsitsinerata aningaasaqarnermut kingunerisassai	4,9
87.73.22 - Mittarfeqarfiit – mittarfiit (Sanaartornermut aningaasaliissutit)	Mittarfimmi sanaartukkanut taakkunanilu atortunut aningaasaleeqqinnerit	10,0

3.2.1. Konto pingaarneq 20.10.11 – Ilanngaasereerluni erniat pillugit

2023-mi Aningaasanut Inatsisissatut siunnersuummi Mittarfeqarfiit Nunap Karsianut akiitsuisa 0 koruuninut nalikillilerneqarnissaannik siunnersuummik saqqummiussisoqassasoq

naatsorsuutigineqarpoq. Taamaalilluni mittarfinnik ingerlatsinerup ingerlaqqinnissaanut sinaakkusiussatut atugassarititaasut pitsaanerpaalernissaat qulakkeerneqassaaq, tassanilu suliat amigartooruteqarfiusut, aserfallatsaaliuineq kiisalu aserfallatsaaliuinermi kinguaattoorutit angummaffiginiarneqarneri eqqarsaatigalugit ingerlatsinermi oqimaaqatigiissitsineq Mittarfeqarfiit A/S-imut kiffartuussinermit isumaqatigiissutini kisimik ersersinneqarlutik. Mittarfeqarfiit Nunap Karsianut akiitsui Mittarfeqarfiit A/S-ip tigussappagit, kiffartuussinermit isumaqatigiissutit aamma/imaluunniit mittarfinnik atuisut akiliutaat amerlaqataannik qaffanneqartariaqassapput. Piffissaq eqqarsaatigalugu akiitsunik nalikilliliineq aktianik piginneqatigiiffimmik Mittarfeqarfiit A/S-imik pilersitsinerup nalaani pissasoq naatsorsuutigineqarpoq.

3.2.2. Konto pingaarneq 72.24.02 - Mittarfeqarfiit, Naalagaaffimmut kiffartuussinerit pillugu
Ullumikkut illersornissaqarfiup Kangerlussuarminissaminik pisariaqartitsineranut atatillugu Kangerlussuarmit timmisartunik aqutsinerit il.il. pillugit Naalagaaffimmut kiffartuussinerit Naalagaaffimmit akilerneqartartut pineqarput. Illersornissaqarfiup Kangerlussuarminissaminik pisariaqartitsineranut, malitsigisaanillu mittarfiup nutarterneqarnissaa pillugit suliaqarnermut atatillugu, illersornissaqarfiup siunissami pisariaqartitai aallaavigalugit ingerlatsinermit isumaqatigiissut nutarterneqassasoq naatsorsuutigineqarpoq. Nutarterinerup kingunerisaanik, Aningaasanut Inatsit aqutiginagu Mittarfeqarfiit A/S Illersornissaqarfillu toqqaannartumik isumaqatigiissusiussasut naatsorsuutigineqarpoq.

3.2.3. Konto pingaarneq 72.26.02 – Mittarfeqarfiit pillugu
Mittarfeqarfiit ullumikkut ukiumoortumik tapiissutitut Nunap Karsianut 4,9 mio. koruuninik akiliisarpoq. Mittarfeqarfiit A/S-imik pilersitsinermit akiliutigineqartartoq tamanna atorunnaassasoq naatsorsuutigineqarpoq.

3.2.4. Konto pingaarneq 72.26.03 - Mittarfeqarfiit, nukimmik imermillu pilersuineq pillugu
Mittarfeqarfiit nukissiuutinik imermillu pilersuinermit assigiimmik akeqarunnaarsitsinerup kingorna amigartoorutai, konto pingaarneq aqutigalugu taarsiiffigineqartarput. Mittarfeqarfiit A/S-imik pilersitsinissaaq sioqqullugu Kangerlussuarmit, Narsarsuarmit Qaarsunilu nukissiuutinik imermillu pilersuinerit Nukissiorfinnut tunniunneqassasut naatsorsuutigineqarpoq. Konto pingaarneq manna aqutigalugu ingerlatsinermit tapiissutit assinganik Nukissiorfinnut tunniunneqassasut naatsorsuutigineqarpoq. Mittarfeqarfiit siornatigut Kulusummi pilersuinermit ingerlatsinikuupput, suliaassarli tamanna Nukissiorfinnut tunniunneqareernikuulluni. Kulusummi tunniussinermit misilittakkat, piareersarneqareerluni Kangerlussuarmit, Narsarsuarmit Qaarsunilu malinneqassasoq kissaatigineqarpoq.

3.2.5. Konto pingaarneq 87.73.22 – Mittarfeqarfiit, mittarfiit (Sanaartornermut aningaasaliissutit) pillugu

Mittarfeqarfinni aningaasaliissutissanut konto pingaarneq aqutigalugu ukiumut sanaartornermut aningaasaliissuteqartoqartarpoq. Mittarfeqarfiit A/S-imik pilersitsinermi sanaartornermut aningaasaliissutit taakkua aningaasaliissutigineqartarunnaassasut naatsorsuutigineqarpoq. Tamatuma kingorna siunissami aserfallatsaaliuinerit aningaasaliinerillu Mittarfeqarfiit A/S-ip ingerlanneqarnera aqutigalugu matussuserneqartalissapput, taamaalillunilu mittarfinnik atuisut akiliutaat, Namminersorlutik Oqartussanullu kiffartuussinermik isumaqatigiissutit il.il. aqutigalugit matussuserneqartalissallutik. Taamaakkaluartoq oqartussat piumasaqaataat naapertorlugit timmisartuussinerni mittarfinni isumannaallisaaneq qulakkeerumallugu, Nuummi Ilulissanilu mittarfiit 2024-mi atulernissaasa tungaannut Mittarfeqarfiit aningaasat sulii pisariaqartissagai naatsorsuutigineqarpoq. Taamaalilluni 10 mio. koruunit taakkua sanaartornermut aningaasaliissutaanat, 2023-mi 2024-milu ingerlatsinermi tapiissutinngortinneqassasut naatsorsuutigineqarpoq.

3.2.6. Mittarfeqarfiit A/S-imut kiffartuussinermit isumaqatigiissutit pillugit

Nuummi Ilulissanilu mittarfiit atulernerisigut Kangerlussuaq aqutigalugu angalasartut amerlanersaat siunissami Nuummut Ilulissanulluunniit toqqaannartumik angalasalertussaammata, Mittarfeqarfiit isertittakkamini annertuut annaasussaavai. Taamatuttaaq Nuuk Ilulissallu imarpik qulaallugu mittarfeqarfittut sinneqartoorfiusartut, Mittarfeqarfiit suliiassaanni ilaajunnaartussaapput. Nuummi Ilulissanilu mittarfinnut atuisut akiliisarnerat mittarfiit nutaat Kalaallit Airports International A/S-imit atorneqalereernerini atuutilissapput. 2021-mit 2025 tikillugu Kangerlussuarmut, Ilulissanut Nuummullu tunngatillugu ingerlatsinermit naatsorsuutit ukiumut agguaqatigiissillugu 44,25 mio. koruuninik inerneqartassasut Mittarfeqarfiit naatsorsuutigaat.

Taamaalilluni 2024-mi mittarfiit nutaat atulernerini Mittarfeqarfiit isertitassaqarunnaarneratigut, Kangerlussuarmi Nuummilu mittarfinnit sinneqartoorutinit Mittarfeqarfiit ingerlataannut amigartooruteqarfiusunut tapiissuteqarsinnaanermut periarfissat unissapput. Mittarfeqarfinni suliat sinneruttut, sinneqartoorutaasassasut naatsorsuutigineqanngilaq.


Mittarfiit aallaavittut atuisunit aningaasalersorneqartussaagaluartut, mittarfiit niuernermik tunngavilimmik ingerlanneqarnissaannut tunngavissaqanngitsut pillugit Mittarfeqarfiit A/S-imut kiffartuussinissamik isumaqatigiissusiortoqassasoq naatsorsuutigineqarpoq.

Nuummi Ilulissanilu mittarfiit nutaat atulernerisigut Mittarfeqarfinni isertitassatut annaasassatut paasineqartut tunngavigalugit, Mittarfeqarfiit A/S-ip pilersinneqarnissaanut suliat qulaajaaffigineqarnerinut ilutigitillugu suliamik, 2024-p kingorna kiffartuussinermik isumaqatigiissutit annertussusissaanik aalajangersaanissamut tunngavissamik aallartitsisoqassaaq. Isertitassatut annaasassat, qullersaqarfiup aningaasartuutissai iluarsisat assigisaallu kiisalu siunissami nunap immikkoortuini mittarfinni aningaasaleqqinnissamut pisariaqartitat

kiffartuussinermut isumaqatigiissummi eqqarsaatigineqassapput. Taamaalilluni Mittarfeqarfiit A/S-ip ataani suliassat tamarmiusut naatsorsuutitigut pitsaasumik inerneqarnissaannut kiffartuussinermik isumaqatigiisut qulakkeerinnissaq, akiliisinnaassutsillu sinneqartoorfiunissaa tunngavissalimmik naatsorsuutigineqarsinnaalissalluni.

Mittarfeqarfinnut kiffartuussinermik isumaqatigiissummut nunap karsiata aningaasartuutissaanut matussutissatut, Nuummi Ilulissanilu mittarfiit nutaat atulernerini Nunap karsianut iluaqutissat arlallit pilertussaapput. Iluaqutissat taakkua siunissami Mittarfeqarfinnut kiffartuussinermik isumaqatigiisutitut aningaasartuutissanut aningaasalersueqataassutigineqarnissaannut, iluaqutissanik taakkuninnga piviusunngortitsinissaq pisariaqarpoq. Tassani assersuutigalugu pisortat angalatitsinerisa sipaaruteqarfigisalernissaat, kiffartuussinermilu isumaqatigiisutitut sipaagaqarnissaq pineqarput. Pitsanngorsaanerit taakkua ukiunut tulliuuttunut pisortat missingersuutaanni ersersinneqarunik, atugassanngortinneqarunillu pitsaasumik aatsaat iluaqutaasinnaapput.

Kalaallit Airports International A/S-imi sinneqartoorutit piginnittunut iluanaarutissanngortinneqarnissaannik piginnittut aalajangiissappata, taakkua amigartoorutitut aningaasalersueqataasinnaapput.



. Aningaasalersuinissami iliuitsit allat mittarfiit nutaat atulernissaasa tungaannut aningaasaqarnermi missingersuusiata sukumiisumik uppernarsarneqarnissaat apeqqutaasussaavoq. Mittarfeqarnermi akigititat akiliisarnerillu nammaqatigiittumik iluarsiivigineqarnerisigut taamatut iliortoqarsinnaavoq.

Ineqarnermut Attaveqaasersuutinullu Naalakkersuisoqarfiup, Aningaasaqarnermut Naligiissitaanermullu Naalakkersuisoqarfiup Mittarfeqarfiit A/S-illu suleqatigiinnerisigut, Mittarfeqarfiit A/S-imut kiffartuussinissamik isumaqatigiissutissat ersarinnerusumik ilusilersorneqassapput.

3.2.7. Sulisunut inissiat pillugit

Ullumikkut suliassat ataasiakkaat Aningaasaqarnermut Sulisoqarnermullu Aqutsisoqarfimmit isumagineqarput, soorlu pisortaanermik atorfinitsitsisarnerit, inissianullu normunik tunniussisarnerit. Taamaalilluni Mittarfeqarfinni sulisut arlallit sulisunut inissiani, Namminersorlutik Oqartussat inissiaataanni Namminersorlutik Oqartussanit atugassiissutigineqartuni najugaqarput. Siornatigut Namminersorlutik Oqartussat pigisaannik nalilinnik akileeqaataassuteqartarnerni, ingerlatseqatigiiffik pigisanik nalilinnik akileeqaataassuteqarnermiit ukiuni pingasuni sulisumi sulisunut inissiani innersuunneqarsimasuni ineqarnerinik qulakkeerinissamut periarfissinneqartarput. Mittarfeqarfiit A/S-ip pilersinneqarneratigut periaaseq taanna atuutsiinnarneqasassoq naatsorsuutigineqarpoq. Sumiiffinni toqqakkani Namminersorlutik Oqartussat illuutaat nuunneqarsinnaanngitsut, suliffeqarfimmilu nammineertitamit Mittarfeqarfinnit sulisunut inissiatut atorneqartut Mittarfeqarfiit A/S-imut akileeqaataassutigineqarsinnaapput. Assersuutigalugu illoqarfinni minnerni nunaqarfinnilu, sulisunut inissianik naleqquttunik allanik pissarsinissamik ajornakusoortitsiviusinnaasuni tamanna atorneqarsinnaavoq.

4. Aningaasaqarnikkut allaffissornikkullu inuutissarsiutilinnut kingunissai

Siunnersuut inuutissarsiutilinnut allaffissornikkut aningaasaqarnikkulluunniit kinguneqassanganneqanngilaq.

5. Avatangiisinut, pinngortitamut inuillu peqqissusaannut kingunissai

Siunnersuut avatangiisinut, pinngortitamut inuilluunniit peqqissusaannut kinguneqassanganneqanngilaq.

6. Innuttaasunut kingunissai

Siunnersuut innuttaasunut kinguneqassanganneqanngilaq.

7. Allatigut kingunissat annertuut

Siunnersuut allatigut annertuunik kinguneqassanganneqanngilaq.

8. Oqartussaasunut suliaqatigiiffinnullu il.il. tusarniaaneq

2021-mi decembarip 15-ianit 2022-mi januaarip 17-iata tungaanut siunnersuut, Naalackersuisut tusarniaaviani www.naalackersuisut.gl-imi tamanut tusarniutigineqarpoq.

Tamatuma saniatigut tulliuuttumi oqartussanut, kattuffinnut suliffeqarfinnullu siunnersuut tusarniutigineqarpoq:

Naalackersuisut Siulittaasuata Naalackersuisoqarfia, Nunanut Allanut Naalackersuisoqarfik, Aningaasaqarnermut Naligiissitaanermullu Naalackersuisoqarfik, Aatsitassanut Inatsisillu Atuutsinneqarnerannut Naalackersuisoqarfik, Inuutissarsiornermut Niuernernullu Naalackersuisoqarfik, Aalisarnermut Piniarnermullu Naalackersuisoqarfik, Isumaginninnermut Sulisoqarnermut, Nunamullu Namminermut Naalackersuisoqarfik, Ilinniartitaanermut, Kultureqarnermut, Timersornermut, Ilageeqarnermullu Naalackersuisoqarfik, Peqqinnissamut Naalackersuisoqarfik, Nunalerinnermut, Imminut Pilersornermut, Nikissiutitut Avatangiisinullu Naalackersuisoqarfik, Meeqqanut, Inuusuttunut, Ilaqutariinnullu Naalackersuisoqarfik, Mittarfeqarfiit, Kalaallit Airports Holding A/S, Avannaata Kommunia, Kommune Qeqertalik, Qeqqata Kommunia, Kommuneqarfik Sermersooq, Kommune Kujalleq, SIK (Sulinermik Inuussutissarsiuteqartut Kattuffiat), Sulisitsisut (GE), Nukissiorfiit, Royal Arctic Line A/S, Sikuki Nuuk Harbour A/S, Tusass A/S, Air Greenland A/S, KNI A/S, Asiaq, Grønlandsbanken A/S, BankNordik, Deloitte Nuuk, Visit Greenland, Trafikstyrelsen, Kalaallit Nunaanni Politiit, Arktisk Kommando aamma Naviair.

Tulliuuttumi oqartussanit, kattuffinnit suliffeqarfinniillu tusarniummut akissuteqaatinik Ineqarnermut Attaveqaasersuutinullu Naalackersuisoqarfik tigusaqarpoq:

Aalisarnermut Piniarnermullu Naalackersuisoqarfik, Arktisk Kommando, Kalaallit Nunaanni Politiit, Meeqqanut, Inuusuttunut, Ilaqutariinnullu Naalackersuisoqarfik, BankNordik, Sulisitsisut, Naviair, Qeqqata Kommunia, Kalaallit Airports Holding A/S, Aatsitassanut Inatsisillu Atuutsinneqarnerannut Naalackersuisoqarfik, Aningaasaqarnermut Naligiissitaanermullu Naalackersuisoqarfik kiisalu Trafikstyrelsen.

Tusarniummut allakkiaq ilanngussatut ilanngunneqartoq innersuussutigineqarpoq.

Siunnersuummi aalajangersakkanut ataasiakkaanut nassuiaatit

§ 1-imut

§ 1-imi imm. 1-issatut siunnersuuteqarnikkut, Mittarfeqarfiit A/S-imik taaguutilimmik aktianik piginneqartigiiffimmik Naalakkersuisut pilersitsinissaannut piginnaatinneqarput. Ingerlatseqatigiiffiup aktiatigut aningaasaatai Naalakkersuisunit aamma akilerneqassapput.

Siunnersuutip imarisaanut naapertuuttumik Mittarfeqarfiit A/S-ip pilersinneqarnissaa siunertaralugu, siunnersuut akuerineqarniariartoq Naalakkersuisut piareersaallutik aallartissasut naatsorsuutigineqarpoq. Mittarfeqarfiit A/S 2023-p aallartinnerani pilersinneqarsinnaassasoq naatsorsuutigineqarpoq.

Aktianik ingerlatseqatigiiffiit pillugit inatsit Mittarfeqarfiit A/S-imut atuutissaaq. Inatsimmi tassani ilaatigut aalajangersarneqarpoq, Mittarfeqarfiit A/S-ip malittarisassai, malittarisassanilu allannguutit Naalakkersuisunit akuersissutigineqassasut, Naalakkersuisut akuersisimatinnagit Mittarfeqarfiit A/S kattussinnaananilu arlalinngortitsisinnaanngitsoq, Mittarfeqarfiit A/S-ilu Naalakkersuisunit pisussaaffilerneqarsinnaasoq.

Mittarfeqarfiit A/S-ip pilersinneqarneranut atatillugu nutaanik malittarisassiortoqassaaq, pilersitsinermilu uppernarsaasiortoqarluni.

§ 1-imi imm. 2-ssatut siunnersuuteqarnikkut, Mittarfeqarfiit A/S allanik taaguusikkanik ingerlatsisinnaanissaannut tunngavissinneqarput. Ingerlatsiviit pillugit inatsit naapertorlugu, taaguutaasinnaasut allat ingerlatsiviup malittarisassaani allassimassapput.

§ 2-mut

§ 2-mi imm. 1-issatut siunnersuuteqarnikkut, suliffeqarfimmi nammisortitami Mittarfeqarfimmi pigisat nalillit, ingerlatallu tamakkiisumik ilaannakortumilluunniit akileeqaataassutigineqarnerisigut, Mittarfeqarfiit A/S-imi aktiatigut aningaasaatissanut akiliinissaannut Naalakkersuisut piginnaatinneqarput. Tamatuma saniatigut Mittarfeqarfiit pigisaat nalillit, ingerlataallu suut Mittarfeqarfiit A/S-imut akileeqaataassutigineqarnissaannut ersarinnerusumik aalajangersaanissaannut, aalajangersakkatigut Naalakkersuisut piginnaatinneqarput.

Pigisat nalillit, ingerlatallu suut Mittarfeqarfiit A/S-imut akileeqaataassutigineqarnissaannik Naalakkersuisut naliliinissaanni, mittarfinnik ingerlatanillu tassunga assingusunik, attuumassuteqarsinnaasunilluunniit piginnittuunissamik, ingerlatsinissamillu ingerlatseqatigiiffiup

siunertaa aallaavigineqassaaq, takuuk siunnersuutip § 3-a. Taamaalilluni pigisat nalillit ingerlatallu akileeqataassutigineqartut piginnittuunermut, mittarfinnulluunniit ingerlatsinermut kattunneqartariaqarput.

Taamaalilluni napasuliat, terminaleqarfiit, hangarit, nunaminertat mittarfinnut il.il. atasut ilanngullugit mittarfiit akileeqataassutigineqarsinnaapput.

Pigisat nalillit, ingerlatallu mittarfinnik piginnittuunermut ingerlatsinermulluunniit kattunneqartussaanerat, nunatsinni attaveqaasersuutit immikkuullarissunut atasutut isiginarneqartariaqarpoq. Taamaalilluni pigisat nalillit, ingerlatallu mittarfinnik ingerlatsinermut toqqaannartumik attuumassuteqanngikkaluarlutik mittarfinni ataasiakkaani ingerlatsinermut tungassuteqarsinnaasut ilaat, Mittarfeqarfiit A/S-imut akileeqataassutigisinnaassapput. Assersuutigalugu silarlunneratigut angalasut ingerlaqqissinnaatinnagit, sumiiffimmilu allami naleqquttunik unnuiffissaqartinnagu unnuisarfik pinngitsoorneqarsinnaatinnagu unnuisarfimmik minnerusumik ingerlatsinerusinnaavoq. Qaarsuni, Nerlerit Inaannilu Mittarfeqarfiit ingerlataat uani eqqarsaatigineqarput. Tamatuma saniatigut mittarfinni pisortanut sulisunulluunniit allanut atugassaattillugit, assersuutigalugulu attartortitsineq mittarfinni sulisussatut pisariaqartinneqartut ineqartinneqarnissaannut inissiat pinngitsoorneqarsinnaatinnagit, inissianik piginnittuunerusinnaavoq, attartortitsinerusinnaallunuunniit.

Illuatungaani assersuutigalugu qanga pisimasoq patsisaalluni suliffeqarfimmit nammineertitamit Mittarfeqarfinnit isumagineqarsimallutik pigisat nalillit, ingerlatallu mittarfinnik il.il. ingerlatsinermut ilaanngitsut, attuumassuteqanngitsulluunniit Naalakkersuisut akileeqataassutigisinnaanngilai. Tamanna tunuliaqutaralugu Kangerlussuarmi eqqaavissuaq manna tikillugu Mittarfeqarfinnut nunaminertamik atugassiissutigineqarsimasoq, Naalakkersuisut akileeqataassutigisinnaassanngilaat. Taamatulli innaallagissamik-, imermik-, kiammillu pilersuunermut, umiarsualivinnik nakkutilliinermut imaluunniit imiup mingunnikup suliasartaanut tungassuteqarlutik pigisat nalillit, ingerlatallu Naalakkersuisut akileeqataassutigisinnaanngilaat.

Unnuisarfiit mittarfinnik ingerlatsinermut il.il. pingaaruteqassusaat aallaavigalugu, Kangerlussuarmi Narsarsuarmilu unnuisarfiit akileeqataassutigineqassanersut Naalakkersuisut aalajangiisnaapput.

Tamatuma saniatigut Mittarfeqarfiit A/S-imut killiliussat pillugit § 3-mut oqaaseqaatit innersuussutigineqarput.

Nuummi Ilulissanilu mittarfiit Kalaallit Airports International A/S-imut tunniunneqareerput, soorluttaaq illuutit 2022-mi tunniunneqassasut naatsorsuutigineqartoq. Nuummi Ilulissanilu

ingerlatat, sulisut, atortut, pigisat nuunneqarsinnaasut il.il. ilai Mittarfeqarfiit A/S-imut akileeqataassutsimut ilaatinneqassapput. Taamaalilluni mittarfiit illuutillu atasut kisimik aallaqqaammut Kalaallit Airports International A/S-imit pigineqassapput. Mittarfeqarfiit A/S pilersinneqareerpat Nuummi Ilulissanilu siunissami ingerlatsinissaq, ingerlatseqatigiiffiit peqatigiillutik pilersaarusiortugulu iliuseqarfigissavaat.

Pisinnaatitaaffiit pisussaaffiillu ilanngullugit pigisat nalillit, ingerlatallu akileeqataassutigineqartut aningaasatigut nalingat, Mittarfeqarfiit A/S-imi aktiatigut aningaasaatissaanut apeqqutaassapput. Pigisat nalillit, ingerlatallu aningaasatigut qanoq naleqarnersut manna tikillugu naliliiffigineqarnikuunngillat.

Akileeqataassutigineqartut ataasiakkaat, aningaasatigullu nalingat nassuiarneqarlutik, akileeqataassutsimut atatillugu nalilersuinermi nalunaarusiortoqassaaq. Ingerlatsiviit pillugit inatsimmut naapertuuttumik, nalilersuinermi nalunaarusiaq naliliisartunit nakerisarsiunngitsunit, paasisimasalinniillu suliarineqassaaq. Nalilersuinermi nalunaarusiaq nalinginnaasumik kukkunersiuisumit akuerisaasumit suliarineqartarpoq. Pilersitsinermit kiisalu pigisanik nalilinnik, ingerlatanillu akileeqataassuteqarnikkut Mittarfeqarfiit A/S ingerlatamik pioreersumik tigusisussaammat, Pilersitsinermi pigisanik nalilinnik akiligassanillu aamma naatsorsuisoqassaaq.

Naliliinermut nalunaarutip suliarineqarneranut atugassatut pigisat nalillit suliallu suut akileeqataassutigineqarnissaannut allattuiffimmik sukumiisumik suliaqartoqarnissaa siunnerfigineqarpoq, tassanilu allaaserineqassapput,

- mittarfiit ataasiakkaat, taakkunungalu nunaminertat atugassiissutaasut
- illut aalajangersimasut, B-normui ilanngullugit
- atortut assakaasullit, pigisallu aalaakkaasut.

Pigisanut nalilinnut akileeqataassutigineqartunut atatillugu mingutsitseratarsinnaanernut akisussaaffik, akileeqataassutsinut atatillugu malittarisassiuunneqassaaq, tassungalu atatillugu nalinga annertussilerneqarsinnaassalluni.

Naalackersuisut pigisanik nalilinnik akileeqataassuteqarnermut ilagitillugu aamma pigisat nalillit suliallu, siunissami pisortat suliffeqarfiutaatut nalinginnaasutut Namminersorlutik Oqartussanit kommuninillu isumagineqartussat agguaatissavaat, tak. siunnersuummi § 7-imi imm. 3.

§ 2-mi imm. 1-issatut siunnersuuteqarnikkut, aktiatigut aningaasaatinut akiliinermut atatillugu suliffeqarfimmit nammineertitamit Mittarfeqarfimmit pigisat nalillit il.il. Naalackersuisut Mittarfeqarfiit A/S-imut taamaallaat akileeqataassutigisinnaavaat. Taamaalilluni Mittarfeqarfiit

A/S-ip pilersinneqarnerata kingorna, suliffeqarfimmit nammineertitamit Mittarfeqarfinnit pigisat nalillit allat Mittarfeqarfiit A/S-imut akileeqataassutigineqarsinnaassanngillat.

Tamatuma saniatigut aalajangersagassatut siunnersuuteqarnikkut, suliffeqarfimmi nammineertitami Mittarfeqarfinni pigisat nalillit, ingerlatallu Mittarfeqarfiit A/S-ip siunertanut aalajangersagaanut naapertuutinnngippata, imaluunniit pigisaq nalilik, ingerlatarluunniit akileeqataassutigineqartoq siunertarisamut naleqqutinngitsutut Naalakkersuisunit nalilerneqarpat pigiinnarneqarsinnaassapput. Ingerlatat Mittarfeqarfiit A/S-imut akileeqataassutigineqareerpata suliffeqarfik nammineertitaq Mittarfeqarfiit atorunnaassasoq, pigisallu nalillit ingerlatallu sinneruttut Namminersorlutik Oqartussanut tunniunneqassasut naatsorsuutigineqarpoq. Pigisat nalillit, ingerlatallu akileeqataassutigineqanngitsut § 7-issatut siunnersuutigineqartumi malittarisassiunneqarput.

§ 2-mi imm. 2-ssatut siunnersuuteqarnikkut, imm. 1-imi taaneqarlutik akileeqataassutsini pisinnaatitaaffiit, pisussaaffiillu tamakkerlugit Mittarfeqarfiit A/S-ip tigussavai.
Taamaalilluni Mittarfeqarfiit isumaqatigiissutini inatsisitigut pisussaaffii, pisussaaffiit taakkua Mittarfeqarfiit pigisaanut nalilinnut, ingerlataanullu Mittarfeqarfiit A/S-imut akileeqataassutigineqartunut attuumassuteqarpata, tamakkerlugit Mittarfeqarfiit A/S-ip tigussavai.

Mittarfeqarfiit ullumikkut suliaat, isumaqatigiissutini inatsisitigut pisussaaffinnik aallaaveqanngitsut, suliallu Mittarfeqarfiit A/S-imi ingerlaannarnissaannik kissaatigineqassappat, Mittarfeqarfiit A/S-imut kiffartuussinissamik isumaqatigiissutinut ilanngunneqassasut naatsorsuutigineqarpoq.

§ 3-mut

§ 3-mi imm. 1-issatut siunnersuuteqarnikkut, Kalaallit Nunaanni mittarfinnik, taamaalillunilu ingerlatanik tassunga assingusunik, attuumassuteqartunilluunniit piginnittuunissamik, ingerlatsinissamillu Mittarfeqarfiit A/S-ip siunertarissagaa aalajangerneqarpoq.

Suliffeqarfimmit nammineertitamit Mittarfeqarfinnit mittarfiit Mittarfeqarfiit A/S-imut akileeqataassutigineqartut saniatigut, takuuk § 2-ssatut siunnersuutigineqartoq, kingusinnerusukkut mittarfiliortoqassappat, siunertaq pillugu aalajangersakkamut naapertuuttumik takkua Mittarfeqarfiit A/S-imit pigineqarnissaat ingerlanneqarnissaallu siunertaralugu, taakkua Mittarfeqarfiit A/S-imut akileeqataassutigineqassasut aamma siunertaavoq.

»Mittarfiit« tassaapput nunami immamiluunniit sumiiffiit aalajangersimasut silaannakkut angallatini tamakkiisumik ilaannakortumilluunniit miffigineqarsinnaasut, tingiffigineqarsinnaasut ingerlaarfineqarsinnaasullu. Mittarfiit timmisartunut mittarfinnik unittarfinnillu, qulimiguulinnut

mittarfinnik annernik, qulimiguulinnut mittarfinnik minnernik taakkunungalu terminalinik, illunik kiffartuussivinnik, hangarinik sullissisunullu atortunik kiisalu pisortat aqqusiniutaannut qaninnernut aqqusineqarsinnaapput, pilersuivinnullu aqquteqarsinnaallutik.

Tassunga atatillugu »mittarfinnik piginnittuuneq ingerlatsinerlu« ima paasineqassaaq, mittarfinnik piginnittuunermut, ingerlatsinermullu atatillugu suliassanik tamanik isumaginninneq. Tamatumani mittarfinnik illuutinillu atasunik aserfallatsaaliineq, timmisartut nunamiisillugit sullinneqarnerat, isumannaallisaaneq, mittarfimmi neriniartarfeqarqarneq il.il. aamma pineqarsinnaapput.

»Ingerlataq assingusoq« mittarfimmik piginnittuunermut, ingerlatsinermulluunniit atasutut, mittarfimmi ingerlatsinermut toqqaannartumik isigineqarsinnaangitsutut paasineqassaaq.

»Ingerlataq attuumassuteqartoq« ima paasineqassaaq, mittarfinnik piginnittuunermut ingerlatsinermulluunniit toqqaannartumik tunngassuteqarani, taamaakkaluartorli mittarfinnik ataasiakkaanik ingerlatsinermut toqqaannangitsumik tunngalluni ingerlatsineq. Assersuutigalugu mittarfimmik ingerlatsilluarnissami, matumani silamik allamilluunniit patsiseqartumik pilersaarut malillugu angalasut timmisartuunneqarsinnaanginnerini unnuisarfimmut inissiinissaq ilanngullugu, unnuisarfimmik ingerlatsineq tunngavimusimaguni unnuisarfimmik ingerlatsinerusinnaavoq. Mittarfimmi pigisat assakaasullit suliarineqarnissaannut sullivik atorineqartarsimappat, mittarfiup eqqaani sullivimmik aamma ingerlatsinerusinnaavoq.

Mittarfimmik ingerlatsinermi ingerlataq assingusoq, attuumassuteqartorluunniit pineqarnerasoq paasiumallugu ersarinnerusumik naliliisoqassaaq. Mittarfiit arlaqartut aallaavigalugit, mittarfinnili ataasiakkaani pissutsit, pisariaqartitallu aamma isigalugit taamatut naliliisoqarsinnaavoq.

§ 3-mi imm. 2-ssatut siunnersuuteqarnikkut aalajangersarneqarpoq, ingerlatsivik niuerneramik tunngavilimmik ingerlanneqassasoq.

Kalaallit Airportsip ingerlatsinerata malittarisassiuunneqarneranut aalajangersagaq naapertuuppoq, takuuk Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piumasaqaatit pillugit Inatsisartut inatsisaammi § 15-imi, imm. 1.

Sapinngisamik annertunerpaamik suleqatigiinnissaq, pisariillisaanissamillu periarfissap atorluarneqarnissaa qulakkeerumallugu, Mittarfeqarfiit A/S-ip kiisalu Kalaallit Airports Holding A/S-ip ingerlatsinerini tunngavissat assigiissuseqassasut pingaartinneqarpoq.

»Niuernermik tunngavik« ima paasineqassaaq, ingerlatseqatigiiffimmik ingerlatsinermut atatillugu aningaasaatitigut sillimmatit qaqugukkulluunniit illersorneqarsinnaanissaat, mittarfiillu ingerlatseqatigiiffimmut atasut ingerlatseqatigiiffiup pigalugillu, aserfallassinnaallugillu ingerlassinnaanissaanut ingerlatseqatigiiffiup ingerlatsinera aningaasatigut sinnaakkutissaqarnissaa ingerlatseqatigiiffiup anguniassagaa. Taamaakkaluartoq ingerlatsivik annertuumik sinneqartooruteqartassasoq siunertaanngilaq, soorluttaaq aktiaatilinnut agguagassarsiasanik ingerlatsivik akiliisassasoq aallaavittut siunertaanngitsaq.

Ingerlatsivimmi ataatsimoortumik ingerlatsinermi, mittarfinnillu il.il. ingerlatsinermi kiisalu niuernermi killilimmik Mittarfeqarfiit A/S nammineq iliuuseqarsinnaavoq. Mittarfeqarfiit A/S ataatsimoortumik ingerlatsinermi iluani suliassanik niuernermik tunngaveqanngitsunik suliaqarsinnaanissaanut aalajangersagaq periarfissiivoq. Taamaakkaluartorli ataatsimoortumik ingerlatsineq niuernermik, sinneqartooruteqarnissamillu tunngaveqassalluni.

Ataatsimoortumik ingerlatsinermut, taamaallunilu ingerlatseqatigiiffiup akigititanik appaasinnaaneranut, akigititanut tunngaviusut, akigititanik tunngaviusunik aaqqissuussaanermut kajujuummisitsisussamut, ingerlatseqatigiiffiullu ingerlataanut atatillugu ingerlatat niuernermik tunngavilimmik ingerlanneqarnissaanut aalajangiisussaaq. Mittarfimmik ingerlatsinermut ingerlatat allat tassaakkajuttarput timmisartut nunamiisillugit sullinneqarnerat, napasuliamiillu sullissinerit.

Isertitat tamarmik Mittarfeqarfiit A/S-imut tussapput. Ingerlatseqatigiiffiup isertitai ingerlatsinermut, aserfallatsaaliinermut aningaasaliinernullu atorneqassapput.

Mittarfeqarfiit A/S taamaallaat niuernermik tunngaveqarluni ingerlanneqarnissaa aalajangissallugu aalajangersagaq siunertaqarpoq, tamannalu ingerlatsinermi aningaasaqarneq isigalugu nammanneqarsinnaanngitsumik niuernermik tunngaveqaratik suliassaasinnaasut, taarsiissuteqarnikkut Mittarfeqarfiit A/S-imut taamaallaat suliakkiunneqarsinnaanerinik ilaatigut kinguneqarluni, takuuk inatsisissatut siunnersuutip § 11-a.

§ 4-mut

§ 4-mi imm. 1-issatut siunnersuuteqarnikkut, Mittarfeqarfiit A/S-ip malittarisassai, malittarisassanilu allannguutit Naalakkersuisunit akuersissutigineqassapput.

Mittarfeqarfiit A/S-ip pilersinneqarnerani ingerlatseqatigiiffiup malittarisassai Naalakkersuisunit akuerineqassapput. Attaveqaasersuutit inuiaqatigiinni pingaarutilittut inissisimanerat eqqarsaatigalugu, attaveqaasersuutinik suliffeqarfimmit nammineertitamit Mittarfeqarfinit Mittarfeqarfiit A/S-imut akileeqaataassutigineqartunik Naalakkersuisut nakkutilliisinnaanissaanut

periarfissiisumik, malittarisassani immikkut aalajangersagaliortoqassasoq naatsorsuutigineqarpoq. Tamatumani mittarfinnut ataasiakkaanut ukiunut qulinut aserfallatsaaliinisami, aningaasaliinissamilu Mittarfeqarfiit A/S ukiumoortumik missingersuusiortarnissaanik, kingusinnerpaamillu decembarip naanerani missingersuutit Naalakkersuisunut nassiunneqartarnissaannik ilaatigut aamma aalajangersagaqassaaq. Mittarfeqarfiit A/S-ip mittarfiutai il.il. kiisalu pigisai nalillit mittarfinnik ingerlatsinermut ilaasut akuerisaallutillu sulianut naapertuunnissaat, aserfallatsaaliinissami aningaasaliinissamilu missingersuutit qulakkiissavaat. Akigititanik ataavartumik aalajangersaasarnermi kiisalu Naalakkersuisut Mittarfeqarfiit A/S-illu akornanni kiffartuussinissamik isumaqatigiissutini aningaasatigut pisariaqartinneqartut ingerlatsivimmit Naalakkersuisuniillu naatsorsorsinnaanissaannut, aserfallatsaaliinissami aningaasaliinissamilu missingersuutit periarfissiissaaq. Nassiussivissatut naatsorsuutigineqartoq eqqarsaatigalugu, Naalakkersuisut aningaasanut inatsisissatut siunnersuummik, matumani ukiuni missiliuuteqarfiusuni aningaasartuutissatut naatsorsuutigineqartut nalilersorlugillu pingaarnersiorlugit suliaqarnerini, aserfallatsaaliinissami aningaasaliinissamilu missingersuutit ilaatinneqarsinnaanissaat pingartinneqarpoq.

Kingusinnerusukkut malittarisassanik allanngortitsisoqassappat, Naalakkersuisut akuersinissaat pisariaqarpoq. Attaveqaasersuutinik inuiaqatigiinnut pingaarutilinnik politikkikkut nakkutilliinissamik pisariaqartitsinermut atatillugu, malittarisassanik qaqugukkulluunniit atuuttunik Naalakkersuisut ilisimasaqarnissaat, nakkutilliinissaallu aalajangersakkap qulakkiissallugu siunertaraa.

Malittarisassat allanngortinneqarnissaat pillugu ataatsimeersuarnermi aalajangiisoqartinnagu, malittarisassanik allannguinnissaq pillugu Naalakkersuisunit akuersissummik pissarseqqaarnissamik, siunnersuutip § 4-tigut Kalaallit Airports Holding A/S Mittarfeqarfiit A/S-imik piginnittutut pisussaaffilerneqarpoq. Aalajangersagaq ingerlatseqatigiiffiup malittarisassaanut aamma ilanngunneqassasoq naatsorsuutigineqarpoq.

§ 4-mi imm. 2-ssatut siunnersuutigineqartukkut, Naalakkersuisut akuersisimatinnagit Mittarfeqarfiit A/S kattussinnaanani arlalinngortitsisinnaanngilaq. Taamaalilluni Naalakkersuisut akuersiteqqaarnagit Mittarfeqarfiit A/S-imi kattussinikkut, arlalinngortitsinikkulluunniit allannguisoqarsinnaanngilaq. Kattuttoqassappat, arlalinngortitsisoqassappalluunniit Naalakkersuisut allakkatigut akuersissutaat pigineqaqqaassaaq.

Naalakkersuisut pigisat nalillit suliallu Mittarfeqarfiit A/S-imut akilleeqataassutigineqartut Mittarfeqarfiit A/S-imiiginnarnissaannik, aammalu Mittarfeqarfiit A/S-imit nakkutigineqaannarnissaannik paasisimaarinninnissaasa nakkutilliinissaasalu qulakkeerneqarnissaa aalajangersakkami siunertarineqarpoq.

Mittarfeqarfiit A/S-ip pigisaanut nalilinnut inatsisitigut sinaakkusiussat Naalakkersuisut akuersiteqqaarnagit allanngortinneqannginnissaat pingaaruteqarpoq. Kattussineq arlalinngortitsinerluunniit aqputigalugu piginnittuunerup imaluunniit pigisat nalillit suliallu, Mittarfeqarfiit A/S-imut akileeqataassutigineqartut allanngortinneqannginnissaat pingaaruteqarpoq.

Mittarfeqarfiit A/S-ip ingerlatseqatigiiffiup aqunneqarnerani qitiusumik suliassat, soorlu HR-ip, naatsorsuutit naatsorsuuserinerullu, sanaartukkat il.il. isumagineqarnissaat pillugu avammut isumaqatigiissuteqarsinnaanera aalajangersakkami mattunneqanngilaq.

Aalajangersagaq siunnersuummi § 5-imut atasutut isigineqassaaq.

§ 5-imut

§ 5-imi imm. 1-issatut siunnersuuteqarnikkut aalajangersarneqarpoq, napasuliat, terminalit, sulliviit allaffeqarfiillu, hangarit il.il. kiisalu aqquserngit nunaminertanullu piginnaatitaaffiit Mittarfeqarfiit A/S-imut akileeqataassutigineqartut Naalakkersuisut akuersisimatinnagit toqqaannartumik toqqaannanngikkaluartumilluunniit tunniunneqarsinnaassanngitsut, sivisunerusumik attartortinneqarsinnaassanngitsut, qularnaveeqqusiunneqarsinnaassanngitsullu.

Mittarfiit il.il. Mittarfeqarfiit A/S-imut akileeqataassutigineqartut inuiaqatigiinni attaveqaasersuutitut sanaartukkatut pingaarutilittut isigineqarput. inuiaqatigiinnut pingaaruteqassusaasa kingunerisaanik, Mittarfinnik il.il. tunniussinissamut, sivisunerusumik attartortitsinissamut imaluunniit qularnaveeqqusiissuteqarnissamut Naalakkersuisut sukkuunniit akuersisussaasut aalajangersakkami aalajangerneqarpoq. Tunniussineq, sivisunerusumik attartortitsineq imaluunniit qularnaveeqqusiissuteqarneq aqputigalugu piginnittuunerup imaluunniit mittarfinnik nakkutilliinermik allannguisoqannginnissaa pingaaruteqarpoq.

Mittarfiit, taakkunungalugu illuutit, orsussaarniarfiit attaveqaasersuutillu allat ilaasut aalajangersakkami pineqarput. Taamaalluni mittarfiit, taakkunungalugu ilaallutik napasuliat, terminalit, sulliviit allaffeqarfiillu, hangarit il.il. kiisalu aqquserngit nunaminertanullu piginnaatitaaffiit Mittarfeqarfinnit Mittarfeqarfiit A/S-imut akileeqataassutigineqartut ilaatigut pineqarput. Taamaalluni pigisat nalillit annertuut tamakkerlugit aalajangersakkami taaneqanngillat, Mittarfeqarfinniilli Mittarfeqarfiit A/S-imut akileeqataassutigineqarsimasunut illuutitut il.il. mittarfinnut attuumassuteqartunut pingaarnertut innersuussutitut isigineqassalluni. Pigisat nalillit mittarfinnut ataasiakkaanut atanngitsut aalajangersakkami ilaatinneqanngillat. Taamaalluni atorfinnut atatillugu inissiatut atorineqartarlutik illuutit imaluunniit atortut nuunneqarsinnaallutik mittarfinni ataasiakkaani atorineqartartut aalajangersakkami

ilaatinneqanngillat. Taamaalilluni atorfirmut atatillugu inissiatut atorneqartarlutik illuutit imaluunniit atortut nuunneqarsinnaallutik mittarfinni ataasiakkaani atorneqartartut, ataavartumik taarsersorneqartassasut pingaartinneqarpoq. Tamatumani saniatigut pigisat nalillit tamakkua pisiarineqarsinnaassasut pingaartinneqarpoq.

Mittarfeqarfiit A/S-imiit mittarfinnik il.il. atuisinnaatitaanermik piginnittumut nutaamut – tamakkiisumik ilaannakortumilluunniit – nuussinissanik sunilluunniit siunertaqarfiusut kinguneqartulluunniit »Tunniussinertut« isigineqarput.

Mittarfinnik, illuutinik il.il. atasunik tunisinerit, »toqqaannartumik tunniussinertut« isigineqarput.

Mittarfeqarfiit A/S-ip piginneqataassusiinik sunilluunniit tunniussinertut, »toqqaannangitsumik tunniussinertut« isigineqarput. Assersuutigalugu Mittarfeqarfiit A/S-imi taasisinnaatitaanerit qularnaveeqqusiunneqarnerat toqqaannangitsumik tunniussinerusinnaavoq.

Assersuutigalugu timmisartut nunamiisillugit sullinneqarnissaanni hangarinik atuisinnaatitaanerit tunniunneqarallarneqarneri aalajangersakkami ilaatinneqanngillat, taamaattoq tulliuuttumi sivisunerusumik attartortitsineq pillugu takuuk.

Tassunga atatillugu »sivisunerusumik attartortitsineq« pineqartillugu, ukiut marluk sinnerlugit attartortitsinissamik isumaqatigiissutit pineqarput.

Mittarfinnik, taakkunungalu atasunik illuutinik, sanaartukkanik il.il. tunniussinissaminik, sivisunerusumik attartortitsinissaminik imaluunniit qularnaveeqqusiinissaminik Mittarfeqarfiit A/S kissaateqassappat, aalajangiisoqartinnagu Naalakkersuisut allakkatigut akuersissutaat pissarsiarineqaaqqaassaaq. Illuutit il.il. sordiaat tunniunneqarnissaannik, sivisunerusumik attartortinneqarnissaannik imaluunniit qularnaveeqqusiunneqarnissaannik kissaatigineqartut kiisalu tunniussinermi, attartortitsinermi imaluunniit qularnaveeqqusiinermi piumasaqaatit ersarinnerusut qinnuteqarnermi nassuiaatigineqassapput.

§ 5-issatut siunnersuummik unioqutitsilluni tunniussinertut Kalaallit Nunaanni Namminersorlutik Oqartussanut atuuttussanngortinneqarsinnaanngillat, taamatullu tunniussisup pisisulluunniit tunniussineq Mittarfeqarfiit A/S-imut allanulluunniit atuuttussanngortissinnaanngikkaa.

§ 5-imi imm. 2-ssatut siunnersuuteqarnikkut, imm. 1-imi taaneqarlutik pigisat nalillit, Naalakkersuisut akuersinerisigut qularnaveeqqusiunneqarsimanngippata, akiitsoqarfinit malersorneqarsinnaassanngillat.

Akiitsoqarfiit malersuinerisigut piginnittuunerup imaluunniit timmisartunut mittarfinnik il.il. Mittarfeqarfiit A/S-imit pigineqartunik nakkutilliinerup allanngortinneqannginnissaat pingaaruteqarpoq.

§ 5-imi imm. 1-imi taaneqarlutik pigisat nalillit ilaat akiitsoqarfinnit malersorniarneqassappata, § 5-imi imm. 1 naapertorlugu qularnaveeqqusiussap allakkatigut akuersissutaasimanissaa, akiitsoqarfiit malersuiniarnerini tunngaviussaaq.

»Akiitsoqarfiit malersuinerini« ataasiakkaanik malersuinerit kiisalu tamakkiisumik malersuinerit pineqarput.

§ 6-imit

§ 6-issatut siunnersuuteqarnikkut, aningaasaatinik piginneqataassutsit Mittarfeqarfiit A/S-imit Kalaallit Airports Holding A/S-imit tunniussinissaannik Naalackersuisut piginnaatinneqarput. Isumaqatigiissuteqarnikkut imaluunniit aningaasaatit qaffannerinut atatillugu akiliutitigut tunniunneqassapput.

Mittarfeqarfiit A/S pilersinneqarpat, ingerlatseqatigiiffimmi pigisat nalillit Kalaallit Airports Holding A/S-imit tunniunneqassasut naatsorsuutigineqarpoq. Tunniussineq taanna ataatsimut isigalugu inatsimmut tunngavissiivoq. Aaningaasaatinik piginneqataassutsinik tamanik Mittarfeqarfiit A/S-imit tunniussinerussaaq. Taamaalilluni Mittarfeqarfiit A/S-imit tamakkiisumik nakkutilliineq Naalackersuisunit Kalaallit Airports Holding A/S-imit tunniunneqassaaq.

Taamaalilluni mittarfinnik ingerlatsinermi pisariillisaanissami naatsorsuutigineqartumi pisortat mittarfii il.il. tamarmik ataatsimut ingerlanneqassasut siunnerfigineqarpoq. Taamaalilluni Mittarfeqarfiit A/S-ip pilersinneqarnerata malitsigisaanik, Mittarfeqarfiit A/S Kalaallit Airportsimi immikkoortortaqaqfinngorlugu, Mittarfeqarfiit A/S-imi aktiaatit tamakkerlugit Kalaallit Airports Holding A/S-imit tunniunneqassapput.

Isumaqatigiissuteqarnikkut imaluunniit aningaasaatit qaffannerinut atatillugu akiliutitigut tunniunneqassanersut Naalackersuisut aalajangissavaat.

Aningaasaatinik piginneqataassutsinik tunniussereernerup kingorna, Kalaallit Nunaanni mittarfiit il.il. tamarmik ataatsimut ingerlanneqarnissaat aqunneqarnissaallu anguniarlugu, ingerlatseqatigiiffiit akuusut akornanni suleqatigiinnissamik isumaqatigiissutissat pisariaqartinneqartut Kalaallit Airports Holding A/S-ip qulakkiissavai.

§ 7-imut

§ 7-imi imm. 1-issatut siunnersuuteqarnikkut pigisat nalillit, ingerlatallu Mittarfeqarfiit A/S-imut akileeqaataassutigineqanngitsut siunissami ingerlanneqarnissaat, aserfallatsaalineqarnissaallu pillugit aalajangiinissaannut Naalakkersuisut piginnaatinneqarput.

Pigisat nalillit suliallu, mittarfinnik ingerlatsinermut attuumassuteqanngitsut qanga pisimasoq pequtugalugu, taamanilu suliassat suliffeqarfimmut nammineertitamut Mittarfeqarfinnut inissinneqarnissaat naapertuummat, Mittarfeqarfinnit nammineertitami isumagineqarput. Assersuutigalugu Kangerlussuarmi, Narsarsuarmilu nukimmik imermillu pilersuineq suliffeqarfiup nammineertitap Mittarfeqarfiit massakkut isumagisaraa.

§ 2-mi imm. 1-issatut siunnersuutigineqartoq tunngavigalugu, takuuk § 3-mi imm. 1-issatut siunnersuutigineqartoq, suliffeqarfiup nammineertitap Mittarfeqarfiit ilaannaa Mittarfeqarfiit A/S-imut akileeqaataassutigineqarnissaanut Naalakkersuisut piginnaatinneqarput, taamaalillunilu ingerlatat ilaat suliffeqarfimmi nammineertitami Mittarfeqarfinni ingerlaannassasut Naalakkersuisut toqqarsinnaavaat. Taassuma kingorna suliffeqarfik nammineertitaq Mittarfeqarfiit atorunnaassasoq naatsorsuutigineqarpoq, nunaminertallu atugassiissutigineqartut ilanngullugit pisigisat nalillit, ingerlatallu Namminersorlutik Oqartussaniiginnassapput.

Pigisat nalillit suliallu, Mittarfeqarfiit A/S-imut akileeqaataassutitut atorineqanngitsut allannguuteqartinneqaratik tunngaviusumik Namminersorlutik Oqartussanit isumagineqassapput. Taamaalilluni tamatuma kingunerisaanik ingerlatat ingerlateqqinneqassasut naatsorsuutigineqarpoq, Mittarfeqarfimmi ingerlatat, pigisallu nalillit isumagineqarnerini aserfallatsaalineqartarnerinut naapertuuttumik aserfallatsaalineqartassasut naatsorsuutigineqarluni. Suliassat naalakkersuinikkut inissiffissaat pillugu Naalakkersuisut aalajangiissapput.

Taamaalilluni eqqagassalerineq kiisalu imiup mingunnikup suliassartaa kommunitut tunniunneqarsinnaavoq, umiarsualivinnillu nakkutilliineq KNI-mut tunniunneqartariaqarluni. Innaallagissamik, imermik, kiammillu pilersuineq Nukissiorfimmu tunniunneqassaaq. Kangerlussuarmi eqqaavissuup annertusiartuinnarneranut ingerlanneqarneranullu kommuni sunnuteqarnikuunngimmat, eqqaavissuarmillu torersaaseqquneqassanngimmat, eqqaavissuaq Namminersorlutik Oqartussanut tunniunneqassaaq.

§ 7-imi imm. 2-ssatut siunnersuuteqarnikkut pigisat nalillit, ingerlatalluunniit Mittarfeqarfiit manna tikillugu ingerlatsinerani ilaasut namminersortunut, pisortalluunniit immikkoortortaannut tunniussinissaannik Naalakkersuisut piginnaatinneqarput, tunniussinermullu atatillugu

inuiaqatigiinnut angallannermullu eqqarsaatigisassat isumagineqarnissaannut Naalakkersuisut piumasqaatinik aalajangersaasinnaalluni.

Taamaalilluni pigisanik nalilinnik sulianilluunniit Mittarfeqarfiit A/S-imut akileeqataassutigineqanngitsunik allanut tunniussisinnaanissaannut piginnaatinneqarput.

Pigisanut nuunneqarsinnaanngitsunut, pigisanullu aalaakkaasunut maannamut suliffeqarfiup nammineertitap Mittarfeqarfiit ingerlanneqarnerinut ilaatinneqartut piginnaatitsissummi pineqarput. Assersuutigalugu Kangerlussuarimi akunnittarfiit unnuisarfiillu Mittarfeqarfiit A/S-imut akileeqataassutigineqanngippata, taakkuninnga tunisinissamut piginnaatitsissut tunngassuteqarsinnaavoq.

»Namminersortut, pisortalluunniit immikkoortortaat« tassaapput assersuutigalugu suliffeqarfiit namminersortut, pisortat suliffeqarfiutaat, pisortanilu oqartussat.

Tunniussisoqassappat tamatumunnga atatillugu Naalakkersuisut inuiaqatigiinni angallannikkulluunniit eqqarsaatigisassat isumagineqarnissaannut piumasqaatinik immikkut ittunik aalajangersaasinnaapput.

»Inuiaqatigiit angallannerluunniit eqqarsaatigalugit isumagineqarnissaanni piumasqaatit« pineqartillugit, nunami attaveqaasersuutitut pingaarutillit imaluunniit inuiaqatigiinni immikkut soqutigisat isumagineqarnissaannik siunertaqartumik piumasqaatit pineqarput. Unnuisarfinnik tunisisoqassappat, unnuisarfiit angallannermut ilaaginnarnissaannut qulakkeeriffiusunik assersuutigalugu piumasqaasiortoqarsinnaavoq. Tamatuma saniatigut takornarialerinemik inuussutissarsiornerup ineriartortinneqarneranut unnuisarfiit ilanngunneqarsinnaanerinek qulakkeerinniffiusunik piumasqaasiortoqarsinnaavoq. Assersuutigalugu piginnaasanik aalajangersimasunik, akinik, piffissanik ammasarfinnik, Namminersorlutik Oqartussat pisinissamut piginnaatitaaffeqarnerannik/pisinissamut salliutinneqarnerannik atuutsitsiinnarnissamut piumasqaatinik aalajangersaasoqarsinnaavoq.

§ 7-imi imm. 3-ssatut siunnersuuteqarnikkut, Mittarfeqarfiit ingerlatsinerani ingerlanneqarsimasunik kommuni tigusinissaanik Naalakkersuisut peqqusisinnaapput. Nammagassat suliassallu agguataarneqarnerat pillugu Namminersorlutik Oqartussat kommunillu akornanni isumaqatigiissummut atuuttumut naapertuuttumik tunniussineq pissaaq.

Suliassat ullumikkut suliffeqarfimmit nammineertitamit Mittarfeqarfinnit isumagineqartut, kommunillu suliassanut nalinginnaasunut ilaasut kommuninut tunniunneqassapput.

Namminersorlutik Oqartussanut kommuninullu aningaasaqarnikkut kingunerisassat ukiumoortumik kommuninut ataatsimoorussamik tapiissutit pillugit isumaqatigiissutinut ilaassapput.

Kangerlussuarmi Narsarsuarmilu eqqagassalerineq suliffeqarfiup nammineertitap Mittarfeqarfiit ilaatigut isumagisaraa. Suliassaq taanna Qeqqata Kommunianit kiisalu Kommune Kujallermit isumagineqassasoq naatsorsuutigineqarpoq.

Kangerlussuarmi eqqaavissuaq Qeqqata Kommunianut tunniunneqassasoq siunertaanngilaq. Narsarsuup siunissaa pillugu suleqatigiissitap sulinera naapertorlugu, Narsarsuarmi eqqaavissuaq Kommune Kujallermit tunniunneqassasoq naatsorsuutigineqarpoq.

§ 8-mut

§ 8-mi imm. 1-issatut siunnersuuteqarnerup kingunerisaanik, ingerlatseqatigiiffiup malittarisassai naapertorlugit Mittarfeqarfiit A/S ingerlatsivimmik ingerlatsissaaq.

Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piumasaqaatit pillugit Inatsisartut inatsisaanni § 15-imi imm. 1-imi Kalaallit Airports-ip suliaanut maleruagassiap aalajangersagaq assigaa.

Tassani suleqatigiinnerup annertunerpaanissaa aammalu pissarsiassaasinnaasut atorluarneqarnissaat qulakkeerniarlugit Mittarfeqarfiit A/S-ip aamma Kalaallit Airports Holding A/S-ip suliaannut tunngaviusut ataqatigiinnissat pingaartinneqarpoq.

Mittarfeqarfiit A/S inatsisinut atuuttunut allanut ilaatinneqassaaq, taakkununngalu unammilleqatigiinnermut inatsit ilaatinneqarpoq. Mittarfeqarfiit A/S suliffeqarfiit allat assigalugit ilaatinneqassapput, assersuutigalugu qaffasissumik atorfeqarnermik atonerluinissamut inerteqquteqarnermut.

§ 8-mi imm. 2-ssatut siunnersuuteqarnikkut, niuerfiit imaluunniit suliassat avataaniit isumagineqartussanngorlugit Mittarfeqarfiit A/S-ip suliakkiissutigisinnava.

Kalaallit Airportsip ingerlatsinerata malittarisassiuunneqarneranut aalajangersagaq naapertuuppoq, takuuk Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piumasaqaatit pillugit Inatsisartut inatsisaammi § 15-imi, imm. 2.

Sapinngisamik annertunerpaamik suleqatigiinnissaq, pisariillisaanissamillu periarfissap atorluarneqarnissaa qulakkeerumallugu, Mittarfeqarfiit A/S-ip kiisalu Kalaallit Airports Holding A/S-ip ingerlatsinerini tunngavissat assigiissuseqassasut pingaartinneqarpoq.

Taamaalilluni ingerlatsinerimi aningaasaqarneq, allaffissorneq, piginnaasat il.il. patsisaallutik suliaasat pisortanut, namminersortunulluunniit Mittarfeqarfiit A/S-ip suliakkiutigisinnaavai.

§ 9-mut

§ 9-mi imm. 1-issatut siunnersuuteqarnikkut aalajangersarneqarpoq, ingerlatseqatigiiffiup mittarfiinik atuinerimi akigititassanik Mittarfeqarfiit A/S aalajangersaassasoq.

Timmisartuutileqatigiiffiit mittarfimmik atuineranut attuumassutilimmik akigititanut aalajangersagaq taamaallaat tunngavoq. Assersuutigalugu aallarnermi minnermilu akigititat, uninnganermi akigititat, ammatitsinerimi akigititat kiisalu orsersornermut, sullinneqarnermut aqutsinermullu akigititat aalajangersakkami ilaatinneqarput. Mittarfeqarfiit A/S-ip suliaanut allanut akigititassat aalajangersarneqarnissaat aalajangersakkami ilaatinneqanngillat.

§ 9-mi imm. 2 naapertorlugu, Mittarfeqarfiit A/S-ip tamakkiisumik ingerlatsinera kiisalu § 3-mi imm. 2-mi kiisalu § 8-mi imm. 1-imi tunngavissanut naapertuuttumik, ingerlatseqatigiiffiup mittarfiutaanik atuinerimi akigititassat, akigititassanullu tunngavissat aalajangersarneqassapput.

Taamaalilluni Mittarfeqarfiit A/S-ip tamakkiisumik ingerlatsinera tunngavigalugu niuerneramik tunngaveqartumik, ingerlatseqatigiiffiullu malittarisassaanut naapertuuttumik akigititat aalajangersarneqassapput.

Mittarfeqarfiit A/S niuerneramik tunngaveqarluni akigititanik, akigititanullu tunngaviusunik aallaavittut aalajangersaasassaaq. Akigititat akigititanullu tunngaviusut aalajangersarneqarnerini ingerlatseqatigiiffiup pisussaaffini tamakkerlugit naammassisinnaassagai naatsorsuutigineqarpoq. Taamaakkaluartoq akigititanik aalajangersaanermi kiffartuussineramik isumaqatigiissutit, Naalakkersuisunut isumaqatigiissutigineqartut eqqarsaatigineqartassapput, takuuk siunnersuummi § 10.

Niuerfinnut ataasiakkaanut tamanut akigititanik aalajangersaasoqarsinnaavoq. Mittarfeqarfiit A/S-ip suliaat tamarmik niuerneramik tunngavilimmik ingerlanneqarlutik, niuerfinnut ataasiakkaanut akigititat katiterneqassapput.

§ 9-mi imm. 3-ssatut siunnersuuteqarnikkut, naatsorsuutitut nalinginnaasumik tunngavissat naapertorlugit Mittarfeqarfiit mittarfinnut ataasiakkaanut naatsorsuusiortulunilu missingersuusiortassaaq, mittarfiillu ataasiakkaat akuerisaallutillu sullissiviusinnaanerit pisariaqarlutik nalinginnaasumik ingerlatsineq, aserfallatsaaliineq aningaasaliinerillu naatsorsuutini missingersuutini ilaatinneqartassallutik.

Mittarfeqarfiit A/S suliassaqarfiup iluani mittarfinnut ataasiakkaanut naatsorsuusiornissaanut, missingersuusiornissaanullu aalajangersakkatigut pisussaaffilerneqarpoq, mittarfinilu ataasiakkaani isertitat aningaasartuutillu eqqortumik takussusiorneqarnissaannut tamanna qulakkeerinnissalluni. Mittarfiit ataasiakkaat akuerisaanissaannut sullissisinaanissaanullu pisariaqartunik aalajangiisoqarsinnaanissaa, naatsorsuutit missingersuutillu siunertaraat. »Akuerisaallutillu sullissiviusinnaanerit« ima paasineqassaaq, mittarfiit ataasiakkaat qanoq issusaat eqqarsaatigalugu Trafikstyrelsimit akuersissutaasut pigiinnarneqarsinnaassasut.

Mittarfeqarfiit A/S-ip akigititanut akigititanullu tunngaviusunut siunnersuusiorneranut, suliffeqarfiup iluani naatsorsuutit missingersuutillu tunngaviliissapput. Akigititassat akigititanullu tunngaviusunut siunnersuutit Naalackersuisut eqqartuinerini, akuersissuteqarnerinilu suliffeqarfiup iluani naatsorsuutit missingersuutillu aamma ilaatinneqassapput.

§ 9-mi imm. 4-ssatut siunnersuuteqarnikkut, aallarnermi akigititat, ilaasunut akigititat, isumannaallisaanermi akigititat, uninnganermi akigititat, ammatitsinermilu akigititat, taakkunanilu allannguutit kiisalu akikillilerutinut akiliuteqartitsinnginnissamullu tungaviit Naalackersuisunit akuersissutigineqartassapput, tassungalu atatillugu akigititanik, akigititanullu tunngavinnik akuersissuteqarnermut atatillugu Naalackersuisunit pingaarutilittut isigineqartut pillugit Mittarfeqarfiit A/S-ip Naalackersuisunut nalunaarutigisassallugit.

Timmisartuq mittarfimmik atuisussaattillugu mittarfimmik ammatitsisoqartarpoq, timmisartuq aallartarpoq, timmisartuni ilaasoqartarpoq, mittarfinni ataasiakkaani timmisartuq qulimiguulillu inissinneqartarpoq, isumannaallisaasoqartarlunilu. Mittarfinnik ataasiakkaanik atuisunit akigititat akilerneqartarput (nalinginnaasumik timmisartortitseqatigiinnit).

Taamaalilluni Mittarfeqarfiit A/S-ip mittarfiutaanut akigititat, akigititanullu tunngaviusut Naalackersuisunit akuerineqartassapput.

Aallarnermi akigititat, ilaasunut akigititat, isumannaallisaanermut akigititat, uninnganermi akigititat, ammatitsinermilu akigititat kiisalu akikillilerutinut (akigititat appartitat) akiliuteqartitsinnginnissamullu tungaviitaalajangersakkami kisimik pineqarput. Taasasat tamakkerneqarput. Taamaalilluni Mittarfeqarfiit A/S-ip akigititassanut malittarisassanik

aalajangersaanerminut atatillugu, akigititanut akuerineqarsimasunut akikillilerutit akiliuteqartitsinnginnissanullu aalajangersakkat ilanngussinnaavai. Taamaattoq Mittarfeqarfiit A/S-ip suliaanut allanut akigititassat, soorlu sullissinernut timmisartullu nunamiinnerini sullissinermi akigititat aalajangersarneqarnissaat aalajangersakkami ilaatinneqangillat. Silaannakkut angallassineq pillugu inatsisip § 55-iani imm. 2 kiisalu § 60 naapertorlugit tunniunneqarlutik Mittarfeqarfiit A/S-ip akuersissuteqarluni ingerlataanut akigititassatut toqqarneqartut tunngassuteqarput. § 9-mi imm. 4 naapertorlugu akigititani, taakku pillugit manna tikillugu suleriaasiusoq naapertorneqarpoq.

Inatsisissatut siunnersuummi matumani sinaakkusiussat iluini akuersineq pisassaaq. Taamaalilluni akigititassatut akigititassanulluunniit tunngaviusut siunnersuutit § 3-ani, imm. 2-anut kiisalu § 8-mi imm. 1-ianut naapertuuttut akuerinissaannut Naalakkersuisut itigartitsisinnaangillat. Ingerlatseqatigiiffiup soqutigisaanit allaanerusunik siunertaqarfiusunik malinniffiusunilluunniit akigititanik, akigititanulluunniit tunngaviusunik akuersinissamut Naalakkersuisut Mittarfeqarfiit A/S-imut peqqusisinnaangillat, taamaattorli § 9-mi imm. 5-issatut siunnersuutigineqartoq takuuk.

Akuersissummut atatillugu Mittarfeqarfiit A/S-ip akigititassatut, akigititanullu tunngavissatut aalajangersarsimasassa akuerineqarnissaanni paasissutissatut pisariaqartutut Naalakkersuisunit nalilerneqartut tamaasa Mittarfeqarfiit A/S-ip Naalakkersuisunut tunniuttassavai. Mittarfinnut ataasiakkaanut naatsorsuutaasinnaallutillu, missingersuutaasinnaapput.

Mittarfiit pillugit Inatsisartut inatsisaanni nr. 12-imi, 5. December 2008-meersumi § 8 naapertorlugu akigititat, akigititanullu tunngaviusut maleruagassiuunneqarunnaarnissaanik aalajangersagaq kinguneqassaaq, Mittarfeqarfiit A/S-illi mittarfiinut taakku immikkut aalajangersarneqassallutik.

§ 9-mi imm. 5 naapertorlugu, § 9-mi imm. 4 naapertorlugu akigititat allanngortinneqarnissaannik Naalakkersuisut piumasaqaasiorsinnaassapput.

Aallarnermi akigititat, ilaasunut akigititat, isumannaallisaanermut akigititat, uninnganermi akigititat, ammatitsinermilu akigititat kiisalu akikillilerutinut (akigititat appartitat) akiliuteqartitsinnginnissamullu tungaviit aalajangersakkami kisimik pineqarput. Taamaattoq Mittarfeqarfiit A/S-ip suliaanut allanut akigititassat, soorlu sullissinernut timmisartullu nunamiinnerini sullissinermi akigititat aalajangersarneqarnissaat aalajangersakkami ilaatinneqangillat.

Niuernermik tunngaveqanngitsumik akigititanik aaqqissuuseriaatsimik pilersitsisoqarnissaanik, attassiinnarnissamilluunniit politikikkut kissaatigineqassappat, Namminersorlutik Oqartussat

ingerlatseqatigiiffimmut akiliutaasigut Mittarfeqarfiit A/S-ip isertitassatigut annaasai matussusersinnaangorlugit, tamanna kiffartuussinissamik isumaqatigiissummi malittarisassiuunneqarsimasariaqarpoq, takuuk siunnersuutip § 3-ani imm. 2-mi, § 8-ni imm. 1-imi kiisalu § 9-ani imm. 1-imi 2-milu tunngaviit.

§ 9-mi imm. 6-issatut siunnersuuteqarnikkut, Naalakkersuisut akigititanik akuersissuteqarnissaanik, akigititanillu allannguinerit pisortat akitsuutaannik akileraarutaannilluunniit allannguinerinut tunngassuteqarpata akigititanik allannguinnissamik piumasaqaasiorsinnaanerini, akigititanut allannguutit ilaat ilaatinneqanngillat. Tamatuma saniatigut Kalaallit Nunaanni atuinermik nalilersuisarneq malillugu, Naalakkersuisunut saqqummiussinertaqanngitsumik akigititat ukiumut naleqqussarneqarsinnaanissaat aalajangersakkap qulakkiissavaa.

§ 10-mut

§ 10-mi imm. 1-issatut siunnersuuteqarnikkut, ingerlatseqatigiiffiup mittarfinni ingerlatsineq, aserfallatsaaliineq, aningaasaliinissarluk pillugit mittarfinni pineqartuni ingerlatsinerup attatiinnarneqarnissaanik Naalakkersuisut Mittarfeqarfiit A/S kiffartuussinissamik isumaqatigiissusiornikkut pisussaaffilersinnaavaa. Kiffartuussinermik isumaqatigiissutit niuernerimik tunngaveqassapput.

Mittarfiit Mittarfeqarfiit A/S-imut akileeqaataassutigineqartussat amerlanersaat ukiumi arlaqartuni amigartooruteqarfiullutik ingerlanikuupput. Ingerlatsinerimut, aserfallatsaaliuinerimut, mittarfiillu akuerisaallutik sullissiviusinnaallutillu attatiinnarneqarnissaasa qulakkeerneqarnissaannut isertitat matussusiinnaasimangillat.

Ilaatigut Kangerlussuarmi Nuummilu mittarfiit ingerlanneqarnerini sinneqartoorutit aqputigalugit mittarfinni amigartoorutit aningaasalersorneqartarsimapput. Tamatuma saniatigut aningaasanut inatsit aqputigalugu suliffeqarfimmi nammineertitami Mittarfeqarfinni sanaartornerimut aningaasaliissutissanik aningaasaliisoqartarsimavoq. Kiisalu Mittarfeqarfiit Nunap Karsiani sinniilluni tiguisinnaatitaavoq, suliffeqarfiup isertitaasa allanngorarneri apeqqutaatillugit annertunerusumik annikinnerusumilluunniit atorneqartartumik.

Mittarfeqarfiit A/S niuernerimik tunngaveqarluni ingerlanneqassaaq, takuuk § 3-mi imm. 2-ssatut siunnersuutigineqartoq. Tamatuma kingunerisaani mittarfiit ammatiinnarneqarnissaannut niuernerimik tunngavissaqassanngimmat, mittarfippaalunni ingerlatsineq aserfallatsaaliinerlu attatiinneqarsinnaassanngilaq. Kiffartuussinissamik isumaqatigiissusiornikkut mittarfinnik

ingerlatsinerup attatiinnarneqarnissaanik Naalakkersuisut pisussaaffiliisinaanissaat , alajangersakkatigut tassuuna tunngavissiisoqarpoq. Ingerlatsineq, malitsigisaanillu mittarfinni aserfallatsaaliinissaq aningaasaliinissarluk kiffartuussinissamik isumaqatigiissummi ilaatinneqarsinnaapput. Mittarfiit amigaartoorutaasartut inuiaqatigiinnut pingaaruteqarmata taamatut ilineqarpoq. Kiffartuussinermi isumaqatigiissutit niuernermik tunngaveqassapput.

Mittarfeqarfiit A/S-ip Naalakkersuisullu akornanni kiffartuussinermik isumaqatigiissutit kiffartuussinermik isumaqatigiissutinut allanut, konto pingarneq 72.20.05 Ilaasunik angallassinermut tapiissutit naapertorlugu Naalakkersuisut angallannermilu sullissisut akornanni isumaqatigiissutigineqartunut naleqqussarneqassaaq, taamaalillunilu Mittarfeqarfiit A/S-imut kiffartuussinermik isumaqatigiissutit angallannerup ilusianut tamarmiusunut tapertaassalluni.

§ 10-mi imm. 2-ssatut siunnersuuteqarnikkut kiffartuussinermik isumaqatigiissutit ukiuni arlalinni atuuttussatut isumaqatigiissutigineqarsinnaapput, tassuunakkullu ingerlatseqatigiiffimmi mittarfiit attaveqaasersuutinut tamanut, matumani pisortat inunnik angallassinerat, nassiussanillu assartuinerat isumagissallugu Naalakkersuisut ingerlatseqatigiiffiullu akornanni kiffartuussinissamik isumaqatigiissutaasut qaqugukkulluunniit ilaatinneqarsinaanissaat, tunngavileeqataasinnaanissaallu qulakkeerneqassalluni.

Tassunga atatillugu »ukiunut arlalinnut« ima paasineqassaaq, piffissaq isumaqatigiissusiorfissatut illuatungeriit isumaqatigiissutigisaattut, aningaasanullu inatsisitigut Naalakkersuisut aningaasaliissutissaqartillugit Mittarfeqarfiit A/S-ip Naalakkersuisullu akornanni kiffartuussinissamik isumaqatigiissusiortoqarsinnaasoq. Mittarfinni ataasiakkaani angalasussatut naatsorsuutigineqartut ilutigisaanik, kiffartuussinissamik isumaqatigiissutit atuuffissaat aamma nikerarsinnaavoq.

Kiisalu *§ 10-mi imm. 3*-ssatut siunnersuutip kingunerisaanik ingerlatsineq, aserfallatsaaliineq, aningaasaliinerlu ilanngunneqarlutik mittarfinnut ataasiakkaanut ukiunut arlalinnut missingersuutit tunngavigalugit kiffartuussinissamik isumaqatigiissutit isumaqatigiissutigineqassapput, kiffartuussinermilu isumaqatigiissutit atuuffissaata sivisoqataanik missingersuutit ukiunut arlalinnut suliarineqassallutik.

§ 11-mut

§ 11- issatut siunnersuuteqarnikkut, ingerlatsiviup mittarfiinut il.il. aningaasaliinissami aningaasaliinissamut immikkut pisariaqartitsineq, taakkualu aningaasalersorneqarnissaat pillugu niuernermik tunngaveqartumik isumaqatigiissusiornissaannik Naalakkersuisut Mittarfeqarfiit A/S pisussaaffilersinnaavai. Aalajangersagaq manna malillugu isumaqatigiissutinut,

kiffartuussinissamik isumaqatigiissutinut § 10-mi imm. 2-mi 3-milu piunasaqaatit assinganik atuutissapput.

Mittarfinni il.il. Mittarfeqarfiit A/S-imut akileeqataassutigineqartussani nutarterinissami kinguaattoorutit aalajangersakkami ilaatigut siunnerfigineqarput.

Suliffeqarfimmut nammineertitamut Mittarfeqarfinnut 2020-mut ukiumoortumik nalunaarusiami iluarsaassinermi kinguaattoorutit pillugit imatut allassimasoqarpoq:

»Aserfallatsaaliuinermi kinguaattoorutit naatsorsuiffigineqartut 31.12 2020-mi 1.044,7 mio. koruuninik naleqarput.

Aserfallatsaaliuinermi kinguaattoorutit ukiuni ataasiakkaani nalikilliliinerit aningaasaleeqqinnerillu akornanni assigiinnigissutaasunut naleqqiussinikkut naatsorsorneqarput. Tassalu matumani aningaasaliinissamut pisariaqartitarpiaat, piffissami taaneqartumi akiligassanngortussat, imaluunniit aningaasaliiffissat pisariaqartut tamatigut salliuinneqartarmata, taakkulu sanaartornermut aningaasaliissutit aqutugalugit aningaasalersorneqartarmata mittarfinni isumannaallisaaneq eqqarsaatigalugu isumannaatsumik aserfallatsaaliorneqarsimanngitsut pineqanngillat.

Sanaartornermut aningaasaliissutit mittarfinni avatangiisit atortullu pisariaqartinneqartumik pitsaassuseqartinneqarnissaannik atuutsitsiinnarnissamut tapertaassapput. Kisiannili ukiumut nalikilliliinerit, aningaasaleeqqinnissamut pisariaqartitsinermit takussutissaasut, mittarfinni avatangiisit atortullu pitsaassusiisa attatiinnarnissaannut pisariaqartut sanaartornermut aningaasaliissutaasunit naleqarnerungaatsiarmata, mittarfinni avatangiisaasut atortullu aserfallangaatsiarsimani matumani pineqarpoq. Tamanna Mittarfeqarfinnut siunissamut ungasissumut annertuumik unammillernartuusussaavoq.«

Naalakkersuisunut ersarinnerusumik isumaqatigiissuteqarnikkut, aserfallatsaaliinissami kinguaattoorutit aningaasalersorneqarnissaannut piffissamut sivilunerusumut ingerlatsiviup taarsigassarsisinaanissaanut aalajangersagaq periarfissiivoq.

Taamaalilluni mittarfinni Mittarfeqarfiit A/S-imut akileeqataassutigineqartuni aserfallatsaaliinissami kinguaattoorutinut tunngassuteqartut, »aningaasaliinissamut immikkut pisariaqartitsineq« paasineqassaaq. Taamaakkaluortoq § 10 naapertorlugu kiffartuussinissamik isumaqatigiissummut ilaatinneqaratik annertuumik aningaasaliiffigineqarnissamik pisariaqartitsisut aamma pineqarsinnaapput.

Aningaasanut inatsit aqutigalugu, avataaniillu aningaasaliisoqarneratigut taarsigassarsisoqarsinnaavoq.

Tamatuma saniatigut aningaasaliinissamut immikkut pisariaqartitsinernut taarsigassarsiat assersuutigalugu erniatigut, akiliutitigullu tamakkiisumik ilaannakortumilluunniit matussuserneqarnissaannik Naalakkersuisut Mittarfeqarfiit A/S-imut isumaqatigiissusiorsinnaanissaannik aalajangersagaq aamma periarfissiivoq.

Tassunga tunngatillugu kiffartuussinissamik isumaqatigiissutinut § 10-mi imm. 2-mi 3-milu piumasaqaatit atuutissapput, taamaalillunilu isumaqatigiissutit taakkua ukiuni arlalinni atuuttussatut, mittarfinnullu ataasiakkaanut ukiunut arlalinnut missingersuutit tunngavigalugit isumaqatigiissutigineqarsinnaallutik.

§ 12-mut

§ 12-issatut siunnersuuteqarnikkut, § 2 naapertorlugu akileeqataassutigineqartut pillugit Naalakkersuisunit piumasaqaatigineqartillugu kisitsisit atorlugit paasissutissanik, assigisaanillu Mittarfeqarfiit A/S Naalakkersuisunut nassiussissaaq.

Mittarfiit, Mittarfeqarfiit A/S-imut akileeqataassutaasussat inuiaqatigiinni attaveqaasersuutit pingaarutilittut isigineqarput. Naalakkersuisuni naalakkersuisoqarfiup suliaasaanik isumaginninnissamut, tassungalu ilanngullugu kiffartuussinermik isumaqatigiissusiornissamut paasissutissanik tunngaviusunik sukumiisunik pisariaqartitsiviivoq. Taamaattumik Naalakkersuisut maannatut mittarfinni ataasiakkaani sulianik paasisimasaqarluarnissamik pisariaqartitsisussaapput.

Taamaattumik assersuutigalugu soorlu mittarnerit tingisarnerillu amerlassusiinut, taakkulu ukiup qanoq ilineranut agguarneqarnerinut, timmisartunut mittarfinnut ataasiakkaanut taakkunangaanniillu angalasut amerlassusiinik, taakkulu ukiup qanoq ilineranut agguarneqarnerinut paasissutissanik nassiussinissamut Naalakkersuisut Mittarfeqarfiit A/S-imut peqqusisinnaapput. Missingersuutitigut naatsorsuutitigullu paasissutissat aalajangersakkami aamma pineqarput. Allattorneqartut tamakkiisuunngillat. Attaveqaasersuutinut tunngatillugu Naalakkersuisoqarfimmut susasaqartumut nassiunneqassapput.

Paasissutissat suut nassiunneqartassanersut, qanoq akulikitsumik nassiunneqartassanersut, qanorlu ilusilerlugit nassiunneqartassanersut pillugit Naalakkersuisut Mittarfeqarfiit A/S-illu akornanni kiffartuussinissamik isumaqatigiissutini, takuuk § 10-ssatut siunnersuutigineqartoq, ersarissarneqassasoq naatsorsuutigineqarpoq.

§ 13-imut

§ 13-issatut siunnersuuteqarnikkut, § 2 naapertorlugu Mittarfeqarfinni ingerlatani Mittarfeqarfiit A/S-imut akileeqataassutigineqartuni sulisut Mittarfeqarfiit A/S-imi atorfinitsinneqassapput, tassanilu suliffeqarfinnik tunniussisoqartillugu sulisut inatsisitigut inissisimanerat pillugu Inatsisartut peqqussutaat atuutissalluni.

Sulisut, pigisanut sulianullu Mittarfeqarfiit A/S-imut akileeqataassutigineqartunut attuumassuteqartut ingerlatseqatigiiffimmi atorfinitsinneqassapput. Suliffeqarfinnik tunniussisoqartillugu sulisut inatsisitigut inissisimanerat pillugu Inatsisartut peqqussutaat sulisunut atuutissaaq. Taamaalilluni Mittarfeqarfiit Mittarfeqarfiit A/S-imut akileeqataassutigineqarneratigut sulisunut atorfinitsitaanermi atugassarititaasut aallaavittut ingerlaannassapput. Mittarfeqarfiit A/S-ip Kalaallit Airports A/S-illu sunniivigeqatigiissinnaanerata sapinngisamik atorluarnissaa ilaatigut siunertaralugu, ingerlatsinerup ineriartornermut naleqqussarnissaanut Mittarfeqarfiit A/S periarfissaqassaaq.

Suliffeqarfinni nammineertitami Mittarfeqarfinni tjenestemanditut atorfeqartoqanngilaq. Mittarfeqarfinni sulisut tamarnik isumaqatigiissutit naapertorlugit atorfeqarput.

§ 14-imut

§ 14-issatut siunnersuuteqarnikkut, mittarfiit ataasiakkaat ingerlanneqarnerinut ilaallutik mittarfinnik taakkunanilu napasulianik, terminalinik, sullivinnik allaffeqarfinnillu, hangarinik il.il. kiisalu aqqusinernik nunaminertanillu piginnaatitaaffiusunik kiisalu ingerlatsinermi atortunik pigisanillu aalaakkaasunik akileeqataassuteqarnermut atatillugu allagaatit, naqitat, uppersaatit il.il. suliarineqartut, pisortanut naqissusiinermut akitsuuserneqassanngillat.

Mittarfeqarfiit A/S Kalaallit Airports Holding A/S aqqutigalugu Namminersorlutik Oqartussanit pigineqassaaq. Pigisanik nalilinnik tamalaanik Mittarfeqarfinnit Mittarfeqarfiit A/S-imut tunniussinermi naqissusiinermut akitsuummik akiliinissaanik piunarsaqartoqarnerani, akiliisinnaassutsimut sillimmatitigut artukkeeqqinnissaaq siunertassaqqanngitsutut isigineqarpoq.

§ 15-imut

Inatsisip saqqummiunneqarnerata aqaguani inatsit atuutilissasoq siunnersuutigineqarpoq.

Suliffeqarfimmit nammineertitamit pigisat nalillit, ingerlatallu akileeqataassutigineqarnissaat siunertaralugu, taassuma kingorna Mittarfeqarfiit A/S-ip pilersinneqarnissaanut Naalakkersuisut iliuuseqassasut naatsorsuutigineqarpoq. Mittarfeqarfiit A/S 2023-p aallartinnerani pilersinneqarsinnaassasoq naatsorsuutigineqarpoq.

Ilanngussaq 1 - Tusarniaanermi allakkiaq

Mittarfeqarfiit A/S pillugu Inatsisissatut siunnersuut pillugu tusarniaanermi akissutit tiguneqartut pillugit allakkiaq

2021-mi decembarip 15-ianit 2022-mi januaarip 17-iata tungaanut Ineqarnermut Attaveqaasersuutinullu Naalakkersuisoqarfiup, Naalakkersuisut tusarniaaviatigut www.naalakkersuisut.gl-imi siunnersuut tamanut tusarniutigaa. Tamatuma saniatigut tulliuuttumi oqartussanut, kattuffinnut suliffeqarfinnullu siunnersuut tusarniutigineqarpoq:

Naalakkersuisut Siulittaasuata Naalakkersuisoqarfia, Nunanut Allanut Naalakkersuisoqarfik, Aningaasaqarnermut Naligiissitaanermullu Naalakkersuisoqarfik, Aatsitassanut Inatsisillu Atuutsinneqarnerannut Naalakkersuisoqarfik, Inuutissarsiornermut Niuernermullu Naalakkersuisoqarfik, Aalisarnermut Piniarnermullu Naalakkersuisoqarfik, Isumaginninnermut Sulisoqarnermut, Nunamullu Namminermut Naalakkersuisoqarfik, Ilinniartitaanermut, Kultureqarnermut, Timersornermut, Ilageeqarnermullu Naalakkersuisoqarfik, Peqqinnissamut Naalakkersuisoqarfik, Nunalerinermit, Imminut Pilersornermut, Nukissiutinut Avatangiisinullu Naalakkersuisoqarfik, Meeqqanut, Inuusuttunut, Ilaqutariinnullu Naalakkersuisoqarfik, Mittarfeqarfiit, Kalaallit Airports Holding A/S, Avannaata Kommunia, Kommune Qeqertalik, Qeqqata Kommunia, Kommuneqarfik Sermersooq, Kommune Kujalleq, SIK (Sulinermik Inuussutissarsiuteqartut Kattuffiat), Sulisitsisut (GE), Nukissiorfiit, Royal Arctic Line A/S, Sikuki Nuuk Harbour A/S, Tusass A/S, Air Greenland A/S, KNI A/S, Asiaq, Grønlandsbanken A/S, BankNordik, Deloitte Nuuk, Visit Greenland, Trafikstyrelsen, Kalaallit Nunaanni Politiit, Arktisk Kommando aamma Naviair.

1. Tulliuuttumi oqartussat, kattuffiit suliffeqarfiillu siunnersuummut oqaaseqaateqarput: Aningaasaqarnermut Naligiissitaanermullu Naalakkersuisoqarfik, Aatsitassanut Inatsisillu Atuutsinneqarnerannut Naalakkersuisoqarfik, Sulisitsisut (GE), Naviair, Kalaallit Airports Holding A/S, Trafikstyrelsen aamma Qeqqata Kommunia.
2. Tulliuuttumi oqartussat, kattuffiit suliffeqarfiillu siunnersuummut oqaaseqaateqanngillat: Arktisk Kommando, BankNordik, Meeqqanut, Inuusuttunut, Ilaqutariinnullu Naalakkersuisoqarfik, Aalisarnermut Piniarnermullu Naalakkersuisoqarfik aamma Kalaallit Nunaanni Politiit.
3. Tulliuuttumi oqartussat, kattuffiit suliffeqarfiillu tusarniummut akissuteqanngillat: Naalakkersuisut Siulittaasuata Naalakkersuisoqarfia, Nunanut Allanut Naalakkersuisoqarfik, Inuutissarsiornermut Niuernermullu Naalakkersuisoqarfik, Isumaginninnermut Sulisoqarnermut, Nunamullu Namminermut Naalakkersuisoqarfik, Ilinniartitaanermut, Kultureqarnermut, Timersornermut, Ilageeqarnermullu Naalakkersuisoqarfik, Peqqinnissamut Naalakkersuisoqarfik, Nunalerinermit,

Imminut Pilersornermut, Nukissiutinut Avatangiisinullu Naalakkersuisoqarfik, Mittarfeqarfiit, Avannaata Kommunia, Kommune Qeqertalik, Kommuneqarfik Sermersooq, Kommune Kujalleq, SIK (Sulinermik Inuussutissarsiuteqartut Kattuffiat), Nukissiorfiit, Royal Arctic Line A/S, Sikuki Nuuk Harbour A/S, Tusass A/S, Air Greenland A/S, KNI A/S, Asiaq, Grønlandsbanken A/S, Deloitte Nuuk, Visit Greenland.

Siunnersuummut oqaaseqaatit

Tusarniummut akissutit kiisalu Ineqarnermut Attaveqaasersuutinullu Naalakkersuisoqarfiup akissutinut oqaaseqaatai tulliuuttumi pingaarnersiorneqarput. Paasiuminarsaaniarluni tusarniummut akissutit tulliuuttumi sammisanut immikkoortitaapput.

1. Siunnersuummi taaguusersuineq
2. Kalaallit Airportsimut ilanngussinissaq siunertaralugu Mittarfeqarfiit pigisaat nalillit, ingerlataasalu aktianik piginneqatigiiffimmu Mittarfeqarfiit A/S-imut akileeqataassutigineqarnissaat
3. Suliffeqarfimmik tunniussinermi sulisunik tunniussineq
4. Pigisat nalillit suliallu akileeqataassutigineqanngitsut
5. Inuiaqatigiinni attaveqaasersuutinik pingaarutilinnik politikikkut nakkutilliineq
6. Aningaasalersuinissami, nutarterinissamilu kinguaattoorutit
7. Mittarfinnut Mittarfeqarfiit A/S-imut akileeqataassutigineqartunut teknikkikkut akuersissutinik nutarterineq
8. Mittarfeqarfiit A/S-ip mittarfiinut akigititanik aalajangersaaneq
9. Mittarfeqarfiit A/S-imut kiffartuussinissamik isumaqatigiissutit
10. Attaveqaasersuutinut tapiissutit
11. Missingersuutinut naatsorsuutinut inatsimmut attuumassutillit

1. Siunnersuummi taaguusersuineq

Naviair-ip oqaatigaa, §§ 5-imi 15-imilu »napasuliat nakkutilliiviusut« taaneqartut. Tassunga tunngatillugu Naviair-ip oqaatigaa, napasuliaq nakkutilliisoqartarluni napasuliaasooq, taamaalillunilu Kalaallit Nunaanni tamatumani Kangerlussuaq kisimi pineqassasooq. Kalaallit Nunaanni »AFIS-napasuliat« aalajangersakkani ilaatinneqassasut kissaatigineqassappat Naviair-ip siunnersuutigaa, »napasuliat« atorneqassasooq.

Tassunga tunngatillugu Ineqarnermut Attaveqaasersuutinullu Naalakkersuisoqarfiup oqaatigissavaa, Naviair-ip siunnersuutaanut naapertuuttumik inatsisissatut siunnersuut iluarsineqarmat, taamaalillunilu inatsisit oqaasertaani »napasuliat nakkutilliiviusut« innersuussutigineqartut.

Taamaalilluni tusarniummut akissut, siulianut naapertuuttumik inatsisissatut siunnersuummi allanguinissamut tunngavissiivoq.

2. Kalaallit Airportsimut ilanngussinissaq siunertaralugu Mittarfeqarfiit pigisaat nalillit, ingerlataasalu aktianik piginneqatigiiffimmu Mittarfeqarfiit A/S-imut akileeqataassutigineqarnissaat

Kalaallit Airports Holding A/S-ip (KAIR) oqaatigaa, Mittarfeqarfiit aktianik piginneqatigiiffinngortinneqarnissaanik, malitsigisaanillu Kalaallit Airportsimut ilanngunneqarnissaanik siunnersuut KAIR-ip tapersorsorlugu. KAIR-ip oqaatigaa, Kalaallit Nunaata iluani, avammullu timmisartunik angallassinermi periarfissap atorluarnissaa eqqarsaatigalugu, Mittarfeqarfiit kiisalu Kalaallit Airportsip kattunneqarneratigut Kalaallit Nunaanni mittarfinnik ingerlatsineq pisariinnerulerlunilu pitsaanerulissasoq. Tamatuma saniatigut KAIR naapertorlugu suliffeqarfiit taakkua marluusut akornanni sulisunik pilernguttussaatinngit, Kalaallit Nunaanni mittarfinnik ingerlatsinermi suliatigut piginnaasat pitsaanerulumik atorluarneqalissapput.

Sulisitsisut (GE) oqaatigaat, Kalaallit Nunaanni mittarfinnik ingerlatseqatigiiffik ataasiinnaaguni pitsaassasoq, tassungalu atatillugu Mittarfeqarfiit aktianik piginneqatigiiffinngortinnissaa GE-p paasisinnaagaa. GE-p oqaatigaa, Kalaallit Nunaanni ingerlatseqatigiiffinik, pingaartumillu suliffeqarfinni nammineertitani nalinginnaasumik ingerlatsineq siulersuisunit akisussaasunit toqqakkanit aqunneqarunik iluaqutaanerussasoq, tamannalu aktianik piginneqatigiiffinngortitsinermi ilaatigut anguneqarsinnaasoq. Taamaattumik Kalaallit Nunaanni mittarfinnik ingerlatsinerup siunissami aaqqissuusaaissaani, akisussaasunit ilisimasalinniillu siulersuisoqarlutik ingerlanneqarnissaat isumalluarnartoq.

Tassunga atatillugu siulersuisut attuumassutilinnik piukkunnaatilinnillu katitigaanissaasa pingaaruteqassusia GE-p erseqqissaatigerussupaa, pingaartumik isumannaassuseq, aarlerinarsinnaasunik aqutsineq malittarisassanillu malinninnissaq pingaaruteqarlutik taamatut ingerlatseriaaseqarnissaq pineqartillugu.

Qeqqata Kommuniata (QK) oqaatigaa, Mittarfeqarfiit pisortat pigisaanik aktianik piginneqatigiiffinngortinneqarnissaa pingaarnertut isumaqatigalugu. Taamaakkaluartoq QK isumaqarpoq, kommunini ataasiakkaani mittarfinnut kommunit piginneqataasariaqartut. Angallannermi attaveqaasersuutinut kommunit piginneqataasinnaanerinik Aaqqissuusaaanermut Isumalioqatigiissitap isumaliutissiissutaani siunnersuutigineqartoq siornatigut oqaluuserineqarsimanngimmat, siunnersuummilu matumani eqqarsaatigineqarsimarpasinngimmat QK-p ugguaraa. Qeqqata Kommuniani angallannermut attaveqaasersuutit pillugit aktianik piginneqatigiiffimmik pilersitsissalluni Qeqqata Kommuniani kommunalbestyrelsip 2018-p

qiteqqunnerani aalajangiismanera, QK-p innersuussutigaa. Ingerlatseqatigiiffik Namminersorlutik Oqartussanit QK-niillu pigineqartussaagaluarpoq, Namminersorlutik Oqartussallu pigineqataarusunngippata kommunimit kisimi pigineqartussaagaluarluni.

Tamatuma saniatigut QK-ata innersuussutigaa, nunap immikkoortortaasa ineriartortinneqarnissaannut mittarfiit aallaaviusut, mittarfinnillu piginnittut mittarfinnut qanimut malinnaatillugit ineriartortsineq pitsaaneruinnaasasoq, kommuni sinnerlugu Integra Holdingip misissueqqissaarnerata takutikkaa. Tamatuma saniatigut QK-ata innersuussutigaa, kommunit piginnittuusarnerat (piginneqataasarnerat) assersuutigalugu Danmark-imi nalinginnaaleraluttuinnartoq.

QK-ata oqaatigaa, pisortani piginnissinnaasut amerlanerunissaannik Kalaallit Airports International A/S (KAIR int.) ammaassisimasoq, tamatumalu kingunerisaanik aktianik piginneqatigiiffiup aaqqissuussaannaasat siunnersuutigineqartuni kommunit ilaatinneqarsinnaanissaat eqqarsaatigissallugu pissusissamisuuginnartoq. Tassunga tunngatillugu QK-ata oqaatigaa, assersuutigalugu kommunit 50 %-imik piginneqataatillugit angisuunik ingerlatsinermi iluaqutissatut siunniunneqartut suli anguneqarsinnaasasut. QK-ata uppersarpaa, Kalaallit Nunaanni mittarfinnik kommunit piginneqataannaasannut tunngavissaqarluartoq, tamannalu inatsisissami nutaami ammaanneqartariaqartoq.

Tamatuma saniatigut **Sulisitsisut (GE)** oqaatigaat, ingerlatseqatigiiffiit akornanni piumasaqaataasut assigiinnngissitaarsinnagit, pisortanillu malinnaaviginninnissamik kinguneqanngitsumik ingerlatseqatigiiffiit suliffeqarfissuarmi naligiissinneqarnissaat Naalakkersuisut anguniartariaqaraat.

Aningaasaqarnermut Naligiissitaanermullu Naalakkersuisoqarfiup (Aningaasaqarnermut Naalakkersuisoqarfik) oqaatigaa, Mittarfeqarfiit A/S-imi aktianik Kalaallit Airports Holding A/S-imut tunniussinissamut periarfissat marluk siunnersuummi siunnersuutigineqartut. Tassunga tunngatillugu tunniussineq isumaqatigiissuteqarnikkut imaluunniit aningaasaatinik qaffaanermut atatillugu akileeqataassutigineqassanersut Naalakkersuisut aalajangiissapput. Periarfissat taakkua marluusut qanoq kinguneqartussaaneeri, taamaalillunilu iluaqutissat akornutissallu suuneri pillugit ersarissaaneq Aningaasaqarnermut Naalakkersuisoqarfiup maqaasivaa. Aningaasaqarnermut Naalakkersuisoqarfiup oqaatigaa, taakkua nassuiaatigineqaraluarpata paasinarnersasoq, malitsigisaanillu isumaliutigilluakkamik naleqquttumik toqqaanissaq qulakkiissagaa.

Tassunga tunngatillugu *Ineqarnermut Attaveqaasersuutinullu Naalakkersuisoqarfiup* oqaatigissavaa, mittarfinni attaveqaasersuutinut kommunit piginneqataasinnaanerit pillugu Qeqqata Kommuniata oqaaseqaatai naalakkersuisoqarfiup tusaatissatut tiguaa. Kommunip nammineerluni oqaatigisaatut, kommunit Mittarfeqarfiit A/S-imut piginneqataasinnaanerit inatsisissatut siunnersuummi matumani ilaatinneqanngilaq, taassumalu massakkut ilanngunneqarnissaa

naalackersuisoqarfiup tunngavissaqarsorinngilaa. Mittarfinni piusuni Trafikstyrelsen ingerlatsinermit akuersissutigisimasaasa piginnarneqarnissaasa qulakkeerneqarnissaa, aaqqissuusaanermilu ataatsimi sunniivigeqatigiittoqarnissaasa qulakkeerneqarnissaa inatsisissatut siunnersuummi unammillernarpoq. Piginnittuuneq paatsuugassaannngitsumik suli Kalaallit Nunaanni Namminersorlutik Oqartussaniippoq. Tassunga atatillugu ingerlatseqatigiiffimmi allangortitsinissap katitigaanissaa salliullugu suliarineqassaaq, suleqatigiissitamilu illuatungeriit nalilerpaat, tullertut alloriaatissat Mittarfeqarfiit A/S-imit Kalaallit Airports Holding A/S-imiillu ukkatarineqarnissaat pingaaruteqarmat, piginnittuunissamut tunngassuteqartut kingusinnerusukkat immikkut eqqartorneqarunik pitsaanerussasoq.

Kalaallit Airports Holding A/S-imi Mittarfeqarfiit A/S-imilu piumasaqaatit assigiinnissaannut tunngatillugu naalackersuisoqarfiup oqaatigisinnaavaa, Kalaallit Airports Holding A/S-imi Mittarfeqarfiit A/S-imilu inatsisitigut aalajangersagaallutik piumasaqaataasut assigiittussanngorlugit, inatsisissatut siunnersuummut aalajangersakkanut atatillugu immikkoortuni arlalinni tamanna eqqarsaatigineqarmat. Tamatuma saniatigut Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piumasaqaatit pillugit Inatsisartut inatsisaat nr. 4, 22. November 2018-meersumi kapitali 5-imi aalajangersakkat innersuussutigineqarput.

Aningaasaqarnermut Naalackersuisoqarfiup § 6-issatut siunnersuutigineqartumut immikkut oqaaseqaatinut oqaaseqaataa tunuliaqutaralugu, isumaqatigiissuteqarnikkut kiisalu aningaasaatinik qaffaanermi tunniussineq qanoq kinguneqassanersut Naalackersuisoqarfiup ersarinnerusumik nassuiaasiussavaa.

Taamaalilluni siuliani nassuiaatigineqartut naapertorlugit inatsisissatut siunnersuummi allannguissamut, tusarniummut akissutit tunngavissiipput.

3. Suliffeqarfimmik tunniussinermi sulisunik tunniussineq

Aningaasaqarnermut Naligiissitaanermullu Naalackersuisoqarfiup (Aningaasaqarnermut Naalackersuisoqarfik) oqaatigaa, atorfeqartit allangortinnagit Mittarfeqarfiit Kalaallit Airports Holding A/S-imi ingerlateqqinneqarnissaanni atorfillit amerlavallaalersinnaasut, ingerlatseqatigiiffimmi taakkua marluk akornanni annertuumik sunniivigeqatigiittoqassammat. Tassunga atatillugu Aningaasaqarnermut Naalackersuisoqarfiup oqaatigaa, ingerlatseqatigiiffiit taakkua marluk akornanni qanimut ammasumik oqaloqatigiittoqartariaqartoq, suliffeqarfiullu nutaamik aaqqissuusaanera eqqarsaatigalugu sulisut immikkoortortaminnut qanoq iluaqutaassaneri pillugit Sulisoqarnermut Allaffeqarfiit oqaloqatigiinnermi peqataatinneqartariaqartut. Aningaasaqarnermut Naalackersuisoqarfiup oqaatigaa, eqaallisaaneq siunertarineqassasoq, sulisullu sulinnermini atugassarititaat eqqornagit sunniivigeqatigiinneq suliffeqarfinni marluusuni

iluaqutaanissaa siunertaralugu sunniivigeqatigiinneq atorluarneqassasoq. Tamanna ilaatigut immikkoortorta qarfirmi amigaateqarneq tunuliaqutaralugu nuutsiterinermik kinguneqarsinnaavoq. Suliniutit taakkua, assigisaallu sulisup taaguutaanik, taamaalillunilu sulisup isumaqatigiissutaanik allannguisariaqarnermik kinguneqarsinnaapput. Inaarutaasumik Aningaasaqarnermut Naalakkersuisoqarfiup oqaatigaa, aktianik piginneqatigiiffinngortitserernermi atorfinitsitaanermi atugassarititaasut aallaavittut ingerlaannassasut, siunissamili pisariaqartitanik naleqqussaansamut inissaqartariaqartoq.

Tassungatunngatillugu Ineqarnermut Attaveqaasersuutinullu Naalakkersuisoqarfiup oqaatigiissavaa, Aningaasaqarnermut Naalakkersuisoqarfiup isummersuutaanut Naalakkersuisoqarfik isumaqataammat. Taamaalilluni Mittarfeqarfiit Mittarfeqarfiit A/S-imut akileeqataassutigineqarnerani sulisut atorfinitsitaanerini atugassarititaasut aallaavittut ingerlaannarnissaat, ilutigisaanilli Mittarfeqarfiit A/S-ip Kalaallit Airports A/S-illu sunniivigeqatigiissinnaanerini periarfissat atorluarneqarnissaat siunertaralugu Mittarfeqarfiit A/S ingerlatseqatigiiffimmik ingerlatsinermini naleqqussaansinnaansaanut inissaqartinneqarnissaa allassimasussanngorlugu, inatsisissatut siunnersuummi nassuiaatit ersarissarneqassapput.

Taamaalilluni tusarniummut akissut, siulianut naapertuuttumik inatsisissatut siunnersuummi allannguinissamut tunngavissiivoq.

4. Pigisat nalillit suliallu akileeqataassutigineqanngitsut

Sulisitsisut (GE) oqaatigaa, ingerlatanik mittarfinnik ingerlatsinermut, ingerlatseqatigiiffiullu siunertaanut toqqaannartumik tunngassuteqanngitsunik ingerlatsinissaanik Mittarfeqarfiit A/S peqquneqannginnissaa aalajangiisuusoq. GE naapertorlugu tunniussinissaq sioqqullugu Kangerlussuarmi Narsarsuarmilu unnuisarfiit matuneqannginnissaat, kiffartuussinissamillu isumaqatigiissuteqarfiunngitsumik Mittarfeqarfiit A/S-imut artukkiinnginnissaat pillugit aalajangiisoqartariaqarpoq.

Qeqqata Kommuniata (QK) oqaatigaa, Kangerlussuarmi nukimmik imermillu pilersuineq Nukissiorfinnut tunniunneqarnissaa, Kangerlussuarmilu unnuisarfiit tunineqartariaqarnerat pillugit § 7-imi imm. 1-imut aamma 2-mut nassuiaatinut isumaqataasorujussuullutik. Unnuisarfiit Mittarfeqarfiit A/S-imut tunniunneqarsinnaanerini siunnersuummut nassuiaatini anguniarneqarnera, QK-p isumaqatiginngitsorujussuuaa.

Tamatuma saniatigut **Qeqqata Kommuniata (QK)** oqaatigaa, Kangerlussuarmi avatangiisinut tunngasunut ataatsimoortumik aaqqiissuteqarsimatinnani, Kangerlussuarmi eqqagassalerinermik eqqaavissuarmillu ingerlatsinermik QK tigusinissaanik Naalakkersuisut peqqusinnaanissaannik siunnersuummut nassuiaatitigut anguniarneqarnera naleqqutinngitsaq. QK-ata

paasissutissiissutigaa, Kangerlussuarmi avatangiisinut tunngasut Mittarfeqarfiit kiisalu Namminersorlutik Oqartussat 1992-imiilli sumiginnarsimagaat, eqqagassalerinerlu kiisalu eqqaavissuarmik ingerlatsineq QK-anut tunniunneqannginnerani avatangiisinik torersaanissamut ataatsimoortumik aaqqiissutissarsiortoqartariaqartoq. QK-ata oqaatigaa, tamanna arlaleriarluni siunnersuutigisimallugu, Mittarfeqarfiillu kiisalu Namminersorlutik Oqartussat tamanna kissaatigisimangikkaat.

Tamatuma saniatigut **Qeqqata Kommuniata (QK)** oqaatigaa, Mittarfeqarfiit Kangerlussuarmi inissiat innuttaasunut inuutissarsiutilinnullu attartortitaat qanoq pineqassanersut siunnersuummi eqqaaneqanngitsoq. QK-ata innersuussutigaa, inissiat illuutillu taakkua Mittarfeqarfiit A/S-imut inissinneqannginnissaat, Namminersorlutik Oqartussallu ataaniiginnarnissaat siunnersuummi ersarissumik allassimassasoq. QK naapertorlugu illuutit inuutissarsiorfiusut attartortunut, matumani Namminersorlutik Oqartussat aktianik piginneqatigiiffiit allanut tunineqartariaqarput.

Aningaasaqarnermut Naligiissitaanermullu Naalackersuisoqarfiup (Aningaasaqarnermut Naalackersuisoqarfik) oqaatigaa, eqqagassalerineq eqqaavissuillu kommuninut tunniunneqarnissaat siunnersuutip § 7-ani imm. 3-mi kisimi pineqarsimappat, aalajangersagaq ersarinnerusumik allanneqarsinnaavoq, massakkummi allassimasoq pisariaqanngitsumik ersarlummat, siunertarlu paasissagaanni inatsimmut nassuiaatit misissorneqartariaqarlutik.

Tassunga tunngatillugu Ineqarnermut Attaveqaasersuutinullu Naalackersuisoqarfiup oqaatigissavaa, pigisat nalillit ingerlatallu suut akileeqataassutigineqarnissaat pillugu Naalackersuisut aalajangiinissaat, inatsisissatut siunnersuummi sinaakkutissat naapertorlugit pissasoq. Taamaalilluni inatsisissatut siunnersuut naapertorlugu, Kalaallit Nunaanni mittarfinnik, taamaalillunilu assingusunik ingerlatanik piginittuunissaq, ingerlatsinissarlu Mittarfeqarfiit A/S-ip siunertarissavaa, taamaalillunilu pigisat nalillit ingerlatallu akileeqataassutigineqartut piginnittuunermut, mittarfinnillu Mittarfeqarfiit A/S-imut akileeqataassutigineqartunik ingerlatsinermut kattunneqassallutik. Taamaalilluni pigisat nalillit, ingerlatallu mittarfinnik piginnittuunermut ingerlatsinermullu tunngassuteqanngitsut akileeqataassutigineqarsinnaangillat.

Taamaattoq pigisat nalillit, ingerlatallu mittarfinnik ingerlatsinermut kattunneqartussaananerit, nunatsinni attaveqaasersuutit immikkuullarissunut atasutut isiginiarneqartariaqarpoq. Taamaalilluni pigisat nalillit, ingerlatallu mittarfinnik ingerlatsinermut toqqaannartumik attuumassuteqanngikkaluarlutik mittarfinni ataasiakkaani ingerlatsinermut tunngassuteqarsinnaasut ilaat, Mittarfeqarfiit A/S-imut akileeqataassutigineqarsinnaassapput. Assersuutigalugu silarlunneratigut angalasut ingerlaqqissinnaatinnagit, sumiiffimmilu allami unnuiffissaqartinnagu unnuisarfik pinngitsoorneqarsinnaatinnagu unnuisarfimmik minnerusumik ingerlatsinerusinnaavoq. Uani Qaarsuni Nerlerit Inaannilu unnuisarfinnik ingerlatsineq eqqarsaatigineqarpoq.

Kangerlussuarmini Narsarsuarmitu unnuisarfiiit Mittarfeqarfiit A/S-imut akileeqaataassutigineqassanersut suli isummertoqanngilaq. Taamaattorli unnuisarfinnut taakkununga marluusunut tusarniummut akissutini tunngavilersuutit naalakkersuisoqarfiup tusaatissatut tiguai.

Mittarfinnik, ingerlatanillu tassunga assingusunik, attuumassuteqarsinnaasunilluunniit piginnittuunissamut ingerlatsinissamullu tunngassuteqanngitsunik Mittarfeqarfiit A/S suliassaqaassanngikkaluarpog. Assersuutigalugu qanga pisimasunik patsiseqartumik suli at ullumikkut Mittarfeqarfinnit isumagineqartut, suliassanik taakkuninnga nalinginnaasumik suli aqartartunut oqartussanut, suliffeqarfinnullu nuunneqartariaqarput.

Taamaalilluni eqqagassalerineq, imiullu mingunnikup suliassartaa kommuninut tunniunneqartariaqarput. Taamaattoq Kangerlussuarmini »eqqaavissuaq« kommunimut tunniunneqassanngitsoq, Namminersorlutik Oqartussalli suliassaaniiginnassasoq siunnersuummi allanneqassaaq.

Inissiat illuutillu attartortinneqartut eqqarsaatigalugit nassuiaatini aamma atuuttussanngortinneqarput. Taamaalilluni mittarfinnik, ingerlatanillu tassunga assingusunik, attuumassuteqarsinnaasunilluunniit piginnittuunissamut ingerlatsinissamullu tunngassuteqanngitsunik Mittarfeqarfiit A/S suliassaqaassanngikkaluarnera inissianut illuutinullu attartortitanut aamma atuuttoq siunnersuummi allanneqassaaq. Taamaattoq illuutit assersuutigalugu mittarfinni pisortanut sulisunullu allanut inissiatut atorneqarsimappata, taamaalillunilu mittarfinnik ingerlatsinermut mittarfinni sulisussatut pisariaqartinneqartut ineqartinneqarnissaannut inissiat pinngitsoorneqarsinnaatinnagit, Mittarfeqarfiit A/S-imut akileeqaataassutigissallugit naleqqussinnaavoq.

Mittarfeqarfiit pigisaat nalillit, ingerlataallu eqqarsaatigisatut agguataarneqarnissaat suli aalajangiiffigineqanngilaq, taamaattumillu pigisat nalillit, ingerlatallu kommuninut tunniunneqartussat amerlanerusinnaassallutik. Tamanna tunualiaqutaralugu § 7-imi imm. 3-ssatut siunnersuutigineqartup oqaasertalernera allannngortinneqassanngilaq.

Siuliani nassuiaatigineqartut naapertorlugit inatsisissatut siunnersuummik allanguinissamut, tusarniummut akissutit tunngavissiipput.

5. Inuiaqatigiinni attaveqaasersuutini pingaarutilinnik politikikkut nakkutilliineq

Sulisitsisut (GE) erseqqissaatigaat, Mittarfeqarfiit A/S-imi sunniuteqarsinnaaneq ataatsimeersuarneq aqutigalugu kiisalu pisortat sullissinerini pisussaaffiit imaluunniit kiffartuussinermik isumaqatigiissutit tunngavigalugit, uanili ingerlatanut (imaappog mittarfinnut,

qulimiguulinnullu mittarfinnut) amigartooruteqarfiusunut kisimi tunngatillugu isumaqatiginninniarnert aqutugalugit kisimi pisariaqartoq. Taamaattumik GE naapertorlugu Naalakkersuisut A/S-imut nammineertitsisorujussuusariaqarput.

Tamatuma saniatigut **Sulisitsisut (GE)** oqaatigaat, malittarisassat ataatsimeersuarnermi akuerineqartussaananik, oqartussanit akuerineqartussaananerat ileqqunut tunngavinnullu naapertuutinningsutut isigineqartoq (tassunga atatillugu piginnittuuneq innersuussutigineqanngilaq). Illersuiniarnermik tunngaveqarsinnaagaluartoq, ingerlatseqatigiiffiup malittarisassai ataatsimeersuarneq avaqqullugu politikikkut akuerineqartussaananerat GE ajornartorsiutissatut isigaa. Ingerlatseqatigiiffimmik piginnittut kisimik malittarisassanik allannguisinnaananerat GE-p pissusissamisoortutut isigaa, taamaassappalli ataatsimeersuortoqartariaqarpoq, piginnitorlu ataatsimeersuarnermi taamaallaat sunniisinnaassaluni. GE naapertorlugu KAIR Holding A/S, tamakkiisumik Namminersorlutik Oqartussanit pigineqartoq siunissami piginnittuussaq.

Tulliuttut **Sulisitsisut (GE)** oqaatigaat, attaveqaasersuutit eqqarsaatigalugit pilersaaruserluarnissaq ammasuunissarlu tamanit soqutigineqartillugu, ingerlatseqatigiiffimmik pilersitsinissamik siunertami tunngaviit ilaannut § 10-ssatut siunnersuutigineqartoq akerliusinnaasoq. GE naapertorlugu illersorneqarsinnaasumik ingerlatsinissaq, aarlerinarsinnaasunik aqutsinissaq kiisalu akisussaassuseqartumik aningaasaliisarnissaq aserfallatsaaliisarnissarlu siulersuisut piginnittunit toqqagaasut qulakkeertariaqarpaat.

Kalaallit Airports Holding A/S-ip (KAIR) oqaatigaa, Mittarfeqarfiit naatsorsuutai missingersuutailu Naalakkersuisunut nassiunneqartussat pillugit siunnersuutitigut malittarisassaasut ilaat, inatsisitigut aalajangigaasut eqqarsaatigissagaanni eqarpassittut. KAIR-ip oqaatigaa, taakkua allanngortinneqarnissaanik Mittarfeqarfiit A/S Naalakkersuisullu kissaateqassappata inatsit allanngortinneqartariaqartoq. KAIR-ip § 9-mi imm. 3 kiisalu §§ 10 aamma 11 innersuussutigai.

Naalakkersuisut Mittarfeqarfiit A/S-imut aqutsinissamik piginnaatitaaffii eqqarsaatigalugit **Aningaasaqarnermut Naligiissitaanermullu Naalakkersuisoqarfiup (Aningaasaqarnermut Naalakkersuisoqarfik)** oqaatigaa, Namminersorlutik Oqartussat aktianik piginneqatigiiffiutaannut politikikkut akulerutinnginnissaq, niuernernullu tunngatillugu ingerlatseqatigiiffiup nammineerluni pisariaqartumik iliuuseqarsinnaanissaata qulakkeerneqarnissaanik siunertaqartoq ersarissarneqartariaqartoq.

Aningaasaqarnermut Naalakkersuisoqarfik isumaqarpoq, ingerlatseqatigiiffiup ingerlatsinermi aningaasaqarnera il.il. eqqarsaatigineqarluni akigititanik akuersisoqartarnissa siunnersuutip § 9-atigut ersarissarluarniarneqartoq. Taamaakkaluartorli ingerlatseqatigiiffiup aningaasaqarnera eqqarsaatigalugu akigititassanik aalajangiinissap inatsisitigut aalajangersagaasimanissaata,

taamaalillunilu naliliinermik tunngaveqanngitsumik aalajangersaasoqarnissaata qulakkeerneqarnissaa siunertaralugu, aalajangersakkap ilaneqarnissaa eqqarsaatigineqarsinnaavoq.

Aningaasaqarnermut Naalackersuisoqarfiup oqaatigaa, tunisinikkut il.il. kiisalu kiffartuussinermik isumaqatigiissutinut nunatta karsiatigut akiliutitigut ingerlatseqatigiiffiup isertitai Mittarfeqarfiit A/S-ip ingerlatsinerata, ingerlatseqatigiiffiullu ingerlataanni pisariaqartumik aningaasaliinissanut/aningaasaleeqqinnissanut aningaasalersuutaasinnaanerat pingaaruteqartoq. Tassunga tunngatillugu Aningaasaqarnermut Naalackersuisoqarfiup siunnersuutigerusuppaa, ingerlatsineq qitiusumik allaffeqarfimmit aqunneqannginnissaanik siunertap anguneqarnissaa siunertaralugu, § 9 aqqutigalugu akigititanik aqutsiniarneq pitsanngorsarneqarsinnaanersoq eqqarsaatigineqassasoq. Taamaalilluni Mittarfeqarfiit A/S-ip akigititanik allannguinnissamik qinnuteqaataanik, akigititassat aalajangersarneqarnissaannik Naalackersuisut akuerisimasaanut qinnuteqaatit naapertuuppata, qaqugukkulluunniit Naalackersuisut akuersinginnissaat inatsisip oqaasertaatigut ersarissarneqassasoq eqqarsaatigineqarsinnaavoq.

Tamatuma saniatigut **Aningaasaqarnermut Naalackersuisoqarfiup** oqaatigaa, nalileeriaatsip, assersuutigalugu akigititanik iluarsisuteqartarnermi nalileeriaatsip iluaniittunik, akigititanik ukiumut iluarsisarnerit akuersissutigineqaratik ingerlatseqatigiiffiup iluarsisutigisarsinnaassagai eqqarsaatigineqarsinnaakutsoortoq. Aningaasaqarnermut Naalackersuisoqarfik naapertorlugu tamanna ingerlatseqatigiiffiup, qitiusumik allaffeqarfiup Naalackersuisullu sulinerinut oqilisaataassaaq, soorluttaaq aningaasartuutit ineriartornerat eqqarsaatigineqarluni akigititanik ataavartumik naleqqussaasarnissaq qulakkeerneqassasoq, ilutigalugulu akigititanik annertuumik qaffaanerit Naalackersuisunut saqqummiunneqartarnissaat qulakkeerneqassasoq.

Aningaasaqarnermut Naalackersuisoqarfik naapertorlugu, ingerlatseqatigiiffiup aningaasaqarneranik Naalackersuisut nakkutilliinissaannut piginnaatitaaffeqarnerulernissaat, akigititanik akuersisuteqartarnermi periarfissatut eqqarsaatigineqarsinnaakutsoorpoq, taamaalillunilu aningaasartuutitut pitsaanerusumik ingerlatseqatigiiffiup suliasamik suliaqartarnissaa qulakkeerneqarluni. Assersuutigalugu immikkoortumi aningaasartuutit misissueqqissaarnermik, pitsanngorsaanissamillu siunnersuummik ingerlatseqatigiiffik tunniussinissaanik peqqusisinnaanermik, Naalackersuisut inatsisitigut piginnaatitaaffilerneqassanersut eqqarsaatigineqarsinnaavoq.

Tassunga tunngatillugu Ineqarnermut Attaveqaasersuutinullu Naalackersuisoqarfiup oqaatigissavaa, mittarfiit Mittarfeqarfiit A/S-imut akileeqataassutigineqartut inuiaqatigiinni attaveqaasersuutinut pingaarutilittut isigineqassammata, mittarfiillu inuiaqatigiinni attaveqaasersuutinut pingaarutaaneri mittarfinnik ingerlatsineri eqqarsaatigineqarnissaa aalajangiisuusoq.

Mittarfiit inuiaqatigiinni attaveqaasersuutitigut pingaarutilittut inissisimanerat eqqarsaatigalugu, mittarfiit takkua isumagineqarnerini Namminersorlutik Oqartussat politikikkut tamakkiisuunngikkaluartumik suli nakkutiginnittariaqarput. Tamannarpiaq patsisigalugu, Mittarfeqarfiit A/S-imik ingerlatsinermut atatillugu nakkutilliinissat inatsisissatut siunnersuummi ilaatinneqarput.

Mittarfeqarfiit A/S-imut malittarisassat eqqarsaatigalugit suliffeqarfiup ingerlanneqarnissaanut – taamaalillunilu mittarfinnik ingerlatsinissamut – tunngaviupput. Tamanna tunuliaqutaralugu malittarisassat ilusilersorneqarnerinut politikikkut nakkutilliisooqartariaqarpoq. Tamanna tunuliaqutaralugu Mittarfeqarfiit A/S-ip malittarisassaasa akuersissutigineqartarnerinut tunngatillugu inatsisissatut siunnersuut allanngortinneqassanngilaq.

Mittarfinnut ataasiakkaanut aserfallatsaaliinissami aningaasaliinissamilu ukiunut qulinut atuuttumik Mittarfeqarfiit A/S missingersuusiortarnissaanik aalajangersagassatut siunnersuutigineqartoq eqqarsaatigalugu, Mittarfeqarfiit A/S-imut kiffartuussinissamik isumaqatigiissusiassat suliarineqarnissaanni mittarfinni ataasiakkaani ingerlatsinermut kiisalu aserfallatsaaliinissamik aningaasaliinissamillu pisariaqartitanik Naalackersuisut paasisaqaqluarnissaannik tunngaveqarpoq. Taamaakkaluartoq aalajangersagaq allanngortinneqassappat inatsisigut allannguisooqartariaqassammat, tusarniaanermi akissutigineqartut malitsigisaannik naalackersuisooqarfiup aalajangersagaq inatsimmit peerpaa. Taamaakkaluartoq aalajangersagaq taanna suliffeqarfiup malittarisassaani ilaatinneqassasoq, inatsimmut nassuiaatini nassuiaatigineqassaaq. Taamaakkaluartoq siuliani nassuiaatigineqarluni nakkutilliinissaq eqqarsaatigalugu, tusarniaanermi akissutini aalajangersakkat allat innersuussutigineqartut inatsisissatut siunnersuummi pigiinnarneqassapput.

Tusarniaanermi akissutigineqartut tunuliaqutaralugit politikikkut akuleruttussaanninngineq, inatsisissatut siunnersuummut nassuiaatini ilanngunneqassaaq.

Akigititanik aalajangersaaneq mittarfiit atorneqarnerinut aalajangiisuunera eqqarsaatigalugu, Mittarfeqarfiit A/S-ip akigititanik aalajangersaaneramik Naalackersuisut akuersisarnissaannik aalajangersagaq naalackersuisooqarfiup attatiinnassallugu kissaatigaa. Taamaakkaluartoq pisortani akitsuutit akileraarutilluunniit allanngornerisa kingunerisaanik Naalackersuisut akuersitinnagit akigititanik allannguisoqarsinnaanngorlugu, Kalaallit Nunaannilu atuinermik nalilersuisarneq malillugu, Naalackersuisunut saqqummiussinertaqanngitsumik akigititat ukiumut naleqqussarneqarsinnaanissaat inatsisissatut siunnersuut naleqqussarneqassaaq.

Taamaalilluni siuliani nassuiaatigineqartut naapertorlugit inatsisissatut siunnersuummi allannguinissamut, tusarniummut akissutit tunngavissiupput.

6. Aningaasalersuinissami, nutarterinissamilu kinguaattoorutit

Sulisitsisut (GE) oqaatigaat, Mittarfeqarfiit ullumikkut aningaasalersuinissamik annertuumik kinguaattooruteqartoq, ingerlatseqatigiiffiullu tunniunneqannginnerani tamanna iliuuseqarfigineqartariaqartoq. Ingerlatseqatigiiffiup ilusaani tamanna eqqarsaatigineqartariaqarpoq.

Kiffartuussinissamik isumaqatigiissutissap mittarfinni nutarterinissami kinguaattoorutitut matussutaanissaannik inatsisissatut siunnersuummik nassuiaatigineqartoq ilaatigut innersuussutigalugu.

Aningaasaqarnermut Naligiissitaanermullu Naalakkersuisoqarfiup (Aningaasaqarnermut Naalakkersuisoqarfik) oqaatigaa, kinguaattoorutit qanoq amerlatiginersut, piffissami qanoq sivistigisumi angummaffiginiarneqarnersut, taakkulu aningaasatigut kingunissai apequtaassasut. Taamaalilluni Aningaasaqarnermut Naalakkersuisoqarfiup apeqqutigaa, pisortat angalanerini (kiffartuussinissamik isumaqatigiissutip aningaasalersoqataanissaanut), akigititat aaqqissuunneqartarnerisa naleqqussarneqarneratigut (nammaqatigiinnermi il.il. tapiissutitigut), MIT/KAIR-imi pitsannorsaanermi sipaaruteqarnikkut qanoq amerlatigisut aaniarneqarnersut. Aningaasaqarnermut Naalakkersuisoqarfiup oqaatigaa, kiffartuussinissami isumaqatigiissutissaq ingerlatsinermut, immikkoortullu pineqartut aningaasalersorneqarnissaannut qanoq periarfissiisinaanersoq pillugu Ineqarnermut Attaveqaasersuutinullu Naalakkersuisoqarfimmik oqaloqatiginneqqinnissaminut qilanaarluni.

Tassungaa tunngatillugu Ineqarnermut Attaveqaasersuutinullu Naalakkersuisoqarfiup oqaatigissavaa, Mittarfeqarfiit A/S-ip Naalakkersuisullu niuernermik tunngaveqartumik kiffartuussinissamik isumaqatigiissuteqarnerini, nutarterinissamik kinguaattoorutit taakkua iliuuseqarfigineqarnissaat, inatsisissatut siunnersuutitigut anguniarneqarmat. Tamatuma saniatigut ilaatigut Aningaasaqarnermut Naalakkersuisoqarfiup peqataatinneqarneratigut ersarinnerusumik oqaloqatigiinnikkut, kiffartuussinissamik isumaqatigiissutitut aningaasatigut sinaakkutissat tunngaveqarnissaat pillugu, naalakkersuisoqarfiup inatsisissatut siunnersuummut ilanngutissavaa.

Taamaalilluni siuliani nassuiaatigineqartut naapertorlugit inatsisissatut siunnersuummi allanguinissamut, tusarniummut akissutit tunngavissiipput.

7. Mittarfinnut Mittarfeqarfiit A/S-imut akileeqataassutigineqartunut teknikkikkut akuersissutinik nutarterineq

Mittarfinnut Mittarfeqarfiit A/S-imut akileeqataassutigineqartunut teknikkikkut akuersissutinik nutarterisoqartariaqannginneranik Trafikstyrelsi siornatigut paasisutissiissutigisimagaa,

siunnersuummut nalinginnaasumik oqaaseqaatini allassimasoq **Trafikstyrelsi** innersuussutigaa. Tassunga tunngatillugu Trafikstyrelsi erseqqissaatigaa, akuersissutaatilimmut tunngassuteqarlutik akuersissutit il.il. aktianik piginneqartigiiffimmut pilersinneqarlaamut tunniunneqarpata allannguinertut isigineqartartoq, uanimi qinnuteqarnermi akuersissummillu tunniussinermi akuersissummik pigisaqartoq assiginngimmagu.

Trafikstyrelsi oqaatigaa, taamatut allannguineq Trafikstyrelsimut nalunaarutigineqarlunilu tassannga akuerineqassasoq, takuuk silaannakkut angallassineq pillugu inatsisip § 60-ani imm. 1-imi titarnerup aappaa. Tunniussinissaq sioqqullugu, Trafikstyrelsi teknikkikkut akuersissutaa akuersissummik pigisaqartussap tigoreersimassavaa.

Trafikstyrelsi paasissutissiissutigaa, qinnuteqarnermut tunuliaqutaasoq naatsumik nassuiaammik ilalerlugu, qinnuteqaammik nutaamik akuersissummik pigisaqartussaq akuerinissami atugassamik nassiuussissasoq. Piginnittuuneq eqqaassannigikkaanni akuersissummi pissutsit ingerlaannassappata, nassuiaammik tamanna ersersinneqarsimassaaq. Tamatuma saniatigut Trafikstyrelsi manna tikillugu akuerissuteqartumut tunngatillugu aalajangiinerinut tunngatillugu pisussaaffii (akuerissutit, immikkut akuerissutit il.i.) tigussallugit, akuersissummik pigisaqartussap Trafikstyrelsimut uppersassavaa.

Tamatuma saniatigut Trafikstyrelsi paasissutissiissutigaa, mittarfinnut najoqqutassamik nutaamik, Trafikstyrelsimut akuerineqartussamik suliaqartoqassasoq. Assersuutigalugu akuersissummik pigisaqartup taaguutaa allanngortinneqassasoq naatsorsutigineqarpoq. Mittarfinnut najoqqutassaq, siuliani qinnuteqaammut taaneqartumut ilanngullugu nassiuunneqassaaq. Mittarfiup aaqqissuussaana (mittarfinni pisortaq, pitsaassutimik qulakkeerinnittarluni pisortaq il.il. pillugit paasissutissat) pillugu paasissutissat, siuliani taaneqarluni qinnuteqaammut ilanngullugu aamma nassiuunneqassaaq. Paasissutissat taakkua mittarfinnut najoqqutassami ilaareersimassappata, taakkua immikkoortillugit nassiuunneqartariaqangillat.

Assinganik Trafikstyrelsi tusarniaanermut akissutimini oqaatigaa, isumannaallisaanermut tunngatillugu, matumani ingerlatseqatigiiffiup isumannaallisaanermi aaqqissuussaana, isumannaallisaanermilu pilersaarutit akuerisaasut ilanngullugit, Trafikstyrelsi nalunaarfigineqassalluni. Trafikstyrelsi naatsorsutigaa, tunniussinissaq tikippallaartinnagu uppersassatissat pisariaqartut pissarsiarineqarnissaat siunertarlugu, tunniussinissaq sioqqullugu akuersissummik pigisaqalartussap piffissaagallartillugu Trafikstyrelsi attavigissagaa.

Tassunga tunngatillugu Ineqarnermut Attaveqaasersuutinullu Naalakkersuisoqarfiup oqaatigissavaa, mittarfinnut Mittarfeqarfiit A/S-imut akileeqataassutigineqartunut piginnittuuneq allanngortillugu teknikkikkut akuersissutissat Mittarfeqarfiit A/S-imit qinnutigineqartussaani

allassimasunngorlugu, Trafikstyrelsip oqaaseqaataanut naapertuuttumik inatsisissatut siunnersuummut nassuiaatit nalinginnaasut iluarsineqassammata.

Akuersissutit piusut eqqarsaatigalugit mittarfiit ilusiligaanerisa il.il. allanngortittussaanninneri eqqarsaatigalugu, akuersissuteqarnissaq unammillernartunik nassataqassasoq Naalakkersuisut naatsorsuutiginnilaat.

Taamaalilluni tusarniummut akissut, siulianut naapertuuttumik inatsisissatut siunnersuummi allannguinissamut tunngavissiivoq.

8. Mittarfeqarfiit A/S-ip mittarfiinut akigititanik aalajangersaaneq

Trafikstyrelsip oqaatigaa, Kalaallit Nunaanni mittarfinnik atuinermi akigititanik aalajangersaasarnermut piginnaaneq Naalakkersuisunut (Namminersorlutik Oqartussanut) tunniunneqarnikuusoq, taamaattumillu tamanna Trafikstyrelsip akisussaaffiisa avataaniittoq. Akigititat, akigititanullu tunngaviit taakkunungalu allannguutit Naalakkersuisunit akuersissutigineqassasut siunnersuutip § 9-ani imm. 4-mi allassimasoq kiisalu mittarfimmut ataatsimi, arlalinniluunniit akigititanik, akigititanulluunniit tunngavinnik allannguinissamik Naalakkersuisuit piumasaqaasiorsinnaanerit imm. 5-imi allassimasoq Trafikstyrelsip innersuussutigaa.

Tassunga tunngatillugu Trafikstyrelsip kaammattuutigaa, ICAO-p akigititanut tunngaviusumik tunngavii sisamat (akigititat immikkoortitsinermit kinguneqassangitsut, aningaasartuutitut tunngassuteqassangitsut, ersarissuussasut, atuisullu oqaloqatigineqassasut), akigititanik aalajangersaasarnermi malinneqassasut. Tassunga tunngatillugu Trafikstyrelsip oqaatigaa, Naalakkersuisut akigititanut tunngavinnik aalajangersaassammat, Naalakkersuisut taamak iliornissaannik § 9-mi imm. 5 periarfissiisoq.

Tamatuma saniatigut mittarfiit ilaat amigartooruteqarfiusartussatut naatsorsuutigineqarneri, taakkulu niuernermit tunngaveqartumik ingerlanneqassasut siunnersuummi allassimasoq, Trafikstyrelsip innersuussutigaa. Trafikstyrelsip uppersarpaa, iluanaarut annertutinnagu, tamanna ICAO-p tunngaviinut naapertuuttoq.

Tassunga tunngatillugu Ineqarnermut Attaveqaasersuutinullu Naalakkersuisoqarfiup oqaatigissavaa, siunnersuutip kingunerisaanik ingerlatseqatigiiffiup mittarfiutaanik atuinermi akigititassanik Mittarfeqarfiit A/S aalajangersaassammat, taakkualu Mittarfeqarfiit A/S-ip ataatsimut ingerlatsineranut, suliffeqarfiullu ingerlatsineranut tunngavissanut allanut naapertuuttumik aalajangersarneqassasut.

Mittarfeqarfiit A/S-ip akigititaanik, akigititanullu tunngavissaanik Naalakkersuisut akuersissuteqartarnissaannik siunnersuutitigut siunnersuutigineqarmat uppersarnerqarsinnaavoq.

Tamatuma saniatigut Trafikstyrelsip oqaaseqaatai Ineqarnermut Attaveqaasersuutinullu Naalakkersuisoqarfiup tusaatissatut tiguai.

Taamaalilluni tusarniummut akissut, inatsisissatut siunnersuummi allannguissamut tunngavissiingilaq.

9. Mittarfeqarfiit A/S-imut kiffartuussinissamik isumaqatigiissutit

Inatsisissatut siunnersuummi tusarniutissatut siunnersuummi angalasut innersuussutigalugit **Aningaasaqarnermut Naligiissitaanermullu Naalakkersuisoqarfiup (Aningaasaqarnermut Naalakkersuisoqarfik)** oqaatigaa, anguniakkat pisariaqartitallu suut kiffartuussinissamik isumaqatigiissutikkut naammassineqarnissaannik naatsorsuutigineqartut qulaajarluarneqarsimarpasinngitsut. Tassunga tunngatillugu Aningaasaqarnermut Naalakkersuisoqarfiup siunnersuutigaa, naalakkersuisoqarfik apeqquteqartoq qanimut oqaloqatigissagaa. Kiffartuussinissamik isumaqatigiissutininut aningaasaqarnikkut sinaakkutissat eqqarsaatigalugit Aningaasaqarnermut Naalakkersuisoqarfiup oqaatigaa, aaqqissuusaanikkut iluanaarutaasinnaasut pissarsiarineqarnissaannik kiffartuussinissamik isumaqatigiissutit kinguneqaqqusaanngimmata, ilanngaattissat ilanngaatigereerlugit nunatta karsianit aningaasalersuinissaq kiffartuussinissamik isumaqatigiissutini pineqarsimassasoq.

Tassunga tunngatillugu Ineqarnermut Attaveqaasersuutinullu Naalakkersuisoqarfiup oqaatigissavaa, Aningaasaqarnermut Naalakkersuisoqarfiup tusarniummut akissutaata kingunerisaanik, Ineqarnermut Attaveqaasersuutinullu Naalakkersuisoqarfiup, Aningaasaqarnermut Naligiissitaanermullu Naalakkersuisoqarfiup Mittarfeqarfiit A/S-illu suleqatigiinnerisigut, Mittarfeqarfiit A/S-imut kiffartuussinissamik isumaqatigiissutissat ersarinnerusumik ilusilersorneqassasut inatsisissatut siunnersuummi allanneqassammat.

Taamaalilluni tusarniummut akissut, siulianut naapertuuttumik inatsisissatut siunnersuummi allannguissamut tunngavissiivoq.

10. Attaveqaasersuutinut tapiissutit

Sulisitsisut (GE) oqaatigaat, inatsisissatut siunnersuummi »nammaqatigiinnermi attaveqaasersuutinut tapiissutit« eqqaaneqartut, aningaasartuutillu atuisumut ersarlutsillugit akitsuutit amerlineqarnissaat GE isumaqataasinnaanngitsoq.

Royal Arctic Line A/S-imi assersuutigalugu aningaasalersuinissami tapiissut atuisumut aningaasartuutaanut qaffaataasoq, piffissamili sivisuumi nassiussinermi akigititap allangorsimanginneranik eqqunngitsumik paasineqarsinnaalluni atorneqartoq GE- p innersuussutigaa.

GE-p oqaatigaa, umiarsuarmik angallannerup paarlattuanik timmisartukkut angallanneq unammilleqatigiiffiusoq, akitsuutillu aningaasartuutinullu qaffaatit annikikkaluilluunniit ujartuinnermut sunniuteqartartut. GE-p oqaatigaa, taamaattumik siunnersuutigineqartutut siunissami periusissaq unammillersinnaanissaa, pisussaaffiillu PSO-t immikkoortineqarnissaat anguniagaqartariaqartoq.

Aatsitassanut Inatsisillu Atuutsinneqarnerannut Naalackersuisoqarfiup oqaatigaa, akigititassatut periutsinut assigiinngitsunut politikikkut isummertoqarsinnaanissaa pillugu, timmisartumik angalasunit tamanit akilerneqartussanngorsinnaallutik Mittarfeqarfinnut kiffartuussinissamik isumaqatigiissutinut naammaqatigiinnermi tapiissutissatut tusarniummi eqqaaneqartut, inuiaqatigiit aningaasaqarnerinut sunniutissaanik misissueqqissaartoqassanersoq eqqarsaatigineqartariaqartoq.

Tassunga tunngatillugu Ineqarnermut Attaveqaasersuutinullu Naalackersuisoqarfiup oqaatigissavaa, inuiaqatigiit aningaasaqarnerinut kingunissat pillugit misissueqqissaartoqarnissaanik apeqqummut tunngatillugu, missingersuutini aningaasaqarneq pillugu annertusisamik misissueqqissaassalluni naalackersuisoqarfiup eqqarsaatigimmagu. Tamatuma saniatigut Sulisitsisup isummersuutaa naalackersuisoqarfiup tusaatissatut tiguua.

Mittarfiit nutaat ammarpata Mittarfeqarfiit isertitatigut annaasaqangaatsiassaaq. Uani siunissami imarpik qulaallugu timmisartuussisarneq Mittarfeqarfiit Kangerlussuarimi mittarfianit, Kalaallit Airportsip Nuummi Ilulissanilu mittarfittaavinut nuuttusnaanera patsisaavoq. Mittarfeqarfiit isertitatigut annaasassai, mittarfiit nutaamik aaqqissuussaanerisa kingunerisaanik pisortani annertuumik sipaaruteqarnikkut matussuserneqassasut naatsorsuutigineqarpoq, takuuk missingersuutini aningaasaqarneq pillugu inatsimmut nassuiaatit.

Mittarfeqarfiit mittarfiutai, qulimiguulinnullu mittarfiutai arlaqartut ukiuni aggersuni nutarterneqartussaassapput. Assersuutigalugu nunap immikkoortortaanni mittarfinnut 1990-ikkunni sanaartorneqartunut, teknikkikkut sivisunerpaamik piusinnaanerit tikkineqarpoq, ukiuni tulluuttuni annertuumik aningaasaliisoqarpoq.

Mittarfeqarfiit ullumikkut suliffeqarfik nammineertitaagaluarpuunniit imaluunniit inatsisissatut siunnersuutitigut anguniarneqartut aktianik piginneqatigiiffiugaluarpuunniit, mittarfinni

qulimiguulinnullu mittarfinni taakkunani aningaasaleeqqinnissami ukiuni tulliuuttuni aningaasarpaalunnik tullerriiarisoqartussaassaaq.

Mittarfeqarfiit aktianik piginneqatigiiffingortinneqassappat, aktianik piginneqatigiiffimmilu ingerlatiinnarneqassappat, siulersuisut ilitersuinerisigut mittarfitoqqani aningaasaleeqqinnissami kinguaattoorutit pitsaanerpaamik aaqquissuunneqarnissaannut, iliuuseqarfigineqarnissaannullu periarfissiissaaq. Nunap immikkoortortaanni mittarfinnut aningaasaleeqqinnissamat pisariaqartumik pitsaasumik aallaavissaqartitsiumalluni, tassunga aningaasassanik ujartuisoqassaaq.

Inatsisissatut siunnersuummut nassuiaatit tusarniutigineqarneratigut, unammillernartup taassuma iluarsineqarnissaanut sakkussat arlaqartut atorineqarsinnaapput. Assersuutigalugu nunap immikkoortortaanni mittarfinnik atuisunut ataasiakkaanut kisimi akitsuusersuinani, nammaqatigiinnermi angalasunut tamanut akitsuusersuinikkut aningaasat taakkua pissarsiarineqarsinnaapput. Taamaattumik tamanna aalajangiiffigineqassappat suliap ingerlaneramik tunngaveqartumik aalajangiisoqarsinnaaqullugu, taamatut akitsuusersuinissami iluaqutissat ajoqutissallu Naalackersuisut misissussavaat.

Ilanngullugu oqaatigineqassaaq, nammaqatigiittumik akigititaqarnikkut mittarfinnit sinneqartoorteqartartunit, mittarfinnut amigartooruteqartartunut ullumikkut ersinngitsumik attaveqaasersuutitut tapiissuteqartoqartarmat. Mittarfeqarfiit tassunga ullumikkut ukiumut 4,9 mio. koruuninik Nunatta Karsianut akiliisarpoq, tamannalu ersinngitsumik akitsuutitut aamma nallersuunneqarsinnaalluni.

Taamaalilluni tusarniummut akissut, inatsisissatut siunnersuummi allannguissamat tunngavissiinnigilaq.

11. Missingersuutitut naatsorsuutitut inatsimmut attuumassutillit

Aningaasaqarnermut Naligiissitaanermullu Naalackersuisoqarfiup (Aningaasaqarnermut Naalackersuisoqarfik) oqaatigaa, missinngersuusiortarnermut naatsorsuusiortarnermullu inatsit (MNI) ingerlatseqatigiiffinnut Namminersorlutik Oqartussanit il.il. pigineqartunut atuutinngitsoq. Taamaalilluni MNI-mi § 6 naapertorlugu killissanut, ingerlatseqatigiiffiup taarsigassarsineri il.il. ilaatinneqanngillat.

Aningaasaqarnermut Naalackersuisoqarfiup oqaatigaa, ingerlatseqatigiiffiup taarsigassarsineranut atatillugu Naalackersuisut allanut neriorsuutaat, assersuutigalugu akiliussisussamaataaneq, MNI-mi § 6 atuutissasoq. Taamaakkaluartoq kiffartuussinissamik isumaqatigiissutitut akiliutaasartut qaffanneqarnissaannik Naalackersuisut aamma/imaluunniit Inatsisartut aalajangiineri, MNI-mi § 6 atuutissanngilaq. Matumani ingerlatseqatigiiffiup allanit taarsigassarsinerani il.il. aningaasartuutit annertusisut nalimmassarneqarnissaa qaffaanermi siunertaappat aamma atuutissanngilaq.

Taamaalilluni Naalackersuisut allanut neriorsuinersut aalajangiisuussaaq. Neriorsuisimangippata, qularnaveequsiineq § 6-imut tunngassuteqassanngilaq.

Tamatuma saniatigut Aningaasaqarnermut Naalackersuisoqarfik isumaqarpoq, MNI-mi § 6-imi malittarisassat naleqqutinngitsunik kinguneqassappata, inatsimmi allami ilanngunneqannginneratigut, MNI-mi § 6-ip allanngortinneqarneratigut taakkua aaqqinneqartariaqartut.

Tamanna tunuliaqutaralugu Aningaasaqarnermut Naalackersuisoqarfik isumaqarpoq, § 12-imi imm. 2 inatsisissatut siunnersuummit peerneqartariaqartoq.

Tassunga tunngatillugu Ineqarnermut Attaveqaasersuutinullu Naalackersuisoqarfiup oqaatigissavaa, Aningaasaqarnermut Naalackersuisoqarfiup naliliineranut naapertuuttumik, inatsisissatut siunnersuummit § 12-imi imm. 2 peermagu.

Taamaalilluni tusarniummut akissut, siulianut naapertuuttumik inatsisissatut siunnersuummi allannguinissamut tunngavissiivoq.